

Guijtz Ni Bacuaa Mateo

Retoxpengoldoo Jesucrist

(Lc. 3:23-38)

1 Guijtz ni rusule' laj
retoxpengoldoo xten Jesucrist
xi'n toDavid, xi'n toAbraham.

²Abraham gujc xtdad Isaac, Isaac
gujc xtdad Jacob, Jacob gujc xtdad
Judá con rebejtzni. ³Judá con
Tamar gujc xcuzajn Fares con Zara.
Fares gujc xtdad Esrom, Esrom
gujc xtdad Aram. ⁴Aram gujc xtdad
Aminadab. Aminadab gujc xtdad
Naasón. Naasón gujc xtdad Salmón.
⁵Salmón con Rahab gujc xcuzajn
Booz. Booz con Rut gujc xcuzajn
Obed. Obed gujc xtdad Isaí. ⁶Isaí
gujc xtdad reii David. David con
nani gujc cháäl Urías gujc xcuzajn
Salomón.

⁷Salomón gujc xtdad Roboam.
Roboam gujc xtdad Abías. Abías gujc
xtdad Asa. ⁸Asa gujc xtdad Josafat.
Josafat gujc xtdad Joram. Joram gujc
xtdad Uzías. ⁹Uzías gujc xtdad Jotam.
Jotam gujc xtdad Acaz. Acaz gujc
xtdad Ezequías. ¹⁰Ezequías gujc xtdad
Manasés. Manasés gujc xtdad Amón.
Amón gujc xtdad Josías. ¹¹Josías gujc
xtdad Jeconías con rebetzni cheni
huij reben Israel pres lo guedx
Babilonia.

¹²Che gudejd huij rebejn̄ga
pres Babilonia, dxejc guyu' xi'n
Jeconías, Salatiel. Salatiel gujc xtdad
Zorobabel. ¹³Zorobabel gujc xtdad
Abiud. Abiud gujc xtdad Eliaquim.
Eliaquim gujc xtdad Azor. ¹⁴Azor
gujc xtdad Sadoc. Sadoc gujc xtdad
Aquim. Aquim gujc xtdad Eliud.
¹⁵Eliud gujc xtdad Eleazar. Eleazar
gujc xtdad Matán. Matán gujc xtdad
Jacob. ¹⁶Jacob gujc xtdad José cháäl
Marii nani gujc xnan Jesús ni
birilaj Crist.

¹⁷Ni'cni gujc tzudaj xfamiḷ reni
agudejd gubi'reni lo guedxliujre che
gubajñli toAbram cheni gubajñliza
toreii David. Tzudajza rexagdoo
naje reni gudejd cheni gubajñli
toDavid cheni huijli reben Israel
pres Babilonia. Stzudaj rexagdoo
naje reni gudejd cheni biriilireni
pres Babilonia che gojlli Crist.

Cheni gojl Jesucrist

(Lc. 2:1-7)

¹⁸Scree gujc cheni gojl Jesucrist.
Abia'n xnanni, Marii, diidx
guchñaani José ni gac cháäl̄ni.
Per ansde xca' sa'reni, Marii agac
nuxi'nni sa'csi biääd Sprit Dxan
xten Dios lojni. ¹⁹José com najcni
te bensa'c, di rlajzni nuro'nni Marii

nez loj rebejn te niacbeereni, ni'c bejnii xhigab Guronxhiga'tzni Marii. ²⁰Xhigabga cayujnni cheni baluiloj te xangl Dios lojni, lo bacad räjpnii lojni:

—José xajg toDavid, na'c guidxejblu xca'lu Marii gacni chäällu sa'csi xi'nni nani chu najc xten Sprit Dxan xten Dios. ²¹Che gaal xi'nni cuälajluni Jesús sa'csi laani guslaani rexpejnii lo rextoljreni.

²²Guiraa redee gujc si'c te guzojb diidx ni gunii tej ni bacuaa xtidx Dios. Räjpnii:

²³Suu te dxapxteeb bäz, sajl te xingaanni nani guirilaj: Emanuel, (lajni säloj Dios nabajn con nuure).

²⁴Che gubajn José lo bacad, bejnii si'cni räjpn xangl Dad lojni. Cua'ni Marii gujc chäällni. ²⁵Luxh dini niembeeni si'c chäällni dxejli cheni gudejd gojl xingangalojni ni gulälajni Jesús.

Che biädhuui reben nanduxh ni laa remagos lojni

2 Cheni gojl Jesús nen guedx Belén xten guedx Judea, najc Herodes reii xten guedx Judea. Dxejc bidzujn reben najn ni najc remagos, siädreni nejz cadro rliejn gubijdx, bidzujnreni guedx Jerusalén. ²Rniabdiidxreni:

—¿Con reii xten reben Israel nani golgaj, ä? Nurnu abihuini xpajlni laadxlinu, ni'cni siopdonnuni.

³Che biejn diajg reii Herodes diidxga, guyuduxhni yärsia' näjza guiraa reben Jerusalén. ⁴Dxejcti batie'ni guiraa rebixhojzro ni rnibee loj rebixhojz, näjza guiraa

renani ruluui xleii Moisés lo rebejn te gunabdiidxni lojreni:

—¿Caro gaal Crist?

⁵Laareni räjpnii:

—Nen guedx Belén xten guedx Judea sa'csi si'c gunii niguii ni bacuaa xtidx Dios che räjpnii:

⁶Luj guedx Belén xten guedx Judea, dilu gajc maazru huin loj reguedxro xten guedx Judea sa'csi nen guejdxre guirii tej nani guinibee, te ni ga'p rexpenä Israel.

⁷Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni. ⁸Dxejcti baxhalnireni guedx Belén, räjpnii lojreni:

—Colchäj ro'c, colnabdiidxsa'c xcuent biuuxga te che abidxältuni jädniitu loä te näjza narä chaganäni.

⁹Che biejn diajgreni xtidx reii, sä'tireni. Bajl nani bahuiireni lagajc lajdxreni lahtis nijdni lojreni. Che bidzujnliireni cadro yu' bázga, dxejcru guzobdxii bajlga.

¹⁰Che bahuii remagos loj bajlga, rbalazduxhrene. ¹¹Si'c bidzujnreni. Che biu'reni nen yu', bahuiireni lo bázga con xnanni Marii. Dxejcti bazuxhijbreni, gojnreni bázga, baxhalreni rexcäl'nasa'creni bazalajzreni oor, näjza yaal näjza yalnejh. ¹²Che agojl guibi'reni, gunixcälreni, räjpn Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

Che siini Egipto

¹³Che sii remagos lajdxreni, biäd te xangl Dios baluilojni lo José lo bacad, räjpnii:

—Huistie, cua' biuxe're nájza xnanni, huinäreni Egipto. Ro'c gulájz che guiniáli lojlu. Siguuil Herodes biuxe're sa'csi rlajzni ju'tnini.

¹⁴Dxejc huistiegajc José, cua'ni biuxe're nájza xnanni, lagajc yáälga biriireni, siireni nez Egipto. ¹⁵Ro'c guyu'reni cheni gujtli Herodes. Guiraa dee guzajc te guzobj diidx ni bacuaa niguii ni gunii xtidx Dios che rájpní: “Egiptoli guredxá xi'ná.”

Che guinibee Herodes gujt rebiuxbáz

¹⁶Che gucbee Herodes abasguee remagosni, bidxechduxhni. Gunibeeni guet guiraa rebiuxniguii ni yu' tio'p ijz nájza rebiuxe' ni yu' guxiiru dxej, guideb neñ guedx Belén nájza reguejdx ni re' gabiga, si'cti redxej ni rájpní remagos lojni. ¹⁷Dxejc guzobj diidx ni bacuaa Jeremías ni gunii xtidx Dios che rájpní:

¹⁸Biejn xse' bejn neñ guedx Ramá, te yälhuinuxh, te yälrbedxdij, yälrbedxnen: laa Raquel ni roon yejc rexi'nni. Naaddini jiájlní lajzni sa'csi agujt rexi'nni.

¹⁹Cheni gujt Herodes, dxejc lo te bacal huiluiloj xangl Dios loj José neñ Egipto. ²⁰Rájpní:

—Huistie, cua' biuxe're nájza xnanni, gubisac nez Israel sa'csi agujt renani rlajz ju't biuxe're.

²¹Dxejcti huistie José, cua'ni biuxe' nájza xnanni. Gubi'reni Israel. ²²Luxh che biejn diajgni rnibee Arquelao guejdx Judea lacuaa Herodes, xtadni, bidxejbni nuini ro'c. Dxejc gunisac Dios lojni loj te bacal, ni'c huijni lo reguejdx

xten Galilee. ²³Dxejc biádlájzni nen guejdx ni laa Nazare't te si'c guzobj diidx ni bacuaa niguii ni gunii xtidx Dios cheni rájpní: “Sirilajni nazaren.”

Juan Bautist basule' xtidx Dios loj rebejn

(Mr. 1:1-8; Lc. 3:1-9, 15-17; Jn.1 :19-28)

3 Neñ redxejga biáad Juan Bautist lo reyubijdx xten guedx Judea, ro'c cagulijdxni, ²cayájpni:

—Colgusiechljaztu rextojltu sa'csi xcälrnibee Dios abidzungajxhni.

³Juan najc nani basá't Isaías, te niguii ni gunii xtidx Dios, cheni bacuaani:

Riejn xse' te ni rbedxa' nez lo reyubijdx:

“Colguslii xnezyuj Dad, colguslii xnezyulajzni.”

⁴Najcw Juan xquichlajd cameii. Naliib te duguijd xque'ni. Rajwni guxha't nájza dzujn xten baseerguijxh. ⁵Riáad reben guedx Jerusalén náj guiraa reben Judea nájza rebejn ni tre' gajxh nez ro' gueu Jordán, riádcuadijgreni xtiidxni. ⁶Che ruxhobdojlreni xtojlní, rutiobnis Juanreni ro' gueu Jordán.

⁷Che bahuiini siáad xhidajl reben guidoo ni najc refarisee nájza ni najc resaducee, rlajzreni gutiobnisiireni, rájpní lojreni:

—La'tu benguidxduxh, najctu si'c bäl. ¿Chu balijdxtu guxuñtu loj xcälrdxe'ch Dios ni siáad?

⁸Colguibansa'c si'cni nungájl te fiipac rebejn guliipac abasiechljaztu.

⁹Na'c litis guntu xhigab naatu: “iNi nurnu najcnu rexagdoo toAbram!”

Rniliä lojtu, sajc xca' Dios reguijre gunni gacreni rexi'n toAbram.

¹⁰Asojib guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni. ¹¹Narä guliicani rustiobnisä con nis si'c te seen cheni abasiechljaztu, abaxhobdojltu. Niluxh nani siääd detzä sutiobnisni la'tu con Sprit Dxan xten Dios näjza con guiboo. Rnibeeruni loä. Bensacduxhni. Nicla xcura'chni digacdi chanää. ¹²Aca'ni xhi cojn gusiani triuu xtenni te chuchee triuuga neñ ngodx xtenni. Dxejcti guixhtriuuga, suze'cni guijxhga lo guiboo ni rejc par tejpas.

Che guobnis Jesús

(Mr. 1:9-11; Lc. 3:21-22)

¹³Dxejc birii Jesús nez Galilee, bidzujñni ro' gueu Jordán cadro yu' Juan te gutiobnis Juanni. ¹⁴Niluxh naaddi Juan gutiobnis Jesús. Räjñ Juan lojni:

—Luj nanab gutiobnislü narä, niluxh naj alga luj siäädlu loä te gutiobnisälu.

¹⁵Dxejc räjñ Jesús lojni:

—Basaan gacni si'c naj, sa'csi nanab gusoobnu guiraa ni rlazj Dios gac.

Dxejctiru batiobnis Juan Jesús.

¹⁶Cheni gulujx guobnis Jesús, birigajcni lo nis. Dxejc bixal xhaguibaa, bahuiini siädyajt Sprit Dxan xten Dios si'c te palom, biäjtni lojni. ¹⁷Dxejc xhaguibaali biejn diajgreni te xse' ni räjñ:

—Dee najc xi'nä ni sanälazä. Laani rbanälazä.

Che huij Jesús lo reyubijdz

(Mr. 1:12-13; Lc. 4:1-13)

4 Dxejc bejn Sprit Dxan xten Dios huij Jesús nez lo

reyubijdz te nejzga nuhual bendxab Jesús.

²Che gulujx bacua'n Jesús tiuu gubijdx, tiuu guxhijñ, gulaanni.

³Sas biääd bendxab lojni, räjñni:

—Palga guliilu Xi'n Dioslu, gunibee gac reguijre yätxtiil.

⁴Badzu' Jesús diidxre lojni, räjñni:

—Loj reguijtz xten Dios caj scree:

“Xhet ganaxdi yätxtiil guibajñ rebejñ; sibajñzani con guiraa diidx nani rnii Dios.”

⁵Dxejcti huinä bendxab Jesús guedx Jerusalén. Gulä'pnini jiaa yejc xques guidoro. Dxejcro räjñ bendxab lojni:

⁶—Palga Xi'n Dios luj, bitiäjs lo yujli, sa'csi scree caj loj rexquijtz Dios:

Sinibee Dios rexanglni ga'preni luj;

siliäsreni luj con naareni didi gacnaj ni'lu lo reguijga.

⁷Badzu' Jesús diidxre lojni, räjñni:

—Caj loj rexquijtz Dios: “Na'c fallu Dad ni najc Xtioslu.”

⁸Stee huält huinä bendxab Jesús yejc te danro. Dxejcti baluiini lojni guiraa reguejdx, reguedxro ni tre' lo guedxliuj naj guiraa xcäl'nasa'ceni.

⁹Dxejcti räjñni loj Jesús:

—Guiraa redee sunidxä lojlu palga guzuxhijblu nez loä te ganlu narä.

¹⁰Dxejcti räjñ Jesús lojni:

—iHuij nez rec bendxab! Scree caj loj rexquijtz Dios: “Dad Xtioslislü ganlu; lojtisni chulu.”

¹¹Dxejcti gubicaj bendxab loj Jesús. Dxejc biääd rexangl Dios biädhuiireni Jesús.

Gusloj Jesús cayujñ xtzauñni

(Mr. 1:14-15; Lc. 4:14-15)

¹²Che biejn diajg Jesús yu' Juan neñ ladzguuib, huijni nez Galilee.

¹³Dxejcti gudejdni guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabulón con Neftalí. ¹⁴Si'c gujc te guzobj diidx ni bacuaa Isafas ni gunii xtidx Dios:

¹⁵Lajdx Zabulón, lajdx Neftalí, nezyuj ni rij nez ro' nisdoo, stelaad gueu Jordán, Galilee cadro rbäjz rebejn nani di gac rexpē Israel.

¹⁶Rebejn nani rbäjz nen te yälčäy abahuiireni te bajlga, luxh bajlga basanij xcäriejn renani nabajn lo xcälrdxejb, lo xpalaa yälgujt.

¹⁷Dxejcli gusloj cagulijdx Jesús, räjpni:

— Colgusiejchljaztu, colguxhobdojl te guibansa'tcu sa'csi abidzungajxh xcälrnibee Dios.

Che gurejdx Jesús tajp xpejn̄ni

(Mr. 1:16-20; Lc. 5:1-11)

¹⁸Sasaj Jesús nez ro' nisdoo xten Galilee che bahuini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bäjł, ni'c cacuaareni guijxh lo nisdoo. ¹⁹Dxejcti räjp Jesús lojreni:

— Coltanajł narä. Naj riniaaztu bäjł, niluxh narä gunä cuedxtu rebejn.

²⁰Lagajc dxejc basa'nreni xquijxhreni te sanajłreni laani.

²¹Che gudejdreni ro'c, bahuini loj stio'p niguii, Jacob con bejtzni Juan. Yu'reni nen te barcw con xtadreni, ni laa Zebedeo cayunsa'creni guijxh. Dxejc gurejdx Jesúsreni. ²²Lagajc dxejc basa'nreni

barcw näjza xtadreni te sanajłreni Jesús.

Caguluii Jesús xhidajł bejn

(Lc. 6:17-19)

²³Sasajti Jesús guideb nez región xten Galilee, caguluiini nen tejga rexquidooreni. Cagusule'ni redidxcoob xten xcälrnibee Dios. Cagusiajczani guiraa yälracxhuu ni rajc rebejn guejdxga, guiraa yälguijdx. ²⁴Biejn diajg reben Siria diidx xcuent ni cayujn Jesús. Sas biädnäreni guiraa rebenracxhuu ni cayajc guiraloj yälguijdx, yälñayan; guiraa reni rajc yejcreni, guiraa reni rajc malyälguijdx, reni rajc yälguidxbej, guiraareni abixu'n tiejxhreni. Dxejcti basiajc Jesús rebejn̄ga. ²⁵Xhidalduxh ben Galilee huinajłni, näj reben reguedx Decápolis, näjza reben Judea näjza rebejn ni tre' stelaad gueu Jordán.

Yejc te dajn balijdx Jesucrist rebejn

5 Che bahuini Jesús loj reben xhidajł, huä'pni yejc te dajn. Dxejcti gubig rexpejn̄ni ni gurejdxni lojni. ²Dxejc gusloj caguluii Jesús reni'c, scree räjpni:

Rebejn ni sibaalajz

(Lc. 6:20-23)

³—Sibaalajz rebejn nani nanchee rquinduxhreni xcälracnäy Dios, sa'csi laareni nungäjłreni xcälrnibee Dios.

⁴Sibaalajz rebejn nani rac-huin lajzreni xcuent rextojłreni, sa'csi sudzucay Dios xtojłreni, susiäjłni lajzreni.

⁵Sibaalajz rebejn nani nadolajz nani rłajz guntis si'cni rnibee

Dios, sa'csi sacnäj Diosreni lo xcäl'nabajñreni lo guedxliujre.

⁶Sibaalajz rebejn ni nastoocanu rliaanreni, riojlreni, sa'csi rlanjreni guibañsa'ctisreni nez loj Dios, sa'csi sudeed Dios lojreni guiraa ni rniabreni.

⁷Sibaalajz rebejn nani rulaslajz sa'reni, sa'csi sulaslajzza Diosreni.

⁸Sibaalajz rebejn nani najc nayatis lastooreni rujñreni rexhigabsa'c xten Dios sa'csi suhuiireni lo Dios.

⁹Sibaalajz rebejn nani ruscuedxilajz sabejnreni, sa'csi laareni sirilajreni rexi'n Dios.

¹⁰Sibaalajz rebejn nani rusutijp lajzreni che rusacsí bejnreni sa'csi nabañsa'creni nez loj Dios, sa'csi xtenreni najc xcäl'rnibee Dios xhaguibaa.

¹¹Col'spaalajztu che gusacsí bejntu tilñajreni la'tu, guiniireni guiraloj didx-xhii xcuent xtidxä.

¹²Col'guibaalajz, col'balajz sa'csi xhaguibaali sunidxduxh Dios xcuent xtuuntu. Sigajcza basacsíreni reniguii ni gubajñ galoo ni gunii xtidx Dios.

La'tu najctu si'c sejd lo guedxliujre

(Mr. 9:50; Lc. 14:34-35)

¹³Räjpzani:

—La'tu najctu si'c sejd lo guedxliujre. Palga di sejd gac nadzujy, ¿xho gacsacni nadzujy? ¿Xhi gun bejnñ dxejc? Susälreni sejdga detz yu', suläj bejn yejñi.

¹⁴La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni.

¹⁵Digacdi xcaguij te bajl dxejcti jiauuini neñ te caj. Maazru huen

soobni jiaa neñ te gandilieer te gusanijni loj guiraa rebejn ni tre' neñ yu'. ¹⁶Xcäl'nabañsa'ctu najc si'c te bajl loj rebeñ guedxliuj. Suhuiireni xtzunsa'ctu dxejc siliä'preni xpala'n xtadtu ni yu' xhaguibaa.

Ruluü Jesús xcuent leii

¹⁷Räjpzani:

—Na'c guntu xhigab siädgudzucaä leii xten toMoisés, niclaza rediidx ni baluüi redad ni gunii xtidx Dios. Xhet siädzucaädini, narä siälä te guluiäpacni si'cni najñi. ¹⁸Rniliäpac, dxejli che ni nitloj guibaa näjza guedxliuj, nicla tej letr ni caj loj leii di nit. Sajcpac guiralii ni caj lo reguijtzga. ¹⁹Ni'cni chutis ni rlanj gusaan te diidx nani caj loj leii, mase te didxbäzni, luxh ruluüini gun bejn si'c, laani guxiduxh sajñi lajdx Dios guibaa. Niluxh renani rucua diajg xtidx leii, luxh rujñpacreni si'cni caj lo leii, ruluüizani leii, bensacduxh gacni lajdx Dios guibaa. ²⁰Ni'cni rniä lojtu, palga ditu gusa'cru xtzun Dios, ditu guibañsa'cru loj reni najñ xcuent xleii toMoisés, näjza loj rebeñ guidoo ni laa farisee, dipactu jiu' lajdx Dios xhaguibaa.

Ruluü Jesús xcuent yälrdxe'ch

(Lc. 12:57-59)

²¹Räjpzani:

—Abiejña diajgtu nani gunii rebengoldoo: “Na'c ju'tlu. Chutis te nani ju't sa'ni, sinärenini lo guxhtis te jiauuini neñ latzguüib.” ²²Niluxh narä rniä chutis nani guidxechduxh lo sa'ni sijni lo guxhtis. Chutis ni gunii didxnaj lo sa'ni, sijni lo juejz.

Chutis ni gāb lo sa'ni: “bennayällajz” sidejdni loj yālguxhtis xten Dios, sijni gabijl cadro cayeje guiboduxh.

²³Che sanālu gojn guidoo te gusa'nlu ni lo bacuug, palga guinaj lajzlu yu' chu lo cadxe'chlu, ²⁴basansijc gojn xtenlu lagajc ro'c, huisiālxgaa diidx con sa'lu, dxejcti guibi'lu te gac gusa'nlu gojn xtenlu.

²⁵Palga yu' chu rdxe'ch lojlu, basquejn basiājī diidx con laani lagajc cheni sasanājīluni lonezyuj te di gutedni luj lo juejz. Luxh juejz suteedni luj loj reguixhaj te gusaureni luj nen latzguuib.

²⁶Rniliāpac lojlu: “Dilu guirio ro'c palga dilu cue'c guirali meel nani guiniabni lojlu.”

Rului Jesús xcuent yālrusguee sa'ni

²⁷Rājzani:

—Abiejn diajgtu guniireni galoo: “Na'c guesnājtu gunaa nani di gac chāāltu.” ²⁸Narā rniā, chutis te nani fii loj te gunaa dxejcti guisia' lajzni gunaaga, abejnni dojl nen lastooni. ²⁹Palga balojlu ladbee rujn rujnlu dojl, gulāāni basāl ni te laad sa'csi hueenru gunijtlu te balojlu quela chāā guideb tiejxhlu gabijl. ³⁰Palga naalu ladbee rujn rujnlu dojl, batiu'ni sa'csi hueenru gunijtlu te naalu quela chāā guideb tiejxhlu gabijl.

Rului Jesús xcuent yālruro'n chāāl bejn

(Mt. 19:9; Mr. 10:11-12; Lc. 16:18)

³¹Rājzani:

—Abiejn diajgtu guniireni galoo: “Chutis niguii ni rajz guro'n chāāl ni, nanabtis gudeedni te guijt z nani nrii abaro'nni chāāl ni.” ³²Narā rniā,

niguii nani guro'n chāāl ni niluxh xhet dojl di bejn chāāl ni, niguiiga sujn gun chāāl ni yālgubejxh, niluxh chutis ni guchnaa gunaaga sujnzani yālgubejxh.

Rului Jesús xcuent che ria'n diidx

³³Rājzani:

—Abiejn diajgtu gunii rebengool: “Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios.” ³⁴Narā rniā, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios, ³⁵nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxlaidx reiiro, ³⁶niclaza por lagajc bituiejcl, sa'csi digacdi guncheelu te guichyas niclaza te guichno, nicla tej guijch. ³⁷Nanab guiniitl: “Mbaj” o “Ajndi”. Palga yu' xhiru rniilu, bendxab najc ni rujn rniiluni.

Chanälajzni rebejn ni rdxe'ch lojni

(Lc. 6:29-30)

³⁸Rājzani:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu.” ³⁹Narā rniā, na'c tilnājlu te bejn ni bejn te cos guijdx lojlu. Palga chāāzni ladbee lojlu badeed stelaad lojlu chāāzni. ⁴⁰Palga yu' chu rrajz tilnājlu te xca'ni xcamangwlu, badeedza naj xsa'cwl lojni. ⁴¹Palga yu' chu guinibee guulu xcargwni te kilómetro, huināni tio'p kilómetro. ⁴²Nani guiniab xhi guiniabxlia'ni lojlu, badeedni. Nani guiniablaa xhi guinablaani lojlu na'c gudxojnuni lojni, na'c gāblu: “Xhetini.”

⁴³Abiejn diajgtu gunii rebeṅgool: “Colchanälajz sa'tu. Colguidxe'ch loj renani rdxe'ch lojtu.” ⁴⁴Narä rniä lojtu, colchanälajz rebejn ni rdxe'ch lojtu. Benle' yejc reni rgue lojlu. Colyejn dxunsa'c loj renani rdxe'ch lojtu. Colcuejdx, colnab loj Dios xcuent rebejn nani rdxagdijltu, rusacsíreni la'tu, ⁴⁵te si'c gactu xi'n xtadtu ni yu' xhaguibaa nani rujn rii xcubijdxni lo rebensa'c sigajcza lo reben guijdx. Rujnzani riab nisguuj lo rebensa'c sigajcza lo rebenguijdx. ⁴⁶Palga la'tu chanälajztu lagajctis rebejn nani rinälajz la'tu, ¿xhi gaan guntu dxejc? Najctu lagajc si'c najc rebejn ni rutie' meel ni rajx lo gubier. ⁴⁷Palga guiniitu: “Xchan”, lagajctis loj resa'tu, ¿xhini'c rujntu ni najc hueenru lo chutis bejn? ¿La et sigajcdiza rujn rebejn nani di gumbee Dios? ⁴⁸Colyajc bensa'c si'c ni najc xtadtu ni yu' xhaguibaa.

Rului Jesús xho gudeedni gojn

6 Räjpzani: —Na'c gusäbdiidx guntu dzunsa'c nez loj rebejn te fiitisreni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu. ²Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee nen reguidoo, näjza lad nezyuj. Rujnsireni si'c te ruhuii rebejn xhi rujnreni te rliä'p rebejn xpala'nreni. Narä rniä acua'reni gaan xtenreni. ³Luj che gudeedlu gojn xtenlu, na'c gacbee nicla tej xamiigwlu xhi badeedlu, ⁴te gac gojn xtenlu xhiga'tz. Dxejcti xtadlu ni cahuii nani bejnlu xhiga'tz, sacnäjni luj nez loj rebejn.

Rului Jesucrist xho cueedx, guiniabni lo Dios

(Lc. 11:2-4)

⁵Räjpzani:

—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchaglajzreni rniabreni lo Dios rsiuliireni nen reyu' cadro riel xtidx Dios, näjza guiraa resquiin, näjza nez ronejz te ruhuii rebejn xho rujnreni. Rniliä'pac, acua'reni gaan xtenreni. ⁶Naj luj cheni cueedx, guiniablu lo Dios, biu' nen xyu'lu. Basäuu ro' yu'ga, dxejcti xhiga'tz gunii loj xtadlu ni yu' xhaguibaa. Dxejcti xtadlu ni cahuii xhi rujnlu xhiga'tz, sacnäjni luj nez loj rebejn.

⁷Cheni caniiitu lo Dios, na'c guinisactu balti huält rediidx nani aguniitu. Si'c rujn rebejn nani di gumbee Dios. Naarení sa'csi sanuutis rniireni xhidajl diidx balti huält, siejn diajg Dios. ⁸Na'c guntu sigajc ni rujnreni, sa'csi anajn xtadtu xhini'c rquiintu che guiniabtuni lojni. ⁹Ni'cni scree colguinii lo Dios:

Xtadnu ni yu' xhaguibaa dxan najc lajlu.

¹⁰Sujiääd xcälrnibeelu; bejn si'cni rlajzlu lo guedxliujre sigajc rujnlu xhaguibaa.

¹¹Nadxej baniidx xcu'nnu sa' ni rdaunu guira dxej.

¹²Basiäjł lajzlu redojl xtenu si'c riäjł lajznu redojl xten rebejn ni rujn dojl loonu.

¹³Na'c gusaanlu jiaabnu xhigabguijdx, basłaa nuure lo dojl, sa'csi xten guejblu najc yälrnibee, yäl nadip näjza yälrdimbicha' par tejpas.

Sugacni si'c.

¹⁴Palga la'tu gusiäjł lajztu redojl ni rujn rebejn lojtu, xtadtu ni yu' xhaguibaa susiäjłza lajzni rextojłtu.

¹⁵Palga ditu gusiäjł lajztu redojl ni rujn rebejn lojtu, sigajcza xtadnu ni yu' xhaguibaa di lajzni jiäjłza rextojłtu.

Ruluii Jesús xho gucua'n bejn

¹⁶Räjpzani:

—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliä acua'reni rexgaanreni.

¹⁷Niluxh la'tu, che rucua'ntu, colcun yejctu, colquiib lojtu ¹⁸te na'c gacbee rebejn cagucua'ntu, xtadtistu suhuii cagucuanxhiga'tztu. Xtadtu ni cahuii xhi cayunxhiga'tztu suniidxni xhi xca'tu nez loj rebejn.

Yälñasa'c ni yu' xhaguibaa

(Lc. 12:33-34)

¹⁹Räjpzani:

—Na'c gapdajntu yälñasa'c lo guedxliujre cadro rajw reman o rribtiejn xhixtentu, niluxh richu' gubaan rolizj bejn te rbajnreni.

²⁰Hueenru ga'ptu xcälñasa'ctu xhaguibaa cadro di reman gauu, diza rehxixtentu cuibtiejn, diza regubaan jiu' te cuanreni. ²¹Sa'csi cadro yu' xcälñasa'ctu, ro'cza naga' lastootu.

Bianij xten tiejxhtu

(Lc. 11:34-36)

²²Räjpzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij. ²³Niluxh

palga rebalojtu di fisa'c, guideb tiejxhtu yu' lo nacäjy, ni'cni palga bajl nani yu' tiejxhtu dini gusanij, ilinacäiboo najc guidebtu!

²⁴Nicla te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Digacdi guntu xtzuun Dios palga caguuiltistu xcälñasa'ctu lo guedxliujre.

²⁵Ni'cni rniä lojtu, na'c chutu yärsia' por xcälñabajntu, xhicha gautu, xhicha yätu, niclaza naatu xhicha lajd gajcwtu. Yälñabajn sajcru lo yälrajw, luxh sajcru tiejxhtu lo xhajbtu. ²⁶Colhuii remane' ni rtajt xhaguibaa. Direni cue'c binij, dizareni guilia' gäjł, dizareni cuchee xhi gaureni nen yu', luxh xtadtu ni yu' xhaguibaa rudedni xhi rajwreni. ¿Laa xhet sajcdirutu loj remane'ga, ä? ²⁷¿Chu tej la'tu sa'csi ru'tu yärsia' sajc tiobrutu ste bo'c jiaaru?

²⁸¿Xhicuent runduxhtu xhigab xcuent xhajbtu? iColhuii reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni. ²⁹Narä rniä lojtu, nicla reii Salomón guideb najcwni rexhabsa'c xtenni di nisiuchee si'c rsiuchee tej reguiiga.

³⁰Palga Dios rujn rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, bejn nani guxii rililajz?

³¹Ni'cni na'c chutu yärsia' guntu xhigab: “¿Xhicha guidaunu, xhicha guidunnu, xhicha gacwnu?” ³²Sa'csi rebejn nani di gumbee Dios xhigabtisga rujnreni, caguilreni guiraa recosga. Niluxh xtadtu ni yu' xhaguibaa anajnni xhini'c rquiintu.

³³Colquixгаа yälrnibee xten Dios näjza yäl'nabansa'c si'cni rlanj Dios dxej sica'tu guiraa ni rquiintu.

³⁴Ni'cni na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

Na'c cubeetu sa'tu

(Lc. 6:37-38, 41-42)

7 Räjpszani:
—Na'c cubeetu sa'tu te na'cza cubee Dios la'tu. ²Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutixhtu lo bejn, si'cza sutiexh Dios lojtu. ³¿Xhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu? ⁴¿Xhicuent gäblu lo sa'lu, nädonnu cuää guijxh ni yu' nen balojlu, luxh dilu fii loj yagro ni yu' nen balojlu? ⁵Ben'guijdx ni rusguee, guläxгаа yagro ni yu' balojlu te gac fisa'clu te cuäälü guijxh nani yu' baloj sa'lu.

⁶Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbälazreni cossa'c najczeni si'c cuch ni ruläj yejc xhitis xhi cos.

Col'nab, colquiiil, colgusejz rolä'

(Lc. 11:9-13; 6:31)

7 Räjpszani:

—Col'nab lo Dios te guniidxni nani rniabtu. Colquiiilni te guidxäjltuni. Col'nii rolä', te guixalni jiu'tu.

⁸Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhalzarenini lojni.

⁹¿La yu' chu tejtu che guiniab xi'nni te yätxtiil, alga gudeedni te guij, ä? ¹⁰O palga guiniabni te la' bälj, äla sudeedni te bälj?

¹¹Palga la'tu ni najc bejn guijdx rajc rudeedtu cossa'c loj xi'ntu, aticaxh xtadtu ni yu' xhaguibaa. Laani suniidxni cossa'c loj renani guiniabni lojni.

¹²Ni'cni guira'ti cos ni rlanjtu gunnäj bejn la'tu, sigajcza col'yennäjreni, sa'csi si'c caj lo leii xten toMoisés, näjza lo diidx ni bacuaa redad ni gunii xtidx Dios.

Rolä' xten yäl'nabajn najc dää

(Lc. 13:24)

¹³Col'jiu' nez rolä' nani najc dää, sa'csi gulajg najc rolä', gulajg najcza nezyuj nani rinä bejn lo yälrunijt, luxh xhidajlreni riu' nejzga. ¹⁴Sa'csi dää najc rolä', dääza najc nezyuj nani rinä bejn nez loj yäl'nabajn, niluxh guxii najc renani rdxäl nezyujga.

Ninexhsa'c ni rcaj loj te yajg rujn gumbeeni yajgga

(Lc. 6:43-44)

15 Räjpszani:

—Col'natiro rebejn nani rlanj gusguee la'tu. Rniisireni rusule'reni xtidx Dios. Rluuisi nadolajzreni si'c te xiil, niluxh direni gac. Alga si'c loob najczeni, rutie'chreni bejn si'c re'ch xiil che riädchu' loob lojreni. ¹⁶Dzuun nani rujnreni sujn gumbeeturenini. Anajntu di uub xcaj lo reyaguejch, diza iigw xcaj lo guechbiojb. ¹⁷Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'cdi, ganax ninejxh ni di ganaxsa'c rcaj

lojni. ¹⁸Digacdi xcaj ninexhdxuudx loj te yajg ninexhsa'c. Di gacdiza xcaj te ninexhsa'c loj te yajg ni di gac yagsa'c. ¹⁹Guiraa reyajg nani di ninexhsa'c xcaj lojni, nanab guidinni te checni. ²⁰Sigajcza sajc gumbeetu bensa'c sa'csi rujnreni dzunsa'c.

Xhet guiraadi bejn̄ jiu' lo xcäl̄rnibee Dios

(Lc. 13:25-27)

²¹Räjpzani:

—Xhet guiraadi renani rnii, “Dad, Dad”, jiu' lo xcäl̄rnibee Dios xhaguibaa. Ganaxtis renani rujn si'cni rlanj Xtadä ni yu' xhaguibaa. ²²Sidzuj̄n dxej sinii xhidajl bejn̄ loä: “Dad, Dad, con lajlu basule'nu xtiidxlu, con lajzalu biläenu rebendxab, con lajzalu bienu remilagwr.” ²³Dxejc säpä lojreni: “Dina gumbeä la'tu. Col̄bicaj loä beñlatsiaj.”

Tio'p cimient

(Lc. 6:47-49; Mr. 1:22)

²⁴Räjpzani:

—Chutis nani rucuardiajg diidx nani caniä, luxh ruzoob xtidxä, laani najc si'c te bensiñ nani basoob rolijzni yejc te guilaj. ²⁵Che biajb nisguij, biäjt nis gueuu, gubi' bej, bidinreni yejc yu'ga sas di yu'ga niajb sa'csi sojbni yejc guilajga. ²⁶Nani riejn diajgni xtidxä, luxh dini guzoob xtidxä najc si'c te beñ gualajz nani basoob rolijzni lo yujxh. ²⁷Che biajb nisguij, biäjt nis gueuu, gubi' beduxh bidinreni yec yu'ga. Dxejc ligurebä'n yu'ga. Lacti xhiroob banijt bejnga.

²⁸Che gulujx gunii Jesús rediidxga, lacti bidxeloj rebejn̄

rediidx ni baluiini, ²⁹sa'csi baluiini rebejn̄ si'cpac te nani rnibee, xhet si'c ruluiidi rebejn̄ ni najn leii.

Rusiajc Jesús te bejn̄ ni ral̄ tiejxhni

(Mr. 1:40-45; Lc. 5:12-16)

8 Che biäjt Jesús yec dajn, xhidajl bejn̄ huinajlni.

²Dxejcti biääd te beñracxhuu ni ral̄ tiejxhni nez loj Jesús. Bazuxhijbni, räjpni:

—Dad, palga rlanjlu, sajc gusiajclu narä.

³Dxejcti basгаа Jesús ñaani, gudajnni dade'ga con ñaani, räjpni: —Rlazä jiajclu. Siajc tiejxhlu.

Lagajc dxejc gubicaj guejdx ni ral̄ tiejxhni. ⁴Dxejcti räjp Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn ni gunii toMoisés gudeed bejn̄ ni riajc, te fii rebixhojzga abiajclu.

Rusiajc Jesús te xmos capitán roman

(Lc. 7:1-10)

⁵Che biu' Jesús guedx Capernaum, bidzuj̄n te capitán roman nani rnibee te gayuu soldaad. Gunabduxhni lo Jesús, ⁶räjpni:

—Dad, xmosä naga' rolizä. Di gacdi guiniibni luxh cayanduxhni.

⁷Räjp Jesús:

—Do'o te gusiacañi.

⁸Dxejcti räjp capitán lojni:

—Dad, xhet sacädi; di nungäj̄l jiu' guejblu rolizä. Guiniitis te diidx, siacgajc xmosä. ⁹Narä nacäza xmos rebejn̄ ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn̄ dee”, rungajcni.

¹⁰Che beijn diajg Jesús si'c, bidxeloduxhni, rájpmi loj renani siádnajlmi:

—Rniliápac lojtu, nicla neñ guideb reguedx Israel dina nidxälä te bejn ni rililajz si'c rililajz dade're. ¹¹Niluxh rniä, sirii xhidajl benzijit nez ladjiaa, nez ladjiaät, te jäädquenäjreni Abram, Isaac, Jacoob lajdx Dios xhaguibaa. ¹²Luxh reben Israel nani ni ajc xi'n Dios sijreni te laad lo yälkäjy cadro soonreni, sauya'reni läjyreni, sidejdtisreni trabajw par tejpas.

¹³Dxejcti rájp Jesús loj capitán: —Gubi' rolizlu. Sigajcni huililajzlu, sigajcza gacni.

Dxejc lagajc orga bi ajc xmosni.

Rusiajc Jesús xnansuegr Pedr

(Mr. 1:29-31; Lc. 4:38-39)

¹⁴Che bidzujñ Jesús roliz Pedr, bahuiini naga' xnansuegr Pedr, cayacxhuuni, yu'ni xliaa. ¹⁵Dxejc gudajntis Jesús naani, birigajcni xliaaga. Dxejcti huistie nane'ga, gusloj cagudeedni xhi gau Jesús.

Rusiajc Jesús xhidajl beñ racxhuu

(Mr. 1:32-34; Lc. 4:40-41)

¹⁶Che biu' guxhijñ, biädnäreni loj Jesús xhidajl bejn ni yu' rebendxab lostooreni; con xtiidxni gunibeeni birii guiraa rebendxabga. Basi ajczani guiraa reben racxhuu. ¹⁷Si'c bejnmi te guzobj diidx ni bacuaa todad Isaiás, ni gunii xtidx Dios, che rájpmi:

Lagajc laani cua'ni rexcälracxhuunu, sanázani rexcälñayannu.

Reni rla jz ninajl Jesús

(Lc. 9:57-62)

¹⁸Che bahuii Jesús tre' xhidalduxh rebejn guideb gabi

cadro suga'ni, gunibeeni tednäjni rexpejn pacni stelaad ro' nis.

¹⁹Dxejcti biäd te benñajñ loj Jesús, rájpmi:

—Mastr, sisiaäza cadrotis cháalu.

²⁰Rájp Jesús lojmi:

—Rebäjz rajpreni xpiliääreni, remane' ni rutajt xhaguibaa rajpreni xpitiääzreni, niluxh narä Xi'n Dios ni gujc Niguii dina gapä cadro gaa yecä.

²¹Stee rexpejn pacni rájp lojmi:

—Dad, basaan chaxgää ladxä te chacuatzá xtaä.

²²Rájp Jesús lojmi:

—Gudanajñ narä. Basaan sugucua'tz resabengutreni rebejn nani najc si'c bengut sa'csi najc reni bendojl.

Basiacdx i Jesús te beduxh

(Mr. 4:35-41; Lc. 8:22-25)

²³Che biu' Jesús neñ barcw, biu'za rexpejn pacni lagajc nenga. ²⁴Dxejc huäjs te bedonduxh lo nisdoo.

Lirusiääzmi barcw neñ nisdoo. Luxh Jesús nagajejsni. ²⁵Dxejcti huij rexpejn pacni huicuäänni, rájpreni:

—Dad, gucnäj nuure te di guetnu.

²⁶Dxejc rájp Jesús:

—¿Xhicuent rdxejbtu, bejn ni guxii rililajz?

Dxejcti huistieni, gudidxa'ni lo bej näjza lo nisdoo, te biacdxireni.

²⁷Dxejc bidxeloduxh rexpejn pacni, rájpreni:

—¿Chuni'c najc niguiire? ¡Ahuilaa xho rucua diajg bej näjza nisdoo xtiidxni!

Rebendxab ni yu' lajdx regadarenos

(Mr. 5:1-20; Lc. 8:26-39)

²⁸Che bidzujñ Jesús stelaad nisdoo cadro najc lajdx regadarenos,

tio'p bejn ni yu' bendxab lastooreni biädchaglojreni Jesús. Rebejn ga riireni nen rebaa, nialazduxhrene, ni'cni rut rajcdi rdejd nezyujga.

²⁹Guredxa'reni räjpreni:

—¿Xhicuent siädchu'lu loonu luj ni najc Jesús Xi'n Dios? ¿La siädldu ree te gusacsílu nuure luxh gad galdi xornu, ä?

³⁰Nez te laad, zijte' cadro suga'reni, cayajp bejn xhidalro cuch. ³¹Dxejcti gunab rebendxabga loj Jesús, räjpreni:

—Palga cuäálu nuure, basaan jiu'nu nen recuchre.

³²Dxejcti räjp Jesús:

—Colchäj.

Dxejcti biriireni nen lastoo redade'ga, huichu'reni nen recuchga. Dxejcti guiragajc recuchga caguxunreni, huitejbreni ro' te guilaj, biääzreni nen nisdoo, gujttireni nen nis.

³³Rebejn ni cayajp recuchga, baxunreni, huijreni lajdxreni, huiyeireni diidx guiraa ni guzajczeni näjza ni guzajc redade' ni guyu' rebendxab lastooreni.

³⁴Dxejcti guiraa rebenguejdxga huichaglojreni Jesús. Che bahuiireni lojni, gunabduxhrene lojni, jiunejzni lajdxreni.

Basiajc Jesús te bejn nani abixu'ñ tiejxhni

(Mr. 2:1-12; Lc. 5:17-26)

9 Dxejcti biu' Jesús nen barcw. Gudejdni stelaad ro' nis te bidzujñni lajdxni. ²Ro'c biädnäreni lojni te bejn nani abixu'ñ naani, ni'ni. Naga'ni lo te da'. Che bahuii Jesús lacti rililajzreni, räjpni loj benracxhuuga:

—iBaspaa lajzlu xi'nä! Agubicaj rextojllu.

³Dxejcti gaii bennajn ni ruluu xleii Moisés cayujnreni xhigab ensilaareni, caniyaj dee Dios con rextiidxni. ⁴Dxejc gucbegajc Jesús xhi xhigab cayujnreni, dxejc räjpni lojreni:

—¿Xhicuent cayujntu xhigabgujdx nen lastootu? ⁵¿Con ni najc guyasiru? Guiniä lo te bejn: “Agubicaj rextojllu”, o guiniä lo te bejn: “Huistie, guzaj.” ⁶Dec gunä te gacbeetu Xi'n Dios ni gujc Niguui rajp yälrnibee lo guedxliujre te gudzucajni dojl.

Dxejcti räjpni loj benracxhuuga: —Huistie, cua' xta'lu, huij rolizlu.

⁷Dxejcti huistie benracxhuuga, siini rolizjni. ⁸Che bahuii rebejn lojni, bidxeloduxhrene, gulä'preni xpala'n Dios, ni badeed yälrnibeega loj rebejn.

Che gurejdx Jesús Mateo

(Mr. 2:13-17; Lc. 5:27-32)

⁹Dxejcti birii Jesús cadro basiajcti benracxhuu, sä'tini. Dxejc bahuiini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejc räjp Jesús lojni:

—Gudanajl narä.

Dxejcti huisuni, sanajlñi Jesús.

¹⁰Cheni sobga' Jesús lo mex cayajwreni roliz Mateo, biädza xhidajl rebejn nani ruquijx xcuent guiraloj, ni najc rebejn ni di gac xpen Israel, gurejzareneni lo mex näj Jesús näjza reni najc rexpejn pacni. ¹¹Che bahuii reben guidoo, ni laa refarisee, xhi cayujn Jesús, räjpreni loj rexpejn pac Jesús:

—¿Xhicuent raunäj xmastrtu rebejn nani ruquijx xcuent reyuj näjza rebejn ni di gac xpen Israel?

¹²Che biejn diaj Jesús xhi guniireni, räjpni lojreni:

—Rebejn nani nadaan dini guiquiin chu gusajcni, niluxh rebejn racxhuu ni'c rquiinreni chu gusajceni. ¹³Colchäj te colchaseed xhi säloj diidxre ni caj loj reguijtz: “Yäl_rulaslajz rlazä, dina rlazä guniidxtu guidxaa loä.” Sa'csi narä dina niädtedxä rebensa'c, narä siädtedxä rebendojl te gusiechlajzreni.

Gunabdiidxreni xcuent yäl_rucua'n

(Mr. 2:18-22; Lc. 5:33-39)

¹⁴Dxejcti biädä rexpejn_pac Juan loj Jesús räjpreni:

—Nuure con refarisee rcua'n_nu xhidäl huält, ¿xhicuent di rexpejn_paclu gucua'n, ä?

¹⁵Räjp Jesús lojreni:

—Che ruchnäa te bi'n, ¿xhixh rac_huin lajz regolnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

¹⁶Rut gundi remiend te ladbiejw con te la' ladcoob sa'csi sixu'n ladcoobga, sutiäjsruni ladbiejwga, sajc xhiroobru cadro biräjsga. ¹⁷Nicläza gac guida' bincoob neñ reguidbiejw, sa'csi reguidbiejw siräjsni dxejc sixe' bin, sinijtzä reguijdzga. Ni'cni nanab guida' bincoob neñ reguidcoobza, te si'c niclä tejreni di nit.

Xindxa'p Jairo näjza gunaa nani gudajn xhajb Jesús

(Mr. 5:21-43; Lc. 8:40-56)

¹⁸La_l ni caniini rediidxga, biädä te dade' ni rnibee neñ guidoo xten

rexpejn Israel. Bazuxhibjni nez loj Jesús räjpni:

—Entis gujt xindxa'pä. Gudaa, badzuub naalu yejcnite guibansacni.

¹⁹Dxejcti huisu Jesús, sanäni Jairo. Näj rexpejn_pacni sanajlrenini.

²⁰Luxh guyu' te gunaracxhuu nani agujc tzubitio'p ijz cayajcni yälguidxbäii. Bidzujnni nez dejtz Jesús, gudajnni ro' xhajbni, ²¹sa'csi bejnni xhigab neñ lastooni: “Palga sajc canätis ro' xhajbni, siacä.”

²²Dxejc gubiré Jesús bahuiini loj gunaaga, dxejc räjpni:

—Gulecdxilajzlu xindxa'pä.

Yäl_rililajz xtenlu abasajclu.

Luxh lagajc dxejc biaej gunaaga.

²³Cheni biu' Jesús roliz dade' nani rnibee neñ xquidoo rexpen Israel, bahuiini rebejn ni ro_l bizej näjza xhidajl rebejn ni cabedxa' cayoon, li te bieje cayajc, dxejc ²⁴räjpni loj rebejnnga:

—Colguibicaj. Nagajejstis dxa'pga, gajdni guet.

Dxejc rebejnnga alga ruxhiznäjreni Jesús. ²⁵Cheni abirii rebejn neñ yu', biu' Jesús, gunaaazni naa dxape', dxejc huistie dxape'ga. ²⁶Dxejcti bire'ch diidxga guiraa neñ reguejdx ni tre' nejzga.

Basajc Jesús tio'p lotiä'p

²⁷Che birii Jesús ro'c, huinajl tio'p bejnni nani di fii. Rbedxa'reni roonreni räjpreni:

—Balaslajz nuure, Xi'n toDavid.

²⁸Che bidzujn Jesús cadro caya'nni, gubigreni lojni. Dxejcti gunabdiidx Jesús lojreni, räjpni:

—¿La rililajztu sajc gunä ni rniabtu?

Redade'ga basejc diidx, räjpreni:

—Sajc gunluni, Dad.

²⁹Dxejcti gudajnni balojreni, räjpni:

—Sugacni si'cpacni rililajztu.

³⁰Lagajc dxejc bixal balojreni. Sas räjpjac Jesús lojreni:

—Arniä, na'c chayeitu diidxre, te rut gacbeedi xhi guzajctu.

³¹Cuantsi biriireni ro'c guslojreni cagutie'chreni diidx xcuent Jesús guideb gabi nen reguejdxga.

Basnii Jesús te gop

³²Che biriireni cadro biajc baloj rebejn̄ga, biääd sgaii bejn̄ biädnäreni te gop loj Jesús. Yu' xprit bendxab nen̄ lastoo bejn̄ga.

³³Che barilaagw Jesús xprit bendxab nen̄ lastoo bengopga, guslogajcni caniini. Rdxeloduxh rebejn̄ räjpreni:

—Gajdpacnu guihuii sa' redzuunre lajdx rexpejn̄ Israel.

³⁴Dxejc reben̄ guidoo ni najc refarisee, räjpreni:

—Rbääni rexpr̄it bendxab con yäl̄rnibee xten bendxabro.

Rulaslajz Jesús rebejn̄

³⁵Gudejd Jesús guiraa reguedxro näjza reguedxbäz, basule'ni xtidx Dios nen̄ reguidoo xten rexpejn̄ Israel. Basääbni diidx xten xcäl̄rnibee Dios. Basiajczani guiraloj yäl̄racxhuu, guiraloj yäl̄guijdx ni rajc bejn̄ nen̄ reguejdxga. ³⁶Che bahuiini loj reben̄ xhidajl biaduxhni rebejn̄ga sa'csi rdebya' lajzreni, rac-huin lajzreni, najczeni si'c najc rexii nani di ga'p baxtoor. ³⁷Dxejcti räjpni loj rexpejn̄pacni:

—Guliipac xhidalduxh ben̄ guedxliuj di gan xtidxä, luxh guxii najc reni guluiireni; najcni si'c gäj̄l ni agojl guilia', niluxh ruti mos ni guilia'ni. ³⁸Col̄nab lo Dad nani najc xtenni guedxliujre te guxhal̄ni rebejn̄ ni sajc guluii reben̄ guedxliujre, gacreni si'c mos ni rlia' gäj̄l.

Gule Jesús guitzubitio'p rexpejn̄pacni

(Mr. 3:13-19; Lc. 6:12-16)

10 Dxejcti gurejdxni guitzubitio'p rexpejn̄pacni, badeedni yäl̄rnibee lojreni te gurilaagwreni rexpr̄it bendxab lastoo bejn̄ näjza te gusiajcreni guiraloj yäl̄guijdx näjza yäl̄racxhuu.

²Laj reguitzubitio'p rexpejn̄ni ni guleni najc: Simón, ni laaza Pedr; Andrés bejtz Simón; Jacobo xi'n Zebedeo; Juan bejtz Jacobo; ³Felipe; Bartolomé; Tomás; Mateo, ni najc colectoor; Jacobo, xi'n Alfeo; Lebeo ni rniireni Tadeo; ⁴Simón, te bejn̄ ni yu' loj recananita; Judas Iscariote, nani bateed Jesús ladzn̄aa rebejn̄ nani rdxe'ch lojni.

Baxhal̄ Jesús rexpejn̄pacni gutie'chreni diidx

(Mr. 6:7-13; Lc. 9:1-6)

⁵Guitzubitio'p rebejn̄re baxhal̄ Jesús. Balijdxniren̄i räjpni: —Na'c chäätu nez cad yu' rebejn̄ ni di gumbee Dios. Na'c jiu'tu lajdx reben̄ samaritan. ⁶Col̄chäxgaa lo rexpejn̄ Israel nani agunijt nen̄ dojl. ⁷Col̄chäj, col̄zäbdiidx lo rebejn̄, colye'tz lojreni xcäl̄rnibee Dios abidzūngajxh. ⁸Col̄gusiajc ben̄ racxhuu, colgusiajc tiejxh rebejn̄

ni raḷ guejch tiejxhrenei, colguspajñ bengut. Colgurilaagw xpriṭ beṇdxab lastoo rebejñ. Ligaj cua'tu yälrnibee, ligajza colyejñ dzuun.

⁹Räjpzani:

—Na'c chanäṭu oor, niclaza pla't, niclaza coobr neñ xdobdäjltu, ¹⁰niclaza guijxh na'c chanäṭu lo nejz. Na'cza chanäṭu tio'p xhajbtu, nicla gura'ch, nicla baston sa'csi bejñ ni rujñ dzuun nungäjñ xca'ni xhi gauni.

¹¹Räjpzani:

—Che guidzujñtu xhitis te guedxro, xhitis te guedxbäz, colquiiṭ te beṇsa'c. Rolijztisni coljia'n dxejli ni jiunejzṭu guejdxga. ¹²Cheni jiu'tu neñ yu', colñii xtidx Dios lo rebejñga. ¹³Palga najcreni bejñ ni numbee Dios, sujia'n yälrbedxilajz loj rebejñga. Niluxh palga direni gac beṇsa'c, naaddireni xca'reni xtidx Dios, suguibi' yälrbedxilajzga lojtu, coljiunejz ro'c. ¹⁴Palga direni gusaan jiu'tu rolizcreni, palga di rlajzcreni gucuaadjgreni xtiidxtu, dxejc coljiunejz roliz bejñga, o coljiunejz guejdxga, dxejc colcuijñb guxhuj ni'tu si'c te seen gulälazcreni xtidx Dios. ¹⁵Rniliäpac lojtu, dxej ni gun Dios xcälguxhtisni, te yälguxhtisroru gun Dios rebejñga, quela yälguxhtis ni gujc reben guedx Sodoma näj Gomorra.

Yälrusacsí ni siääd

¹⁶Räjpzani:

—iColhuiire! Narä suxhaḷä la'tu si'c xile' nez loj reloob, ni'cni colgacnasinḍuxh si'c najc te bäl, colyajcza nadolajz si'c te palom. ¹⁷Colnatiro rebejñ sa'csi suteedcreni

la'tu ladzṇaa rexcuxhtiscreni, siguijnzareni la'tu neñ xquidooreni.

¹⁸Sinäzareni la'tu nez loj regubier, nez loj rereii xcuent rextidxä, te gusule'tu xtidxä nez lojcreni näjza nez loj rebejñ nani di gumbee Dios. ¹⁹Cheni chanärenei la'tu nez loj reguxhtis, na'c guntu xhigab xho guiniitu, niclaza guntu xhigab xhicha ni'c guiniitu, sa'csi lagajc Dios suniidx diidx guiniitu orga. ²⁰Sa'csi et la'ditu ni guinii dxejc, Sprit xten Xtadtu Dios ni yu' neñ lastootu, laani guinii neñ lastootu.

²¹Luxh rebejñ suteedcreni lagajc bejtzcreni ladzṇaa reni ju'treni. Redad suteedcreni lagajc xi'ncreni, rexi'n bejñ sidxe'chzareni lo xcuzajncrcni te ju't bejñ xcuzajncrcni. ²²Guiraa rebejñ guedxliuj sidxe'chcreni lojtu xcuent xtidxä. Nani chanuu lo xtidxä dxej lultli, ni'c sujñ gaan yälñabajñ par tejpas. ²³Che guirinajlcreni la'tu te gusacsireni la'tu neñ te guejdx, colguxun ro'c, colchäj stee guejdx. Rniliä lojtu, ditu gun gaan tedtu guiraa reguejdx xten rexepejñ Israel ansde jiiääd Xi'n Dios ni gujc Niguii.

²⁴'Di te bejñ ni casieedgaj beñroru lo xmastrni, diza te mos gac beñroru lo xlamni. ²⁵Te bejñ ni casieed, rsieedruni te gacni si'c najc xmastrni, sigajcza rujñ mos, riuni xtidx xlamni te gacni si'c najc xlamni. Palga rbälajcreni Beelzebú nani rnibee beṇdxab, çxho direni cuälajza Beelzebú rexi'nni, ä?

Chuni'c nanab guidxejbni

(Lc. 12:2-9)

²⁶Räjpzani:

—Ni'cni na'c guidxejbṭu rebejñ, sa'csi anajntu xheti te cos ni

niäuu lojni ni di guidzujñ dxej guixal lojni, te fii chutis bejn lojni. Xhetiza te cos xhiga'tzdi ni di guidzujñ dxej siejn diajg bejn xcuentni. ²⁷Diidx nani rniä lojtu guxhijñ, colguiniini che nianij lo guedxliuj. Rediidx nani rniä chigaj rodiajgtu, colguiniini dip, jiaali colzuj, guredxa' te jiejni. ²⁸Na'c guidxejbtu renani rugu't bejn, sa'csi direni gun gaan ju'treni xaim bejn. Colguidxejbru nani rugu't tiehx bejn näjza xaim bejn neñ gabijl.

²⁹'¿La di bejn guto'p tio'p manbáz ni rutajt por te centaab, ä? Luxh racbee Xtadnu ni yu' xhaguibaa che riajb tejni lo yuj. ³⁰Näjza rexquidxejclu nagab tebgajreni. ³¹Ni'cni rniä na'c guidxejbtu; sajcrutu lo te chinaa manbáz ni rutajt.

Renani rusule' xtidx Jesucrist nez loj rebejn

(Lc. 12:8-9)

³²Räjpzani:

—Chutis renani rusule' xtidxä nez loj rebejn, narä siniäza xcuentni nez loj xtadä ni yu' xhaguibaa.

³³Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtadä ni yu' xhaguibaa.

Rlia' Jesús sa' bejn

(Lc. 12:51-53; 14:26-27)

³⁴Räjpzani:

—Na'c guntu xhigab siädnää yälrbedxilajz lo reben guedxliujre, xhet yälcuedxidi ni siädnää, yälrdxagdijl siädnää. ³⁵Narä siädnää yälrdxagdijl te bi'n con xtadni; te dxa'p con xnanni; te gulijzni

con xnansueegrni. ³⁶Ni'cni lagajc resa'tu ni yu' rolijztu sidxe'chreni lojtu.

³⁷'Nani sanälajzru xtadni, xnanni, luxh narä dini chanälajz, digacdi gacni xpeñä; nani sanälajzru xingaanni o xindxapni, di gacdiza gacni xpeñä. ³⁸Nani di guu xcruzjni, nalajznu tedni trabajw, jiädnajlni narä, di gacdi gacni xpeñä. ³⁹Nani guidxäl xcälñabajñni lo guedxliujre, sunitni yälñabajñ xhaguibaa. Luxh nani gunijt xcälñabajñni lo guedxliujre xcuent rextidxä, sidxälñi yälñabansa'c xhaguibaa.

Gaan nani xca'ni

(Mr. 9:41)

⁴⁰Räjpzani:

—Nani guniidx rolijzni jia'ntu, runiidxzani rolijzni jia'nä; luxh nani ruscuääz narä rolijzni, rolijzni ruscuääzzani Gueb Dios nani baxhañ narä. ⁴¹Nani guscuääz te niguii ni rnii xtidx Dios rolijzni sa'csi baxhañ Dios niguiiga, sica'za bejnga lagajc gaan ni xca' niguii ni rnii xtidx Dios. Nani guscuääz te bensa'c rolijzni sa'csi bensa'cni, sica'zani lagajc gaan ni xca' bensa'cga. ⁴²Chutis nani gudeed mase te xhijgtis nis niäluij xcuentä lo rebixue're, rniliápac lojtu, direni gunijt, sica'pacreni nani nungäjñ xca'reni.

Renani baxhañ Juan Bautist loj Jesús

(Lc. 7:18-35)

11 Che gulujx baluii Jesús rexpejn pacni xho gunreni dzuun, dxejcti biriini ro'c te saluiini, chasule'ni diidx lajdx rexpejn pacni.

²Juan yu' neñ latzguiib. Che biejn diajgni xhi cayujñ Jesús,

baxhalni tio'p xpejn pacni ³te huinabdiidxreni:

—¿La luj ni najc Crist ni jiaäd, ä?, o ¿la silääznu chu stee bejn?

⁴Dxejcti badzu' Jesús diidxre räjpni:

—Colchäj, colye'tz loj Juan recos nani riejn diajtu, näjza recos nani ruhuiitu. ⁵Reni di fii, ruhuiireni; reni di sa, arsiäjreni, reni rał tiejxhni, abiajc tiejxhreni; reni di jien diajg, ariejn diajgreni; rebengut, ahuäjzreni, gubansacreni. Dxejcti loj rebejn proob nani cabäjz xcälracnäj Dios cagusule'reni xtidx Dios ni ruslaa bejn nen dojl.

⁶Chicbaa renani di jieed narä.

⁷Cheni sii rebejnga gusloj Jesús canii loj rebejn xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej, ä? ⁸¿Xhini'c huihuiitu? ¿Te bejn ni sucheduxh, ä? Ni najntu rebejn nani sucheduxh rbäjzreni rolizj rereii. ⁹La'tu ¿xhicuent huijtu ro'c? ¿Te fiitu te niguii ni rnii xtidx Dios, ä? O'n. Rniliä lojtu, luxh dini gac bejntis ni rnii xtidx Dios; benrurunii.

¹⁰Laa Juan nani rusä't ni bacuaa lo reguijtz cadre caj scree:

Narä suxhalä te niguii nani guinii xtidxä nez lojlu;

laani susucheeni nezyuj nezlojlu.

¹¹Guliipac rniä, loj guiraa rexingaan xten gunaa, nicla tejni gajd guiricaj ni najc te bensacduxh loj Dios si'c ni najc Juan Bautist. Niluxh bejn nani najc ben huinru lo xcälrnibee Dios xhaguibaa, bejnga maazru sajcnii loj Juan.

¹²Cheni gucli dxej ni gusloj rusule' Juan Bautist diidx najli, yu'duxh reni rlaizpac jiu'reni lo

xcälrnibee Dios ni yu' xhaguibaa con yälrdxe'ch, sas reni nadxecha' rlaizreni cuäxuuni xcälrnibee Dios. ¹³Guiraa reniguii ni gunni xtidx Dios näjza xleii Moisés, gunixgaareni recos ni churu gac, galooli hasta che biäädli Juan Bautist. ¹⁴Palga rlaiztu chalilajztu, lagajc Juan najc Elías, niguii xten Dios nani bia'n diidx jiaäd. ¹⁵Nani sobdiajg diidx, gucuadiajgni.

¹⁶¿Xhicojn guntebloä rebejn nani tre' naj, ä? Najcreni si'c najc rebiuux nani rguijt nez lo guii cadre rdo', rbejdxreni lo sa'reni, ¹⁷rniireni: “Bielnu bizej te guya'tu luxh ditu nuya'. Dxejcti bielnu redij ni nabaduxh luxh dizatu nioon.” ¹⁸Sa'csi che biääd Juan dini najw dizani niä', luxh räjp rebejn najcnii te xpejn bendxab. ¹⁹Dxejcti biälä narä, Xi'n Dios ni gujc Niguii, rauä, rä'ä dxejcti räjp rebejn: “Niguiire rauxha't, rätezani bin, najcnii xamigw rebendojl näjza reniguii ni ruquijx xcuent reyuj ni rajx lo gubier.” Luxh loj rebejn ni najc xpejn Dios yuduxh xcälrajn Dios, ni'cni baxhalni guiro'p rebejnre.

Reguejdx gualajz

(Lc. 10:13-15)

²⁰Dxejcti gusloj Jesús gudilnäjni rebenguejdx cadre benduxhni remilaagwr, sa'csi naaddireni gusiechlajzreni xtojlreni, sanuutis nabajreni nen dojl. Dxejcti räjpni:

²¹—iGunatiru guedx Corazín! iGunatiro guedx Betsaida! Paru nen guedx Tiro näjza guedx Sidón najc remilaagwr nani gujc guedx lajdxtu, cadxejli nusiejch lajzreni xtojlreni, cadxejli najcwreni nen

godx, nidääb cobdäj yejcreni. ²²Luxh rniä lojtu: che guidzujñ dxej ni gun Dios xcälguixhtisni, sidejdrutu castiigw loj rebejn ni guläjz guedx Tiro näjza guedx Sidón. ²³Luj guedx Capernaum di gunlu xhigab chäslu xhaguibaa; jiäjt neñ baa jiajblu, sa'csi paru neñ guedx Sodoma niac sa' remilaagwr nani gujc guedxlajdxlu, pet najli tresijc guejdxga. ²⁴Luxh rniä lojtu, dxej ni gun Dios xcälguixhtisni, trabajwduxhru tedtu loj rebejn Sodoma.

Coltaa loä, te gusilajztu

(Lc. 10:21-22)

²⁵Laa dxejcni räjp Jesús:

—Rliä'pä xpala'nlu Xtadä, Dad xten xhaguibaa näjza guedxliuj, sa'csi bacua'tzlu recosre lo rebennajn, lo rebejn ni racbee, te baluiiluni loj rebennadolajz ni najc si'c biuxbäz. ²⁶O'n. Guliini, Xtadä, sa'csi rujnlu xhigab si'c najc hueen gacni.

²⁷Guiraa recosre abaniidx Xtadä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, näjza loj renani gudeed xingaanni gumbee xtadni.

²⁸Coltaa loä guiraatu nani abadxajg, nani rsina', narä sunidxä yälrusilajz lojtu. ²⁹Colguiseed guntu dzuun si'cni ruluiätu. Colhuii xho runä, xho nacä nadolajz, dizana gacä bennayedxlajz neñ lastoä, ni'cni sidxäl xaimtu yälrusilajz. ³⁰Sa'csi guyasi najc xtzunä ni ruluiätu, dizani gac naganduxh.

Rutie' rexpejn Jesús triuu dxej ni rusilajzreni

(Mr. 2:23-28; Lc. 6:1-5)

12 Che sasaj Jesús nez loj reyuj cadre naga' triuu,

luxh dxejga najc dxej ni rusilajz rexpejn Israel, calaan rexpejnpacni, guslojreni calädxa'reni doj lo triuu te cayajwrenini. ²Che bahuii reben guidoo ni laa farisee, räjpreni loj Jesús:

—Ahuii xho rujn rexpejnpaclu dzuun nani di nungäjñ gunreni dxej nani rusilajz bejn.

³Luxh laani räjpni lojreni:

—¿La gajdtu goñ xhi caj loj reguijtz xcuent ni bejn toDavid che gulannäjni rexpejnñi, ä? ⁴Biu'reni xquidoo Dios, gudajwreni yätxtiil nani di nungäjñ gauni, nicla laani, niclaza rebejn nani sanäni, sa'csi yätxtiilga rebixhojzti rajwni. ⁵O ¿la gajdtu goñ lo reguijtz xten leii cadre caj xcuent rebixhojz, ä? Laareni riu'reni neñ reguidoo dxej ni rusilajz bejn, rujnreni xtzunreni niluxh xhet dojldi rujnreni. ⁶Narä rniä lojtu, ree suga' tej nani sajru loj guidooga. ⁷Paru niacbeetu xhi säloj dee: “Yälruulaslajz rlazä, xhet yälrejtdi guidxaa”, ditu nucuaquij redee ni xhet bejndi. ⁸Sa'csi narä Xi'n Dios ni gujc Niguii rnibeä dxej ni rusilajz rebejn.

Niguii ni rxu'n naani

(Mr. 3:1-6; Lc. 6:6-11)

⁹Che birii Jesús ro'c, biu'ni te xquidobäzreni. ¹⁰Ro'c suga' te bejn ni gubijdz te naani. Luxh sa'csi caguiilreni xho gucuaquijreni Jesús, gusloj canabdiidxreni lojni, räjpreni: —¿La rusaan leii gusiajnci

benracxhuu dxej ni rusilajz bejn, ä?

¹¹Badzu! Jesús diidxre lojreni, räjpni:

—Chutejtu ni rajp te xiil niluxh palga guitejbni neñ bisie che

gal dxej ni rusilajz bejn, ¿xhixh dini cuää xiilga nen bisie, ä?

¹²Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

¹³Dxejcti räjpni loj dade'ga:

—Baslii ñaalu.

Che basliinini, dxejc biajc ñaani, gujcnit tebloj si'c najc stelaad ñaani.

¹⁴Dxejcti birii reben guidoo ni laa farisee, bachagsa'zareni te bia'nreni diidx ju'treni Jesús.

Diidx ni guniireni xcuent Jesús

¹⁵Che gucbee Jesús xhi xhigab cayujnreni, biriini ro'c. Xhidajl bejn sanajlni, dxejc basiajc Jesús guiraa rebenracxhuu. ¹⁶Dxejc räjpni lojreni:

—Na'cpac gäbreni chu najcni.

¹⁷Si'c gujc te gusojb diidx ni gunii Isafas ni gunii xtidx Dios che räjpni:

¹⁸Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.

¹⁹Dini tilnäjä bejn, dizani cuedxa'; rudza jiejni diajgni xse'ni lad nezyuj.

²⁰Dini qui'ch nicla te nijt ni cabiejc, dizani gusuii te duxiil ni cayujn guxh, dxejli che gunni gaan guinibeeni yälguxhtis.

²¹Lajtisni sustioob lastoo reben ni digac xpejn Israel.

Rucuaquijreni Jesús rajpni yälrnibee xten bendxab

(Mr. 3:19-30; Lc. 11:14-23; 12:10)

²²Dxejcti biädnäreni loj Jesús te bejn ni di fii, dizani guinii,

yu' te bendxab lastooni. Dxejcti basiajc Jesúsni, te gujc guniini, te gujca bahuiini. ²³Guiraa rebejn bidxelojreni, räjpreni:

—¿Xhaa laa Xi'n toDavidni, ä?

²⁴Che biejn diajg reben guidoo ni laa farisee rediidxga, räjpreni:

—Bejnre rbää rebendxab con yälrnibee xten Beelzebú ni rnibee loj rebendxab.

²⁵Che gucbee Jesús xhi xhigab cayujnreni, dxejc räjpni:

—Guiraa yälrnibee nani rlia' sa'ni sinitloj; te guedxro sigajc te famil nani rlia' sa'reni, nani ridiInäjä sa'reni, sinitlojreni. ²⁶Sigajca palga bendxab rbää sabendxabni, silia' sa'reni, dxejc ¿xho gac chanuu xcälrnibeeni? ²⁷Palga narä rbää rebendxab con yälrnibee xten Beelzebú, ¿chu xcälrnibee rajc rbää rexpejntu bendxab, ä? Ni'cni lagajc laareni suluiireni xhet laadi rujntu xhigab. ²⁸Palga narä rbää rebendxab con Xpirt xten Dios, guliipacni abidzujn xcälrnibee Dios lojtu.

²⁹'Bahuilaare. ¿Xho gac jiu' te bejn cuan rolijz te bendaan, xho gac cuanni xhixten bejnga, palga dini gulibxgaani bendaanga? Che abilib bejnga, sajc cuanni rexhixten bejnga.

³⁰'Nani xhet yu'di xladä, rdxe'chni loä. Nani di jiadnajl narä, rutie'chni reni siädnajl narä.

³¹'Ni'cni rniä guira'ti dojl, guira'ti yälrusguee xte bejn sajc gusiäjł lajzni xtebtis yälrnijaj Sprit Dxan xten Dios di Dios gusiäjł lajzni.

³²Chutis ni guinii xhi te diidx yälrnijaj Xi'n Dios ni gujc Niguii sajc gusiäjł lajzni, luxh chutis

ni guiniyaj Sprit Dxan xten Dios, di Dios gusiäjl lajzni, nicla lo guedxliujre, ni claza xhaguibaa.

Sajc gumbeetu bejn xcuent diidx ni rniireni

(Lc. 6:43-45)

³³Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni. ³⁴Sa' la'tu benguijdx ni najc si'c te bäl niälasduxh, ¿xho gac guiniitu te didxa'c?, ni ro' bejn rniitis rexhigab ni yu' neñ lastoo bejn. ³⁵Te bensa'c rniini didxa'c, sa'csi ganax xhigabsa'c yu' neñ lastooni, te benguijdx rniitisni cosguijdx sa'csi ganax xhigabguijdx yu' neñ lastooni. ³⁶Narä rniäza, guiraa redidxguijdx nani rni bejn sudeedreni cuent lo Dios cheni gunni yälguxhtis, ³⁷sa'csi lagajc rextiidxlu sujn guinii Dios najclu bensa'c, lagajc rextiidxlu sujn gunijtlu lo Dios.

Rebenguijdx rniab te milagwr si'c te seen

(Mr. 8:12; Lc. 11:29-32)

³⁸Dxejcti rebejn ni rului xleii toMoisés näjza reben guidoo ni laa farisee, räjpreni loj Jesús:

—Mastr, nuurnu rlanjnu guihuiinu te seen; bejn te milagwr te fiinuni.

³⁹Badzu' Jesús diidxre, räjpni:

—Rebenguijdx ni rusguee rniab te seen, niluxh xhetru seendi fiireni xseentis Jonás, dade' ni gunii xtidx Dios. ⁴⁰Sa'csi lagajc si'cni guyu' Jonás xque' te bälro choñ dxej, choñ yääl, si'cza chu

Xi'n Dios ni gujc Niguii neñ lastoo guedxliuj choñ dxej, choñza yääl. ⁴¹Cheni gac yälguxhtis xten Dios pet sistie rebejn ni siääd Nínive te fiireni gac yälguxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi reben Nínive basiejch lajzreni, bia xtojlrēni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás. ⁴²Näjza reñ xten reben sur sistieni te fiini gac yälguxhtis rebejn ni tre' lo guedxliujre naj, niluxh näjzani säjbni abanijtreni. Sa'csi laani zitduxh biriini te biädcuadiajgni reyäl najn xten Salomón, luxh nani yu' lojtu naj nanduxhruni loj Salomón.

Te spritdxuudx ni rbisac

(Lc. 11:24-26)

⁴³Räjpzani:

—Cheni rii te spritdxab neñ lastoo te bejn, ricanzajni nez lo reyubijdz, ritiilni cadro gusilajzni, per cad rdxäldini. ⁴⁴Dxejcti rujnni xhigab, naani, guibisacä cadro biriä. Cheni rbisacni ro'c, rdzujnni si'c rdzujn te bejn neñ te yu' ni naya neñni, naliobsa'cni, sucheeni, luxh rut rbäjzdi ro'c. ⁴⁵Dxejcti rijni, rixiini sgajdz sprit nani najc nadxuudxru lojni te jädlänäjrenini neñ lastoo bejnga. Dxejcti rxhinduxhru bejnga lojni gujci galoo. Sigajcza gac rebejn ni tre' lo guedxliujre naj.

Xnan Jesús con rebejtzni

(Mr. 3:31-35; Lc. 8:19-21)

⁴⁶La! ni caninäjni rebejn, bidzujn xnanni con rebejtzni, suga'reni rolä' rlanjreni guiniireni lojni. ⁴⁷Dxejcti biääd tej ni räjp loj Jesús:

—Xnanlu nájza rebejtzlu suga' rolá' rlanjreni guininájreni luj.

⁴⁸Laani badzu'ni diidx lo bejn̄ga rájpn̄i:

—¿Chuni'c najc xnaná? ¿Chuni'c najc rebetzá?

⁴⁹Dxejcti basgaani n̄aani nez loj rexejnpacni, rájpn̄i:

—iRedee najc xnaná redeeza najc rebetzá! ⁵⁰Chutis nani rujn̄ si'cni rnibee Xtadá ni yu' xhaguibaa ni'c najc betzá, ni'c najc bisianá, ni'cza najc xnaná.

Xcuent bejn̄ nani rbe'c binij

(Mr. 4:1-9; Lc. 8:4-8)

13 Lagajc dxejga birii Jesús royu'ga, huicueni nez ro' nisdoo. ²Xhidalduxh bejn̄ bire' cadro suga'ni, sas biu'ni nen̄ te barcw, ro'c gurejni. Dxejcti rebejn̄ gurej nez lo plaii. ³Dxejc gusloj cagului Jesús con recuent, rájpn̄i: —Colcuadijg. Birii te dade' ni rbe'c binij te cue'cni binij. ⁴Lał̄ ni cabe'cni binij yu' binij ni bitejb gajxh nez ro' nesiuj, biáád remane' ni rutajt, sas gudajwreni binijga. ⁵Yu' binij ni bitejb nez nen̄ reguij cadro guxii yu' yuj. Gulengajc binijga sa'csi direni nibej jiät nen̄ yuj. ⁶Che birii gubijdx, bigol̄reni sa'csi xhetiza xlobaani, dxejc gubijdzni. ⁷Yu'za binij ni bitejb nen̄ reguejch. Che guroob reguejchga, dini nusaan niroob regáje!, gubijdztreni. ⁸Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojn̄ni, yu'za ni cuaj galbitzuuni loj cade tej binij ni gurej. ⁹Nani rsobdiajg diidx gucuardiajgni diidxre.

Xhi pajr najc recuent xten Jesús

(Mr. 4:10-12; Lc. 8:9-10)

¹⁰Dxejcti gubig rexejnpacni, gunabdiidx lojni, rájpn̄i:

—¿Xhicuent rusule'lu diidx loj rebejn̄ con recuent?

¹¹Dxejcti badzu' Jesús diidx rájpn̄i lojreni:

—Sacnáj Dios la'tu te gacbeetu recos xhiga'tz xten xcálrnibee Dios xhaguibaa, luxh laareni digacdi gacbeereni. ¹²Chutis ni arajp yálracbee, sica'runi te gapruni yálracbee. Sas nani guxii rajp yálracbee, guiraa yálracbee ni rájpn̄i sibicaj. ¹³Ni'cni rniä lojreni con recuent sa'csi mase cadxelojreni, direni fii, mase cacuadijgreni di diajgreni jiejn, xhet racbeedireni. ¹⁴Laareni najcreni si'c te soob diidx ni gunii Isafás, dade' ni gunii xtidx Dios, che rájpn̄i:

Siejn diajgpactu, niluxh xhetliidi gacbeetu, sidxelojpacu, niluxh ditu fii.

¹⁵Sa'csi guyalajz rebejn̄re, lastooreni najc si'c te guij, di diajgreni jiejn, luxh niäuzá balojreni, didi fisa'creni con balojreni, didi jiejnza diajgreni, didi gacbeeza lastooreni, didi gusiejch lajzreni guibi'reni loä te gusiácä lastooreni.

¹⁶La'tu colguibalaznáj balojtu sa'csi rhuisa'ctu, riensa'cza diajgtu. ¹⁷Rniliápac, xhidajl redade' ni gunii xtidx Dios, nájza xhidajl bensa'c rlazduxh nuhii sa' recos ni cahuiitu, luxh direni nuhuiini, rlanjreni niejn diajgreni sa' rediidx nani cayejn diajgtu, luxh di diajgreni niejn̄ni.

**Rusule' Jesús xcuent bejn ni rbe'c
binij**

(Mr. 4:13-20; Lc. 8:11-15)

¹⁸Colcuadiajg xhi säloj xcuent bejn nani rbe'c binij. ¹⁹Rebejn nani rucuadiajg diidx xten xcälrnibee Dios, niluxh direni gacbeeni, najcreni si'c najc binij nani bitejb nez ro' nesyuj; riääd bejdxab rudzucajni rediidx nani biu' nen lastooni. ²⁰Rebinij nani bitejb nez nen reguij, najc si'c rebejn nani rucuadiajg diidx, gustli rca'reni diidxga, ²¹luxh guxii yu' xlobaani, direni sutijp. Che rdejdre ni trabajw, che rdxe'ch bejn lojreni, sa'csi rucuadiajgreni xtidx Dios, rusiejch lajzreni, rbälazni diidxga. ²²Rebinij nani gurej nen reyaguejch säloj rebejn nani rucuadiajg rextidx Dios rujnrureni te gunreni dzuun te ga'preni yäl'nasa'c ni yu' lo guedxliujre. Dxejcti rexcäl'nasa'c xten guedxliujre rusgueereni. Guiraa recosre rutau lo xtidx Dios nen lastoo rebejnre, dini gusaan gac te cosechsa'c nen lastoo rebejnre. ²³Dxejc rebinij nani rtejb lo reyusa'c, ni'c najc si'c rebejn nani rucuadiajg xtidx Dios, nani racbee diidxga, nani rutie'ru sa'reni te racxhidajlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojn; yu'za bejn ni najc si'c binij ni gujc galbitzuu.

Xcuent triuu cadre guyu' cuanguejch

²⁴Dxejc bij Jesús stee cuent, räjpni:
—Xcälrnibee Dios xhaguibaa najc si'c te bejn nani gule'c

ganax triusa'c lo xyujni. ²⁵Lal nagaguejs bejnga, biääd te bejn nani rdxe'ch lajz loj xpaxhuaan binijga, biädle'cni bedz cuanguejch lo xtriuu bejnga, dxejcti sääni. ²⁶Cheni gulejn triuuga, birii doj lojni, dxejc biricaj näjza cuanguejch ro'c. ²⁷Dxejcti räjp remos lo xlamreni; “Dad, ¿la et ganax triusa'c di gule'clu, ä? ¿Caxh bazaj cuanguejchre?” ²⁸Räjp xlamreni: “Te bejn ni rdxechlajz loä biädle'cchani.” Dxejcti gunabdiidx rexmosni räjpreni: “¿La rlajz guejblu cholädxanu recuanguejchga, ä?” ²⁹Dxejc räjp xlamreni: “Na'c, sa'csi che guiliäädxtu cuanguejchga, nägajcza triuu guiliäädxtu. ³⁰Colsaan tioobreni tebloj. Che guire' cose'ch, dxejc guinibea remos gutiexgaareni cuanguejch, guliibrenini gacni ters, dxejcti checni. Dxejcti sajc gutie'reni triuu chucheeni nen yu'.”

Xcuent bedz muxhtas

(Mr. 4:30-32; Lc. 13:18-19)

³¹Bijza Jesús stee cuent räjpni:
—Xcälrnibee Dios xhaguibaa najcni si'c te bedz muxhtas nani cue'c te bejn lo xyujni. ³²Gulii bejdzga najc bäze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riääd remane' ni rutajt riädyujn xpitiäazreni lo xajcw yajgga.

Xcuent levaduur

(Lc. 13:20-21)

³³Bijzani stee cuentre, räjpni:
—Xcälrnibee Dios xhaguibaa najc si'c levaduur nani rugu'ch te gunaa

lo chon mediid arin, dxejc ni'c
rusaguijni guideb cojbga.

**Xhicuent baluii Jesús ganaxtis con
cuent**

(Mr. 4:33-34)

³⁴Baluii Jesús guiraa rebejn
ganaxtis con recuent, xhetiru stee
mood nuluini, ganaxtis con cuent
guniini lojreni. ³⁵Si'c bejni te
guzojb xtidx dade' ni gunii xtidx
Dios che bacuaani lo reguijtz,
räjpni:

Suiyä diidx con recuent,
suiyä diidx xcuent recos ni
naga'tz che bencheeli Dios
guedxliuj.

**Rusule' Jesús xcuent
cuanguejch nen triuu**

³⁶Dxejcti basadiidx Jesús
rebejn, biu'tini nen yu' cadre bire'
rexpejn pacni lojni, räjpreni lojni:
—Basule' loonu xcuent cuanguejch
ni guyu' loniaa.

³⁷Räjp Jesús lojreni:
—Bejn nani rbe'c retriusa'c, najc
Xi'n Dios ni gujc Niguii; ³⁸loniaaga
najc guedxliuj; retriusa'c najc
rebejn nani najc xpejn Dios, nani
rucuadiajg xtiidxni; recuanguejchga
najc rebejn ni najc xpejn bendxab.
³⁹Bejn nani rdxe'ch lajz najc lagajc
bendxab. Cose'ch säloj che nitloj
guedxliuj; reni gutie' cose'ch
najc rexangl Dios. ⁴⁰Sigacni
guire' recuanguejch te chääni
lo guiboo te checni, sigajcza gac
che gac fis guedxliuj. ⁴¹Xi'n Dios
ni gujc Niguii suxhal rexanglni
te jäädgutie'reni, te jäädlääreni lo
xcälrnibeeni guiraa renani rujn
riajb bejn nen dojl, näjza reni rujn

cosguijdx. ⁴²Susälreni rebejn ga
nen te or cadre cayecduxh. Ro'c
sonduxhreni, sauya'reni läjyreni.
⁴³Dxejcti rebensa'c sidimbicha'reni
si'c gubijdx lo xcälrnibee Xtadreni.
Palga sobdiajgtu, colgucuadiagsa'c.

Te cossacduxh ni naga'tz

⁴⁴Räjpzani:
—Si'cza xcälrnibee Dios xhaguibaa
najc si'c te cossacduxh ni naga'tz
lo te yuj loniaa. Bidxäl te dade'ni,
luxh bacuatzsacnini. Dxejcti
rbalajzni, huijni, huito'ni guiraa
xhixtenni te räjpni meel siini yujga.

Perl nani sacduxh

⁴⁵Räjpzani:
—Xcälrnibee Dios xhaguibaa najcza
si'c najc te dad rapduxh nani caguuil
perlsa'c te siini. ⁴⁶Che bidxälni
te perlsa'c, tejni sacduxh, bato'ni
guiraa xhixtenni te gusiini perлга.

Guijxh ni rniaaz bäjl

⁴⁷Räjpzani:
—Xcälrnibee Dios xhaguibaa najcza
si'c te guiexh ni rusäl bejn lo nis te
rniaazreni guiraloj cuaa bäjl. ⁴⁸Cheni
agudxajni, rbäärenini nez ro' nisdoo,
te ro'c rbereni loj rebäjl. Rebäjl ni
najc hueen rucheeni nen te dixim;
nani di gac hueen rusälrenini te laad.
⁴⁹Si'cza gac che gac fis guedxliuj;
sirii rexangl Dios te sudzucajreni
rebenguijdx lo rebensa'c. ⁵⁰Dxejcti
susälreni rebenguijdx nen te or
cadre cayecduxh; ro'c sonduxhreni,
sauya'reni läjyreni.

Te ben rajp

⁵¹Dxejcti gunabdiidx Jesús lojreni,
räjpni:

—¿La racbeetu guiraa ni caniä lojtu, ä?

Dxejcti räjpreni:

—O', racbeenuni Dad.

⁵²Dxejcti räjpni lojreni:

—Cheni rsieed te bejn nani najn leii xcuent yäl̄r̄nibee xten Dios xhaguibaa, najcni si'c te lam nani rajc rbää lo rexcäl̄nasa'cni recos ni nacoob, näjza recos biejw.

Jesús lo guedx Nazare't

(Mr. 6:1-6; Lc. 4:16-30)

⁵³Che gulujx basule'ni recuente, biriini ro'c, sääni. ⁵⁴Huijni lagajc lajdxni. Ro'c gusloj caguluiini neñ xquidobäzreni ro'c. Dxejcti rdxeloduxh reben ro'c, räjpreni:

—¿Caro bisieedni reyäl̄najnre? ¿Xho rajc rujnni remilagwr? ⁵⁵¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacoob, José, Simón con Judas. ⁵⁶Luxh rebisiajn̄ni rbäjzreni lo guejdxre. ¿Cacharo bisieedni guiraa nani caguluiini?

⁵⁷Dxejcti cayujnreni xhigab chugan la guliini, dxejc räjp Jesús lojreni:

—Guiraa rebejn̄ rinälajz te niguii nani rñii xtidx Dios, biädla reben lajdxpacni direni jiu xtiidxni.

⁵⁸Ni'c dini niujn xhidal milagwr ro'c sa'csi direni chalilajz xtiidxni.

Che gujt Juan Bautist

(Mr. 6:14-29; Lc. 9:7-9)

14 Lagajc neñ redxejga Herodes, ni laaza tetrarca, biejn diajn̄ni diidx xcuent ni cayujn Jesús. ²Dxejc räjpni lo rexmosni:

—Dee najc Juan Bautist. Pet agubansacni lo rebeñgut, ni'cni

rajpni yäl̄r̄nibee te rujnni remilagwr.

³Si'c gunii Herodes sa'csi laani basäuuni Juan neñ latzguiib. Niluxh gunibeeni biliibni con caden̄ neñ latzguiib xcuent Herodías, ni gujc chääł bejtzni Felipe. ⁴Bidxe'chni sa'csi räjp Juan lo Herodes:

—Et laadi rujnlu rbäznäjlu chääł bejtzlu.

⁵Rlajz Herodes nugu'tni Juan, luxh rdxejbni rebeñguejdx, sa'csi guiraareni rñiireni Juan najc te niguii ni rñii xtidx Dios. ⁶Dxejc che gojl laj Herodes gujc lanij, birii xindx'a'p Herodías te baya'ni nez loj regolnejdx. Luxh sa'csi bidxaglazduxh Herodes baya'ni, ⁷räjpni loj gunaaga:

—Gunab xhitis ni rlajzlu, sa'csi gudix lazä gunidxä ni guiniabtislu.

⁸Dxejcti gunaaga, abalijdx xnannini, räjpni lo Herodes:

—Loj te platón̄ baniidx bitiuuyejc Juan Bautist.

⁹Diidxga benhuin lastoo reii Herodes, per sa'csi abia'n diidx, niluxh abiejn diajg rebejn̄, gunibeeni gudeedreni nani guiniab gunaaga. ¹⁰Dxejcti gunibeeni biru' yejc Juan Bautist neñ latzguiib. ¹¹Sas biädnäreni yejcn̄i lo te platón̄, badeedrenini loj gunaaga. Dxejcti gunaaga badeednini lo xnanni.

¹²Dxejcti bidzujn̄ rexpejn̄ Juan sanäreni togoolga te huicua'tzrenini. Dxejcru huisa'nreni diidx loj Jesús.

Bayaan Jesús gaii mił bejn

(Mr. 6:30-44; Lc. 9:10-17; Jn.6 :1-14)

¹³Che biejn diajg Jesús xhi guzajc Juan, xtebni huä'pni neñ

te barcw huijni stee laad nez lo reyubijdz. Che gucbee rebejn caro sääni, huinajlreni Jesús lo yuj. Guiraa nen reguejdxga biriireni.

¹⁴Che birii Jesús nen barcw, bahuiini loj xhidalduxh bejn, dxejc balazlajznireni, basiajnci rebejn nani racxhuu. ¹⁵Cheni acayu' guxhijn, gubig rexejnpacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejn te jiireni nez rerench te chasiireni xhi gaureni.

¹⁶Räjp Jesús:

—Xhicuent jiireni. La'tu colgudeed xhi gaureni.

¹⁷Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjł rajpnu.

¹⁸Laani räjpni:

—Coltanäni ree.

¹⁹Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjł, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexejnpacni. Dxejcti rexejnpacni gudisrenini loj reben xhidajł.

²⁰Guiraareni gudajw, gudxaj xque'reni. Dxejcti batie'reni yätxtilbiujy nani bia'n. Si'cti tzubitio'p dxijm gudxajni. ²¹Renani gudajw najcreni si'cti gaii mil niguii, xhet näjdi regunaa niclaza rebiuux bigab.

Gusaj Jesús lo nisdoo

(Mr. 6:45-52; Jn. 6:16-21)

²²Sas gunibee Jesús biu' rexejnpacni nen barcw te ganidreni tedreni stee lad nis lałni

casadiidxni rebejn. ²³Che gulujx basadiidxni rebejn, huä'p Jesús yecdajn te xtebni guninäjni Dios Xtadni. Che gojł guxhijn, ro'c sugaxteb Jesús. ²⁴Luxh barcw galäii lo nis sasaj. Cagusnibduxh reol barcw, liriääzni lo nis sa'csi cabi' beduxh cadre sääreni.

²⁵Rsildooru gubig Jesús, bidzujnni lojreni, siädsajni lo nisdoo. ²⁶Che bahuii rexejnpacni siädsajni lo nisdoo, bidxejbreni, räjpreni:

—Colhuii te fantasmni — guredxa'reni sa'csi bidxebeduxh'reni.

²⁷Dxejc gunii Jesús lojreni, räjpni: —Na'c guidxejbtu, laa naräni; colsutijp lastootu.

²⁸Dxejcti gunii Pedr lojni, räjpni: —Dad, palga lujni, gunibee jiälä lojlu nez lo nisre.

²⁹Räjp Jesús:

—Gudaa pues.

Dxejcti birii Pedr nen barcw gusajni lo nis te sääni nez loj Jesús.

³⁰Che bahuii Pedr beduxh ni cabi', bidxejbni, dxejc gusloj cayääzni nen nisdoo. Guredxa'ni, räjpni:

—Dad, igulää narä!

³¹Lagajc dxejc gunaaz Jesús naani, räjpni loj Pedr:

—Guxii rajplu yälřililajz. ¿Xhicuent guctio'p lajzlu?

³²Che huä'preni nen barcw, guläzgjajc bej. ³³Dxejcti renani sää nen barcw bazuxhijbreni nez loj Jesús räjpreni:

—Guliipacni najclu Xi'n Dios.

Basiajc Jesús reben racxhuu guedx

Genesare't

(Mr. 6:53-56)

³⁴Che gudejdreni lo nis, bidzujnreni nez lo reyuj xten

Genesare't. ³⁵Che biembee reben ro'cni, batie'chreni diidx guideb gabi lajdxreni. Dxejcti biädnäreni guiraa reben racxhuu lojni. ³⁶Gunabduxhreni gusaanni canreni ro' xhajtisni. Dxejcti guiraa renani gudajñ xhajtñi, biajcreni.

Nani ruxhiñ bejn

(Mr. 7:1-23)

15 Dxejcti gubig gaii rebejn nani ruluii leii näjza rebejn guidoo ni laa farisee. Siäädreni guedx Jerusalén, räjpreni loj Jesús:

²—¿Xhicuent di rexpejnpaclu jiu xcostrumbr rebengool? ¿Xhicuent direni gusoob yälrdiib naareni che rajwreni?

³Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostumbrtu. ⁴Dios gunibeeni xho guntu che räjpni: “Gojñ xpala'n xtadlu, xnanlu”, näjza “Nani guiniyaj lo xtadni o loj xnanni, suguetni.” ⁵Luxh la'tu rniitu sajc gäb chutis bejn loj xtadni o loj xnanni: “Digacdi gacnäätu sa'csi guiraa ni rapä abadedäni lo Dios.”

⁶Luxh chutis ni guinii si'c, xhetru nanabdi gacnäjni xtadni o xnani. Si'c ni cabälaztu rextidx Dios te gacchanuutu rexcostumbrtu. ⁷iBejn ni rusguee najctu! Laaca gunii Isaías, bejn nani gunii xtidx Dios xcuenttu cheni räjpni:

⁸Rebenguejdxre con ro'reni rliä'preni xpala'nä niluxh lastooreni zijt suga' nez loä.

⁹Xlia'si rajñreni narä, sa'csi ruluiireni si'c xtidxä reyälrñibee xten reben guedxliuj.

¹⁰Dxejcti gurejdxni rebejn, räjpni lojreni:

—Colcuadiajg, colyacbee. ¹¹Nani riu' ro' bejn di guxhiñ bejnga, sanga nani rii ro' bejnga ni'cni ruxhiñ bejnga.

¹²Dxejcti rexpejnpacni gubig lojni, räjpreni:

—¿La najnlu bidxe'ch rebejn farisee che bejn diajgreni diidx ni guniilu?

¹³Dxejc laani räjpni:

—Xhitis yajg nani di Xtadä ni yu' xhaguibaa nusuj siliädxa'ni guideb xlobaani. ¹⁴Colgusaanreni; lotiä'preni, ruluiireni nezyuj lo salotiä'preni. Luxh palga te ben lotiä'p guluii canejz chää stee lotiä'p, guiro'preni sitejbreni nen te gued.

¹⁵Räjp Pedr loj Jesús:

—Basule' cuentre loonu.

¹⁶Räjp Jesús:

—¿La näjza la'tu ditu gacbee, ä?

¹⁷¿La ditu gacbee guiraa ni rajw bejn ru' xque'ni, dxejcti che rdejñni xque'ni, abigo'nñi? ¹⁸Niluxh diidx nani rii ro' bejn, nen lastoo bejn riini; dee ni ruxhiñ bejn. ¹⁹Sa'csi nen lastoo bejn rii rexhigabguijdx xten rebejn ni rugu't sa'ni; xten rebejn ni rusguee gunaa; xten rebejn ni rusguee chää sa'ni; xten rebejn ni rbajn; xten rebejn ni rñii didxxhii lo sa'ni; xtenza rebejn ni rutijl sa'ni. ²⁰Laa sa' recosre ni ruxhiñ bejn. Che dini gusoob recostumbr xte yälrdiib naani, di ni'c guxhiñ bejn.

Te gunazit nani huililajz xtidx Jesús

(Mr. 7:24-30)

²¹Biriiti Jesús ro'c, sääni nez región xten Tiro näjza Sidón.

²²Nejzga rbäjz te gunaa cananee, cabedxa'ni biäädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej bendxab lastooni, niluxh cagusacsíduhxnini.

²³Xhet räjpdi Jesús lojni. Dxejcti biädna^uduxh rexpejnpacni lojni, räjpreni:

—Barilaagw gunaare, didi rbedxa'ni siädna^uljni luj.

²⁴Dxejcti räjp Jesús lojni:

—Dios baxha^u narä lojtis xpen Israel nani agunijt ne^u do^ul.

²⁵Dxejcti gubig gunaaga, bazuxhijbni nez loj Jesús, räjpni:

—Dad, gucnäj narä.

²⁶Dxejc räjp Jesús lojni:

—Di gac hueen xca' bejn xcuxtiil xexi'n^uni gusa^ulnini lo rebä'cw.

²⁷Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtejb lo mex xten xpaxhuaanni.

²⁸Dxejcti räjp Jesús lojni:

—Nane', lacti guroob najc xcäl^urililajzlu. Sugac si'cni r^ulajzlu.

Lagajc dxejc biajc xindxa'pni.

Basiajc Jesús xhidal be^u racxhuu

²⁹Birii Jesús ro'c gudejdni nez ro' nisdoo ni laa Galilee. Huäpgajcni yejc te dajn, ro'c gurejni. ³⁰Xhidajl bejn bidzuj^u cad sobga'ni. Siädna^ureni reben^u ni rajc ni'ni, reben^u ni najc lotiä'p, reben^u gop, reben^u ni xheti naani, näjza xhidalo be^u racxhuu, bidzunnäjrenini nez loj Jesús. Dxejcti basiajcnireni. ³¹Ni'cni lacti bidxeloduxh reben^u xhidajlga che bahuiireni rni^u regop, riajc reni xheti naani, rsiaj reni rajc ni'ni, ruhuii relotiä'p, dxejc rliä'preni xpala'n Xtios rexpen^u Israel.

Badeed Jesús xhi gudajw tajp mi^u bejn

(Mr. 8:1-10)

³²Gurejdx Jesús rexpejnpacni räjpni lojreni:

—Riaá rebejn^ure sa'csi agujc cho^un dxej yunäjreni narä luxh xhet ca'direni gaureni. Di r^ulazä guxha^uläreni jiireni rolizjreni palga gajdreni gau didi guidxajgreni lo nezuyj.

³³Dxejcti räjp rexpejnpacni lojni:

—¿Xho guidxälnu xhi gau reben^u xhidajlre nez lo reyubijzre cadro rut rbäjzdi, ä?

³⁴Räjp Jesús lojreni:

—¿Bal yätxtiil ca'tu?

Räjpreni:

—Gajdz^utisni, näjza gaii bälbäze'.

³⁵Sas gunibee Jesús cue rebejn lo yuj. ³⁶Dxejc cua' Jesús guigajdz yätxtiilga näjza rebäj^ul, badeedni xquixtios lo Dios dxejc gula'ni reyätxtiilga näjza rebäj^ulga badeednireni loj rexpejnpacni.

Dxejcti laareni gudisreni yätxtiilga con rebäj^ulga lo rebejn^u xhidajlga.

³⁷Guiraareni gudajw, gudxaj xque'reni. Che gulu^ujx gudajwreni, batie'reni reyätxtiil ni bia'nga, gudxaj gajdz dxij^umni. ³⁸Renani gudajwga najc si'cti tajp mi^u bejn, niluxh xhet näjdi regunaa niclaza rebuiux bigab.

³⁹Dxejcti basadiidx Jesús rebejn, biu'tini ne^u barcw te gudejdni lo nisdoo nez región xten Magdala.

Reben^u guidoo ni laa farisee näjza saducee rniabreni te milagwr si'c te seen

(Mr. 8:11-13; Lc. 12:54-56)

16

Refarisee näjza resaducee bidzuj^ureni

lo Jesús, gunabreni gunni te milagwr, gudeedni te seen ni rien̄ xhaguibaali. Niluxh cagusguesireni, sa'csi rlajzreni guiga' Jesús. ²Dxejc badzu' Jesús diidxre räjpn̄i lojreni:

—Che rajl gudxej, rniitu: “Saru gac te dxej guixee sa'csi naxniaa xhaguibaa.” ³Che rajl rsil rniitu: “Etladi gac te dxej nadxej sa'csi naxniaa xhaguibaa niluxh tre' za.” Xhoxh numbeetu xhi säloj reseen ni rien̄ xhaguibaa, luxh ditu gumbee xhi säloj reseen xcuent redxejre, nalajznu recos ni cayajc. ⁴Reben̄ guijdxre, reben̄ gualajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

Levaduur xten reфарisee

(Mr. 8:14-21)

⁵Che gudejd rexpejn̄pacni stelaad nisdoo biäl-lajzreni ninäreni yätxtiil. ⁶Dxejcti räjpn̄ Jesús lojreni: —Bacuadiajg, colnati levaduur xten reфарisee näjza resaducee.

⁷Dxejcti bejn̄reni xhigab nen̄ lastooreni: “Si'c caniini sa'csi dinu niopnä yätxtiil.” ⁸Luxh gucbee Jesús xhigabga, dxejc räjpn̄i lojreni:

—¿Xhicuent rujntu xhigab xhet yätxtiildi ca'tu, ä? ¡Huinduxh najc xcäl̄rililajztu! ⁹¿La gajdte gacbee? ¿La diza lajztu guinaj che gudisä gaii yätxtiil gudajw gaii mil̄ bejn̄, ä? ¿Bal dxijm̄ni batie'tu, ä? ¹⁰¿La diza lajztu guizaj che gudisä gajdz yätxtiil gudajw tap mil̄ bejn̄, ä? ¿Bal dxijm̄ni batie'tu? ¹¹¿Xhicuent ditu gacbee et yätxtiildi cagusä'tä

cheni caniä lojtu colnati levaduur xten reфарisee näjza resaducee?

¹²Dxejcr̄u gucbeer̄eni dini niäjpn̄: “Colnati levaduur xten yätxtiil.” Laani caniini: “Colnaáti yäl̄ruluii xten reфарisee näjza resaducee.”

Bicäjpn̄ Pedr Jesús najc Cristpac

(Mr. 8:27-30; Lc. 9:18-21)

¹³Che bidzujn̄ Jesús regiön xten Cesarea xten guedx Filipino, gunabdiidx Jesús loj rexpejn̄pacni, räjpn̄i:

—¿Chu naj rebejn̄ nacä narä Xi'n Dios ni gujc Niguii?

¹⁴Laareni räjpreni:

—Yu'reni naj luj najclu Juan Bautist; yu'zaren̄i rniil̄ luj najclu Elías, peta sgaiireni rniil̄ luj najclu Jeremías o stee niguii ni rniil̄ xtidx Dios.

¹⁵Dxejcti räjpn̄i lojreni:

—La'tu, ¿chuni'c rniitu nacä?

¹⁶Dxejc räjpn̄ Simón Pedr:

—Luj najclu Crist, Xi'n Dios nani nabajpn̄.

¹⁷Badzu' Jesús diidxre, räjpn̄i:

—Chicbaalu, Simón Pedr, xi'n Jonás, sa'csi xhet bejn̄di baluii dee lojlu, Xtadätis ni yu' xhaguibaa baluiinini lojlu. ¹⁸Narä rniä lojlu, luj najclu Pedr, nani säloj: “Te guij.” Sa'csi sibäxtiejl̄u guidxagsa'za renani rililajz xtidxä, niluxh che guetreni, direni nitloj. ¹⁹Narä gunidxä yäl̄rniabee lojlu te gulijdxlu rebejn̄ nani ahuililajz xtidxä. Xhitis ni gusaanlu gunreni, o xhitis ni dilu gusaanlu gunreni, susoob Dios xtiidxlu.

²⁰Dxejcti gunibee Jesús rutlojdi gäb rexpejn̄pacni laani najc Guejbn̄ Crist.

Gunii Jesús xho guetni*(Mr. 8:31-9:1; Lc. 9:22-27)*

²¹Lagajc dxejc gusloj cagusule' Jesús diidx lo rexpejn_{pacni}, guniini lojreni xho nanab_{pac} cháani guedx Jerusalén te ro'c tedni trabajwduxh ladz_{naa} rebengool xten guidoo, ladz_{naa} rebixhojz, näjza rebejn ni najn xleii Moisés. Guniizani sugu'trenini, niluxh ni riojn dxej sibansacni lo rebengut.

²²Dxejcti huinä Pedr Jesús te laad, gusloj cadi_{ln}äj_{nini}, räjpni:

—iGacnäj Dioslu, Dad!

iGurniälojlu gaclu si'c!

²³Dxejc gubiré Jesús, räjpni lo Pedr:

—iGubicaj loä bendxab! Na'c rusiey_{tislu} loä. Luj dilu gun xhigab xten Dios, alga xhigab xten rebenguedxliuj rujnlu.

²⁴Dxejcti räjp Jesús loj rexpejn_{pacni}:

—Palga yu' chu tejtu r_{lajz} guirinajl narä, sucuälazni lagajc laani, suguuni x_{crujz}ni, nalajznu tedni trabajw, sujiäd_{najl}ni narä. ²⁵Sa'csi nani r_{lajz} gunni gaan xcäl_{nabaj}ni, sunij_{tni}. Luxh nani runij_t xcäl_{nabaj}ni por narä, sidxäl_{ni} xcäl_{nabaj}ni par tejpas. ²⁶Sa'csi éxhi gaan gun te bejn palga ga'pni guideb guedxliuj, luxh nit xaimni lo Dios, ä? o éla yu' xhi gudeed bejn te siini xaimni? ²⁷Sa'csi narä Xi'n Dios ni gujc Niguii siälä lo yäl_{rdimbicha}' xten Xtadä con rexang_{lni}, dxejcti siguixä tebgaj bejn si'ctis ni gujc x_{tz}uunni. ²⁸Rniliápac lojtu, loj reni tre' ree naj, yu'reni di guet dxejli ni fixgaareni jiälä narä Xi'n Dios ni gujc Niguii lo xcäl_{rnibeä}.

Chuni'c najc guroob*(Mr. 9:2-13; Lc. 9:28-36)*

17 Che gudeed xho'p dxej, huinä Jesús Pedr, Jacoob, con Juan betz Jacoob, xtebreni huijreni jiaa yejc te dajn. ²Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajn_{ni} gujc nolbäj si'c te bajl. ³Dxejc bahuigajcreni loj Moisés näjza loj Elías, cayujyreni diidx con Jesús. ⁴Dxejcti räjp Pedr loj Jesús: —Dad, ihuenduxh suga'nu ree! Palga r_{lajz}lu, saj_z jiennu chon yuguijxh, tejni gac xten guejblu, steeni gac xten Moisés, steeni gac xten Elías.

⁵La_{lni} canii Pedr, biäjt te za ni rdimbicha' guideb gabireni; nen zaga biejn te xse' ni räjp:

—Dee najc xi'nä ni sanälazä, ruspaduxhni lazä, colcuadiajg xtiidxni.

⁶Che biejn diajg rexpejn_{pac} Jesús diidxga, bazuxhijbreni, basajbreni lojreni lo yuj, bidxebduxh_{reni}.

⁷Dxejcti gubig Jesús lojreni, batzuubni _{naani} yejcreni, räjpni: —Colchasulii, na'c rdxejbtu.

⁸Che guläs lojreni, lojtis Jesús bahuiireni, rutru suganäjdini.

⁹Cheni sayäj_{treni} yejc dajnga, gunibee Jesús lojreni, räjpni:

—Rutlojdi gäbtu xhini'c bahuiitu dxejli ni guibansacä narä Xi'n Dios ni gujc Niguii lo rebengut.

¹⁰Dxejcti gunabdiidx rexpejn_{pacni} lojni:

—éXhicuent rnii rebejn ni najn xleii Moisés ganid Elías nanab jiäd, ä?

¹¹Badzu' Jesús diidxre, räjpni:

—Guliini siädxgaa Elías, laani gunsa'cni guira'ti, ¹²niluxh narä rniä lojtu, abiääd Elías, di rebejn nienbeeni, luxh bennäjrenini si'ctis ni rlanjreni, basacsíduxhrenini. Sigajcza gunnäjreni narä Xi'n Dios ni gujc Niguii, susacsíduxhreni narä.

¹³Dxejcti gucbee rexpejnpacni caniini xcuent Juan Bautist.

Jesús basiajc te biuux ni guyu' xpej bendxab

(Mr. 9:14-29; Lc. 9:37-43)

¹⁴Cheni bidzujñreni cadro tre' xhidajl bejn, gubig te bejn lojni bazuxhijbni, dxejc räjpni:

¹⁵—Dad, balaslajz xinä sa'csi laani cayacxhuuni, rajcni yälguidxbej, rusacsíduxh yälguijdxgani, yu' huält rtejbni lo guiboo yu' huält rtejbni lo nis. ¹⁶Biädnäáni loj rexpejnpaclu, luxh di nijajcni nusiajcrenini.

¹⁷Jesús badzu' diidxre lojreni räjpni:

—Benguijdx, bejn ni di chalilajz, ¿gucli yu'ä lojtu? ¿Cati gac gunä huant la'tu? ¡Cołtanä biuuxga ree!

¹⁸Dxejcti gudiñäj Jesús bendxab ni yu' lastoo biuuxga, gunibeeni biriini, lagajc dxejc biajc biuuxga.

¹⁹Dxejc guninäj rexpejnpacni Jesús te laad, gunabdiidxreni räjpreni:

—¿Xhicuent di nijajcni nibäanu bendxab nen lastoo biuuxga?

²⁰Jesús räjp lojreni:

—Sa'csi la'tu guxiduxh rililajz. Rniliä lojtu, paru najc yälrililajz xtentu si'cti te bejdz muxhtas, sajc gäbtu loj dajn rec: “Gubicaj ro'c, gudejd stelaad”, luxh sibicaj

dajnga. Palga rililajzpacktu, xhetliidi yu' ni di gacdi guntu. ²¹Niluxh sa' bendxabre, dini guirii palga ditu guiniabduxh lo Dios, gucua'nzatu.

Jesús rusule' stehuält xho guetni

(Mr. 9:30-32; Lc. 9:43-45)

²²Lañni sasajreni nez región xten Galilee, räjp Jesús:

—Suteedreni narä Xi'n Dios ni gujc Niguii ladznaa rebendojl te gusacsíreni narä. ²³Niluxh sugu'treni narä, dxejc ni riojn dxej sibansacä lo rebengut.

Che bejn diajgreni diidxga, guchuinduxh lajzreni.

Gudijxni impuest xten guidoo

²⁴Che bidzujñ Jesús näjza rexpejnpacni guedx Capernaum, biääd rebejn ni rusquijx xcuent guidoo lo Pedr, gunabdiidxreni lojni, räjpreni:

—¿La di xmastrtu quiix impuest xten guidoo?

²⁵Räjp Pedr:

—Rguijxnini.

Che biu' Pedr nen yu', ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebejn ni rnibee lo guedxliujre? ¿Chuni'c rguijx reimpuest, recuyo't? ¿Reben lajdxreni o rebenzajt?

²⁶Badzu' Pedr diidxre räjpni:

—Rebenzajt.

Räjp Jesús:

—Ni'cni di rexi'nreni quiixni.

²⁷Luxh te di guidxe'chreni, huij ro' nisdoo, bacuaa ansuel, guläa bäjli ni guiniazxaalu. Ro' bäjga sidxällu te melpla't ni sajl te chatijxlu impuest xcuentä näjza xcuentlu.

¿Chuni'c sajcru lajdx Dios
xhaguibaa?

(Mr. 9:33-37; Lc. 9:46-48)

18 Laa dxejnci gubig
rexpejn̄pac Jesús lojni te
gunabdiidxreni:

—¿Chuni'c sajcru lajdx Dios
xhaguibaa?

²Dxejcti gurejdx Jesús te biuxbáz,
bazujnini nez galáiiireni, ³dxejc
rájpn̄i:

—Rniliápac lojtu, palga ditu
gusiechlajztu, palga ditu gac
nadolajz si'c te biuxbáz, ditu jiu'
lajdx Dios xhaguibaa. ⁴Ni'cni
chutis bejn̄ nani gac nadolajz si'c
biuxe're, laani gac ni sajcru lajdx
Dios xhaguibaa. ⁵Chutis ni riu te
sa' biuxe're, sa'csi rinälajzni narä,
lagajc narä riuni.

Riezwg jiajbni nen̄ dojl̄

(Mr. 9:42-48; Lc. 17:1-2)

⁶Rájpn̄zani:

—Chutis ni gudzucaj lo xnezyuä
te sa' biuxe're ni ahuililajzni
xtidxä, maazru huen niliib te guij
xten molin dojb yejn̄ni, chatejbni
loj nisdoo, palga gunni jiajb tej
reni'c lo dojl̄. ⁷Proobza guedxliuj
sa'csi yuduxh xhigabguijdx lojni.
Sa'csi nanabpac chu xhigabguijdx.
Gunatiro, bejn̄ ni ruzobloj
rexhigabguijdxre, ni rujn̄ riajbza lo
dojl̄ reni rililajz xtidxä, ni najc si'c
biuxe're.

⁸Palga ni'lu o ñaalu gun jiajblu
lo dojl̄, batiu'ni. Hueenru jiu'lu
lo xcäl̄nabajn̄ Dios nitiujnglu o
ñatiujnglu lacuaa jiilu con guiro'p
ni'lu o guiro'p ñaalu lo balduxh ni
rejc par tejpas. ⁹Palga te balojlu

rujn̄ riajblu lo dojl̄, gulääni.
Hueenru jiu'lu lo xcäl̄rnibee Dios
najclu lotiä'p lacuaa chu guiro'p
baloj chazäl̄reni luj lo balduxh ni
rejc par tejpas.

Xcuent xiil ni gunijt

(Lc. 15:3-7)

¹⁰Rájpn̄za Jesús lojreni:

—Colnatiro, andi cuälaztu rebejn̄
ni najc si'c biuxbázre ni sasaj lo
xnez Dios, sa'csi rexangl Dios ni
cahuiireni, guiraatis dxej yu'reni
loj Dios. ¹¹Sa'csi Xi'n Dios ni gujc
Niguii biääd te gusläani rebejn̄ nani
agunijt nen̄ dojl̄.

¹²Rájpn̄zani:

—¿Xho rhuiitu? Palga rajp te bejn̄
te gayuu xiil, dxejc nit tejni, ¿laa
dini gusaan stabitzubigaaga ni yu'
nen̄ gurajl te chatiilni xile' ni gunijt,
ä? ¹³Luxh palga guidxäl̄ni xile'ga,
rniliä lojtu, sibalazduxhruni xcuent
xile'ga luxh guxiiru guibanäj
lajzni xcuent rexiil nani di ninijt.
¹⁴Sigajcza Xtadnu ni yu' xhaguibaa
di rlajz nit lo Dios nicla tej reni
ahuililajz xtiidxni, ni najc si'c
biuxbázre.

Xho gunnäjl̄u bejtzlu

(Lc. 17:3)

¹⁵Rájpn̄zani:

—Palga gun bejtzlu te cosguijdx
lojlu, guninäjni xtebtislu, gojs lojni
xhi dojl̄ bejn̄ni lojlu. Palga saru
gucuadiajgni xtiidxlu, abiäj̄l̄ lajztu.
¹⁶Palga naaddini gucuadiajgni,
dini jiu xtiidxlu, dxejc huiinä stee o
stio'p bejn̄ chaninäjl̄uni, te guiraa
ni guiniitu jiejn̄ diajg rebejn̄ga,
te arajplu tio'p o chon̄ testiigw.
¹⁷Palga di bejtzlu gucuadiajg xtidx

rebejn̄ga, luxh dizani jiu xtiidxreni, nen̄ guidoo huile'c xquejlu loj rebejn̄ ni ricuadiajg xtidx Dios. Palga dizani jiu reben̄ guidoo, sugacni nez lojlu si'c te beñgüijdx ni di gumbee xtidx Dios o si'c rebejn̄ nani rusquijx loj rebejn̄ nani ruto'.

¹⁸Ni'cni rniliápac lojtu, guiraa yälguxhtis xten bejn̄ ni di gusiechlajz xtojlr̄eni ni guntu lo guedxliuj, si'c jia'n̄ni xhaguibaa; guiraa redojl̄ nani gusiäj̄l̄ lajztu lo guedxliuj sa'csi basiechlajz bendojl̄ga, si'cza jia'n̄ni xhaguibaa.

¹⁹Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtaďä ni yu' xhaguibaa suniidxni ni rniabtu lojni. ²⁰Sa'csi cadrotis nadxagsa' tio'p o chon̄ bejn̄ sa'csi rinälajzreni narä, anasuga'ä galäii rebejn̄ga.

²¹Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäj̄l̄ lazä? ¿La sajl gajdzli huält, ä?

²²Badzu' Jesús diidxre lojni räjpni:

—Dina guiniä gajdztis huält, rniä gayon̄bidzoo huält, nalajznu si'ctiza huält basiäj̄l̄ lajzlu.

Xcuent tio'p bejn̄ ni nazääb meel

²³Xcäl̄rnibee Dios xhaguibaa najc si'c te reii ni rlajz gunni cuent lac nazääb rexmosni lojni.

²⁴Agusloj cayujnni xcuentni chela bidzun̄näjreni te mos ni nazääb balti mil lojni. ²⁵Luxh mosre xhet rajpdini te quiixni rexti'n̄ni, ni'c gunibee reii guido'ni si'c sclav,

näjza chäälni, näjza rexi'n̄ni, nägajcza guiralii xhixtenni, te gaxh xti'n̄ni. ²⁶Dxejcti mosga bazuxhijbni loj xlam̄ni, gunabduxhni lojni, räjpni: “Guläzsijc tiop-chon̄ dxej, Dad, te gac quixä xti'nä.”

²⁷Dxejcti lam̄ga balazlajzni xmosni, badzucajni guiraa ni nazääb mosga lojni, baslaanini. ²⁸Cheni birii mosga rolijz xlam̄ni, bidxaagni stee samosni ni nazääb bale'si beex lojni. Gunaaznini, baxhiya'ni yejnni, dxejc räjpni: “Gudijxga ni nazääblu loä.” ²⁹Dxejcti ste mosga bazuxhijbni lojni, räjpni: “Guläzsijc. Siguixäca guiraa ni nazäbä lojlu.”

³⁰Luxh steega naaddini, alga huisäugacni samosni nen̄ latzguiib te bejn̄ni gaan gudijxni guiraa ni nazääbni. ³¹Cheni bahuii sgaii mos xhini'c bejn̄ni, gucnaduxhlajzreni, huiye'tzreni lo xlam̄reni xhi huiyejnni. ³²Dxejcti gurejdx xlam̄reni mosga, räjpni lojni: “iMos guijdx! Narä badzucää di'n ni nazääblu loä, sa'csi gunabduxhlu loä. ³³Si'cza niunnäjlu sa'lu, nulazlajzluni sigajc ni balazlazälu.”

³⁴Sas lacti bidxechduxh lam̄ga, gunibeeni biäuuni te gudijxni guiragajc ni nazääbni lo xlam̄ni.

³⁵Baluux Jesús cuentga, räjpni: —Sigajcza gunnäj Xtaďä ni yu' xhaguibaa guiraa rebejn̄ ni di gusiäl̄lajzpac guiraa redojl̄ ni rujn resa'ni lojni.

Jesús ruluii xcuent yälruro'n sa'ni

(Mr. 10:1-12; Lc. 16:18)

19 Che gulujx gunii Jesús recuente, biunejzni Galilee, huijni lo región xten Judea, stelaad gueu Jordán.

²Xhidajl bejn birinajlni, ro'c basiajnci rebenracxhuu, ³dxejc gubig refarisee lojni, rlanjzreni gusgueesireni Jesús ni'c rājpreni lojni:

—¿La sajc guro'n te niguii chäälni che rlanjztisni, ä?

⁴Badzu' Jesús diidxre lojreni, rājpreni:

—¿La gajdtu goj lo reguijtz nani bacuaa toMoisés cadro caj xho benchee Dios bejn galooli: “Niguii nājza gunaa bencheenireni”?

⁵Guniiza Moisés: “Ni'cni gusaan niguii xtadni con xnanni te xca'ni chäälni, dxejc dirureni gac tio'p, tejtis bejn najcreni.” ⁶Ni'cni dirureni gac tio'p, anajcreni tejtis bejn, digacdi guilia' rebejn lo sa'ni nani abachagsa' Dios lo sa'ni.

⁷Dxejcti gunabdiidxreni lojni, rājpreni:

—¿Xhicuent gunibee Moisés gudeed niguii te guijtz lo chäälni te si'c gac guro'nni gunaaga, ä?

⁸Rājpre Jesús lojreni:

—Sa'csi najc lastootu si'c te guij, ni'c basaan toMoisés baro'n niguii chäälni, niluxh galodoo et si'cti gujnci. ⁹Luxh rniä lojtu, niguii nani gusaan chäälni, luxh xhet dojlđi bennāj chäälni stee niguii, dxejcti guchnaani ste'ca gunaa, rujnni dojl. Sigajcza niguii ni guchnaa gunaaga ni abaro'n chäälnini, rujnza niguiiga dojl.

¹⁰Dxejc rājpre rexpejnpacni lojni:

—Palga si'c najc xcuent niguii con chäälni, hueenru na'c guchnaani.

¹¹Jesús rājpre lojreni:

—Xhet guiraadi bejn rajc gacbee rediidxre, rebejntis ni rudeed Dios te xcäriensa'c ni'ctis racbee. ¹²Yu'

xhicuent digacdi guchnaa niguii: yu'reni digacdi guchnaa sa'csi si'c gojlreni; yu'reni digacdi guchnaa sa'csi baxhiñ sabejnreni; yu'zaren digacdi guchnaareni sa'csi rlanjzreni gunreni xtzuantis Dios. Nani rajc racbeeni rediidxre, sugacbeenireni.

Biädna'reni rebiuux loj Jesús

(Mr. 10:13-16; Lc. 18:15-17)

¹³Dxejcti biädna'reni rebiuxe' loj Jesús te gudzuubni naani yejcreni, guiniabni lo Dios xcuentreni. Luxh rexpejnpacni gudilñāj rebejn ni siädna' rebiuxe'ga. ¹⁴Dxejc rājpre Jesús lojreni:

—Colgusaan guibig rebiuxe' loä, na'c gudxojnureni, sa'csi xcälrnibee Dios xhaguibaa najc xten reni nadolajz si'c najc rebiuxe're.

¹⁵Che gulujx badzuubni naani yejc rebiuxe', biunejzni ro'c.

Te beñ ni rajp gunināj Jesús

(Mr. 10:17-31; Lc. 18:18-30)

¹⁶Dxejc biäd te bi'n lo Jesús, gunabdiidxni lojni; rājpreni:

—Mastr sa'c, ¿xhini'c nanab gunä te xca'ä yälñabajñ lo Dios par tejpas?

¹⁷Dxejc rājpre Jesús lojni:

—¿Xhicuent rniilu maestr sa'c narä? Diostis najc sa'c. Per par rlanjzlu xca'lu yälñabajñ lo Dios, bazoob rextidx Dios ni caj lo xleii Moisés.

¹⁸Dxejcti rājpre bi'nga lojni:

—¿Xhi rediidxga?

Dxejc rājpre Jesús lojni:

—Na'c ju'tlu, na'c guesnäjlu bejn nani di gac chäällu, na'c cuanlu, na'c guiliäslu didxxhii xcuent bejn.

¹⁹Bazoob xtidx xstadlu con xnanlu, huinälajz sa'lu si'cni sanälajzlu lagajc luj.

²⁰Dxejcti räjp bi'nga lojni:

—Guiraa rediidxre runä che nacáli biuux. ¿Xhiruxni'c riäädx gunä?

²¹Dxejc räjp Jesús lojni:

—Palga rlajzlu gaclu beŋsa'c lo Dios, huij, bato' guiraa ni rajplu, dxejc gudisni lo rebenproof, dxejc xhaguibaa sapduxhlu xhixtenlu. Dxejcti gudaä te jiädnajlly narä.

²²Cheni biejn diajg bi'nga rediidxre, guc-huinuxh lajzni sa'csi rajpni xhidalduxh xhixtenni.

²³Sas Jesús räjp loj rexpejnpacni:

—Rniliápac lojtu, naganduxh jiu' te beŋ rajp loj xcälrnibee Dios. ²⁴Rnisacä lojtu, guyasiru ted te cameii nen baloj te guux; naganduxhru jiu' te bejn ni rajp lo xcälrnibee Dios.

²⁵Che biejn diajg rexpejnpacni rediidxre, bidxeloduxhreni, dxejc canabdiidx loj sa'reni:

—¿Chuni'c sajc jiu' lo xcälrnibee Dios?

²⁶Dxejc bahuidzu'tz Jesús lojreni, räjpni:

—Naganduxh gun rebejn dee, Diostis sajc gun guiraloj.

²⁷Dxejcti Pedr räjp lojni:

—Nuurnu basa'nnu guiraa xhixtennu te siopnalnulu. ¿Xhini'c jia'pnu ro'c?

²⁸Jesús räjp lojreni:

—Rniliápac lojtu, la'tu ni biädnajlly narä, che guscobä guiraa recos cheni cueä narä, Xi'n Dios ni gujc Niguii, lo yagxhil cadre guinibea lo guiraa reben guedxliuj, la'tu ni siädnajlly narä sibejzatu lo tzubitio'p yagxhil te

guinibeetu loj guitzubitio'p guejdx xten rexpejn Israel. ²⁹Luxh guiraa rebejn ni basa'n rolizjni o rebejtzni, o rebisiajnni, o xtadni, o xnanni, o chäälni, o xi'nni, o rexhujni, te siädnajlly narä, rebejnnga sajc te gayuu huält locni gojpni, nägajc ga'preni xcälrnabajn Dios par tejpas.

³⁰Rebejn nani rchalo najcreni benroru lo sa'reni nez loj Dios, reni'c gac bejn ni guxii sajc nez loj Dios. Rebejn nadolajz ni di guchalo sajcrureni lo sa'reni, reni'c sajcrureni nez loj Dios.

Xcuent reni rujn dzuun

20 Räjzpzi:

—Xcälrnibee Dios najc si'c te bejn ni najc baxhuaan xten te renchro. Rsillooru biriini te satiilni mos gun dzuun lo xyujni, lo reyaguub. ²Che bidxälni gaii mos, bachaagni diidx. Bia'nreni diidx quiixnireni te denaar tebdxej cade tej remosga. Dxejc baxhalnireni loj xyujni sayujnreni dzuun.

³Birisacni, satiilni sgaii mos si'cti rcagaa, rsil. Bidxaagni sgaii bejn ni xhet cayujndi, suga'sireni nez lo guii.

⁴Räjpni lojreni: “Näjza la'tu colchayujn dzuun lo xyuä. Narä siguixä si'cni riäjly xca'tu.” Sä'ti rebejnnga lo dzuun. ⁵Birisac dade' si'cti läiidxej, birisaczani si'cti rcachon gudxej. Bidxaagni sgaii bejn, sigajcza räjpni loj rebejnnga.

⁶Dxejc si'cti rcagaii birisacni, huijni lo guii. Ro'c bidxälni sgaii bejn ni xhet cayujndireni, suga'sireni nez lo guii. Dxejc räjpni lojreni: “¿Xhicuent suga'tu ree guideb dxej xhet cayujnditu?” ⁷Dxejc räjpreni lojni: “Sa'csi rut siädtildinu te

choyennu dzuun.” Dxejcti räjpni lojreni: “Näjza la'tu colchayejn dzuun lo xyuä. Narä siguixsa'cätu.”⁸ Che biu' guxhijn, räjp lam lo mos ni rnibee remos: “Gurejdx remos te quiixlureni. Gudix-xгаа reni biu' gudxejru lo dzuun. Lult gudijx reni biu' ganid lo dzuun.”⁹ Dxejc ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujn dzuun guideb dxej.¹⁰ Cheni biu' reni biu' lo dzuun rsildoo, bejnreni xhigab sica'rureni meel, per sigajcza laareni cua'reni te denaar cade tejreni.¹¹ Che cua'reni xcuentreni gusloj cadxe'chreni lo baxhuaan xten dzuunga.¹² Räjpreni: “Redee ni biu' lult lo dzuun pet teb ortis bejnreni dzuun, luxh gudijxlureni sigajcni gudijxlu nuurnu, luxh biennu dzuun guideb dxej, luxh biennu dzuun lo yäl'nanlaa.”¹³ Dxejc räjp lamga lo tejreni: “Xamigwä, xhet cosguijdxdi cayunä lojlu. ¿La xhet bia'ndinu diidx te denaar quixälu tebdxej?”¹⁴ Huij, cua' xmeellu. Narä rlazä quixä bejnre ni biu' lult sigajc ni gudixä lojlu.¹⁵ ¿La di gacdi gunä si'ctis ni rlazä con xmelä? ¿O rdexchlajzlu loä sa'csi nacä hueen, ä?”¹⁶ Ni'cni reni biääd lult sajcreni tebloj con reni biääd ganid, luxh reni biääd ganid sajcreni tebloj con reni biääd lult.

Gunisac Jesús xho guetni

(Mr. 10:32-34; Lc. 18:31-34)

¹⁷ Che sasaj Jesús lo nezyuj sääni Jerusalén, huinäni rexpejn'pacni te laad te räjpni lojreni:

¹⁸ —La'tu ruhuiitu sosaanu nez guedx Jerusalén. Ro'c narä, Xi'n

Dios ni gujc Niguui, siabä ladz'naa reni rnibee lo rebixhojz, näjza lo rebejn ni najn leii. Laareni sinibeereni guetä.¹⁹ Suteedreni narä ladz'naa rebenzijt te cubeereni narä quiinreni narä, dxejc gucuaareni narä lo cruuz. Luxh ni riojn dxej, sibansacä loj rebengut.

Ni gunab xnan Jacoob näjza Juan

(Mr. 10:35-45)

²⁰ Dxejcti gubig xnan Jacoob näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús.²¹ Gunabdiidx Jesús lojni:

—¿Xhini'c r'rajzlu?

Räjp gunaaga lojni:

—Che jiu'lu lo xcäl'rnibeelu, gunibelaa cue tej rexi'nä xladbeelu, steeni cue xladbä'jgwlu.

²² Dxejc räjp Jesús:

—iDitu gan xhini'c rniabtu! ¿La sajc tedtu yäl'sracsí sa'ni tedä? ¿La sajc tedtu trabajwduxh sa' ni nanab tedä?

Dxejc räjpreni:

—Sajc tednuni.

²³ Dxejcti räjp Jesús lojreni:

—Guliipacni. Sidedxgaatu trabajw, sidedxgaazatu yäl'sracsí. Et narädi cueä reni cue xladbä'gwä o xladbeä. Xtaä ni yu' xhaguibaa alaguleni rebejn'ga.

²⁴ Che biejn diajg stzuu rexpejn'pac Jesús, bidxe'chreni loj guiro'p rexi'n nane'ga.²⁵ Dxejc gurejdx Jesús reni, räjpni:

—La'tu najntu xho rujn regubier ni rnibee lo rebenzijt, rnibeereni rebejn'ga si'c xlamreni. Luxh reni najc rebenro lojreni runnäjreni rebejn'ga si'ctis ni r'rajzreni.

²⁶Et si'cni gunditu la'tu loj rebejn. Chutis rlaiz gac beñro lojtu, nanab gunni dzuun gacnäjni guiraliitu si'c te mos. ²⁷Luxh chutis tejtü ni rlaiz guiliä'p xpala'nni, nanab gacni si'c xmos lo guiraliitu. ²⁸Sigajcza biääd Xi'n Dios ni gujc Niguii. Dini niniab mos chu lojni, alga laani najc xmos bejn, badeedzani lagajc yälñabajn xtenni te gudijxni baslaani xhidal bejn ni yu' lo dojl.

Jesús rusiajc tio'p lotiä'p

(Mr. 10:46-52; Lc. 18:35-43)

²⁹Che gojl guiriireni guedx Jericó, xhidalduxh bejn sanajlni. ³⁰Dxejcti sobga' tio'p bejn ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

³¹Gudiñäj rebejnreni, te gusäureni ro'reni. Luxh laareni dipru guredxa'reni:

—iDad, Xi'n toDavid, balazlajz nuurnu!

³²Dxejc guzudxi Jesús, gurejdxni reni di fii, räjpni lojreni:

—¿Xhini'c rlaiztu gunä'?

³³Räjpreni lojni:

—Dad, rlaaznu guixal balojnu te gac fiinu.

³⁴Dxejc balazlajz Jesúsreni, gudajnni balojreni. Sas biacgajc balojreni, gujc bahuiireni, sanajltireni Jesús.

Biu' Jesús guedx Jerusalén

(Mr. 11:1-11; Lc. 19:28-40; Jn.12 :12-19)

21 Cheni Siäddzungajxhreni guedx Jerusalén, bidzujnreni te guedxbáz ni laa Betfagé, cuä' dajn ni laa Oliib.

Baxhal Jesús tio'p xpejnpacni, ²räjpni lojreni:

—Colchäj loj guedxbázre ni tre' nez lojtu. Ro'c guidxältu te burgunaa caduu näjza teburhuin. Colguxhecní, coltanáni loä. ³Palga yu' chu naa: “¿Xhini'c rujntu?”, colye'tz lojni: “Dad caquiinnini terate'. Suxhalgajcni.”

⁴Luxh guiraa dee gujc te guzojb diidx ni gunii dade' nani bacuaa xtidx Dios agujc xchero, che räjpni:

⁵Colye'tz loj reni rbäjz guedx Sión, bahuii xreilu siääd lojlu, nadolajzni bijbni te burbáz, te burbáz, xi'n man ni rujn dzuun, ni ruu cargw.

⁶Dxejcti huij rexpejnpacni, bejnreni si'c gunibee Jesús gunreni. ⁷Biädnäreni burga näjza burbáz xi'nni. Gudixhreni xhajbreni detz burbázga, dxejc gubijb Jesús burbázga. ⁸Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaiireni batiu' balajc te gudixhreni rebalajc lo nez yuj cadro ted Jesús. ⁹Rebejn ni nijd, näjza reni siääd dejtzni gusloj cabedxa'reni, räjpreni: —iXchej guibajn Xi'n toDavid! iChicbaa ni siääd xcuent Gueb Dios! Rliä'pnu xpala'n Guejblu Dios.

¹⁰Cheni biu' Jesús nen guedx Jerusalén, guiraa reben guejdxga gusloj camojm, yu'reni canabdiidxreni loj sa'reni:

—¿Chucha najc bejnre?

¹¹Yu'zareni räjp:

—Dee najc Jesús, niguii ni rusule' xtidx Dios. Guedx Nazare't xten Galilee siäädni.

Basia Jesús guidoro

(Mr. 11:15-19; Lc. 19:45-48; Jn.2 :13-22)

¹²Dxejc biu' Jesús nen guidoro xten Dios, gulääni guiraa rebejn

ni caguto' nájza rebejn ni casii. Barexhätmi remex xten reni ruchaa meel xten rebejn, nájza reyagxhil xten reni ruto' repalom. ¹³Dxejc räjpni lojreni:

—Loj reguijtz ni bacuaa rebengaloo caj: “Sirilaj xquidoä yu' xten yälrbeydx, yälrniab loj Dios.” Niluxh la'tu abejntuni xpiliää gubaan.

¹⁴Lagajc neñ guidooga, gubig loj Jesús gaii bejn ni di fii nájza gaii bejn ni rsiacoj, luxh basiajcnireni.

¹⁵Cheni bahuui reni rnibee loj rebixhojz, nájza reni najn leii remilagwr ni bejn Jesús, luxh biejnza diajgreni xho cabedxa' rebiuxe' caniireni: “Rliä'pnu xpala'nlu Xi'n toreii David”, bidxe'ch rebixhojzga. ¹⁶Dxejc räjpreni loj Jesús:

—¿La riejn diajglu xhi caniireni, ä?

Badzu' Jesús diidxre lojreni räjpni:

—O'n, riejn diagäni. ¿La gadtu goḷ lo reguijtz ni bacuaa te dade' ni gunii xtidx Dios? Ro'c caj xcuent redee, cadro caj rediidxre:

Abejnlu goḷ rebiuux nájza rebäznite' dij ni rliäpsa'cpac xpala'n Dios.

¹⁷Dxejcti basaan Jesúsreni, biunejzni ro'c sääni guedxe' ni laa Betania, ro'c gudejndi yääl.

Te yag iigw ni gubijdz

(Mr. 11:12-14, 20-26)

¹⁸Cheni bara yääl, rsilru gubisac Jesús guedx Jerusalén. Laḷ ni sääni, gusloj calaanni. ¹⁹Bahuuii loj te yag iigw cuä' nezuyuj. Gubigni gajxh ni' yajgga, per xhet ninejxhdi

bidxälmi, ganaxhtis balajg caj lo yajgga. Dxejc räjp Jesús lo yajg iigwga:

—iNuncru xcaj nicla tej ninejxh lojlu!

Dxejcti gubidzgajc yajgga.

²⁰Cheni bahuui rexejnpacni, bidxeloduxhrenei, gunabdiidxreni loj Jesús:

—¿Xhi cuent gubidzgajc yajgga?

²¹Räjp Jesús lojreni:

—Rniliäpac lojtu, palga chalilajzpactu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni. ²²Guiraa ni guiniabtu loj Dios, palga chalilajzpactu, suniidxnini.

Xcälrnibee Jesús

(Mr. 11:27-33; Lc. 20:1-8)

²³Dxejcti biu' Jesús neñ guidoro, dxejc laḷ ni caguluiini rebejn gubig reni rnibee loj rebixhojz nájza rebengool, gunabdiidxreni lojreni:

—¿Xhi yälrnibee rajplu ni'cni rajc rujnlu recosre? ¿Chuni'c baniidx yälrnibeere lojlu?

²⁴Badzu' Jesús diidxre lojreni räjpni:

—Sigajcza narä gunä te yälgunabdiidx lojtu; palga sajg gudzu'tu diidxga loä, dxejc guiniä lojtu chuni'c baniidx yälrnibee te runä recosre. ²⁵¿Chuni'c gunibee gutiobnis Juan ni rutiobnis? ¿La Dios o la beñ guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuent ditu nililajz xtiidxni? ²⁶Palga jie'tznu bejn guedxliuj gunibeeni, dxejc sixa't rebejn yejcnu sa'csi guiraareni

rililajzreni Juan najc te Dade' ni gunii xtidx Dios. ²⁷Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yälrnibee te runä guiraa recosre.

Te dade' ni guyu' tio'p xi'nni

²⁸Jesús räjp lojreni:

—Guidon xho guichalootu diidxre.

Te dade' guyu' tio'p xi'nni. Räjpni loj xingangalojni: “Xi'nä, nadxex chayujnlu dzuun cadre care' uub.”

²⁹Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujnni xtzun xtadni. ³⁰Dxejc räjp dade'ga lo stee xi'nni: “Xi'nä, nadxex chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij. ³¹Loj guiro'preni, ÷chuni'c bejn si'cni rlanj xtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliäpac lojtu, reni ruquijx guiraloj, näjza regunabdxab ganidreni jiu'reni lojtu loj xcälrnibee Dios, ³²sa'csi Juan ni rutiobnis biädluini la'tu xho guibajntu, luxh ditu nililajz xtiidxni. Biädla reni ruquijx guiraloj, näjza regunadxab huililazduxhrene xtiidxni. Niluxh la'tu bahuiitu guiraa recosga, ditu nusiechljaz te nililajztu xtiidxni.

Xcuent remosguijdx

(Mr. 12:1-12; Lc. 20:9-19)

³³'iColcuadiajg stee cuentre!
Guyu' te dade' ni najc baxhuaan

xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcnite tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn ni rujn dzuun, sä'tini te biaz zijtro. ³⁴Che agojl guire' cose'ch baxhaļ baxhuaanga gaii xmosni loj xyujni te chaxiireni cose'ch ni riäjl xca' baxhuaanga. ³⁵Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni. ³⁶Dxejc baxhaļsac baxhuaanga sgaii mos. Niluxh reni biannäj yujga sigajcza bennäjreni remosga.

³⁷Dxejcti bejn baxhuaanga xhigab: “Maazru huen guxhaļä xi'nä; sucuadijgrureni xtiidxni.”

³⁸Cheni bahuiireni lo xi'n baxhuaan xten yujga, bejnreni xhigab: “Deeni jiannäj yujre; do'lo guigu'tnuni te jiannäanu yujre.”

³⁹Dxejcti gunaazrenini, guläärenini te laad, dxejc bagu'trenini.

⁴⁰Dxejc gunabdiidx Jesús räjpni: —Che jääd baxhuaan xten yujga, ÷xhi gunnäjni rebejn nani biannäj xyujni?

⁴¹Dxejc räjpreni loj Jesús: —Dini gulazljaz rebenguijdxga, sugu'tnireni, sudedlaani xyujni loj ste'ca bejn nani gudeed cose'ch ni riäjl xca'ni che gaļ guire' cose'chga.

⁴²Dxejcti räjp Jesús lojreni:

—÷La gajdtu goļ lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',
cua' Dios lagajc guijga
gudixhnini squiin yu',

sajcruni loj guiraa reguij.
Dee bejn Gueb Dios, luxh
rdxeloduxhnu dzunrore ni
bejn.

⁴³Ni'cni rniä lojtu, sibicaj
xcäl_rnibee Dios lojtu, sidejdni loj
rebejn nani gudeed ni riäj_l xca'
xcäl_rnibee Dios, nalajznu renani
chalilajzpac xtiid_xni. ⁴⁴Luxh xcuent
guijga: nani jiajb lo guijga, silia'ni,
per nani guitejb guijga yejcni, li
siujyni, gacni däj.

⁴⁵Che biejn diajg reni rnibee lo
rebixhojz näjza refarisee recuent ni
canii Jesús, gucbeereni cagusä'tni
lagajc laareni. ⁴⁶Rlajzreni
niniaazrenini, per bidxebreni
rebejn sa'csi salilajz rebejn najc
Jesús bejn ni rnii xtid_x Dios.

Xcuent yäl_ruchnaa

22 Guslosac canii Jesús lojreni
con recuent, räjpni:

²—Xcäl_rnibee Dios najc si'c te
reii ni bejn te sa' te guchnaa xi'nni.
³Baxha_lni rexmosni te saxiireni
regolnejdx chääreni sa', niluxh
rebejn_re di rlajzdireni. ⁴Dxejc
baxha_l_sacni rexmosni, räjpni:
“Col_ye'tz loj reni abidon_, agujc
comiid. iAbagutä balti gonsa'c,
gonguro! Anacchee guira'ti yäl_rajw.
Col_taa.” ⁵Niluxh reni abidonga di
niu xtiid_xreni. Tejni sahuüi rexyujni,
steeni säa lo rexnegosni, ⁶dxejcti
sgaii reni niajc biooz gunaazreni
rexmos_reii, basacsíreni remosga,
sas bagu'trenini. ⁷Che biejn diajg
reiiga, bidxe'chduxhni, baxha_lni
rexsoldaadni te sagu'treni guiraa
rebenguijdxga, te saze'czareni
guejdx cadre rbäjzreni. ⁸Dxejcti
räjpni loj rexmosni: “Guiraa dee

anacchee, di nungäj_l jiäädru
reni abidon_. ⁹Col_chäj, pues, lo
resquiin lo nezyuj, col_cuejdx chutis
bejn ni guidxaagtistu.” ¹⁰Birii
rexmosni, sääreni lo nezyuj. Dxejc
bachagsa'reni guiraatis bejn ni
bidxaagreni, reni najc benguijdx
sigajc reni najc benhueen te gudxaj
rolijz reiiga.

¹¹Dxejc biu' reii biädhuiini loj
rebiooz. Bahuiini loj te bejn ni sobga'
ro'c, luxh xhet xhablanijdini najcwni.
¹²Dxejc räjp reii lojni: “Xamigwä,
¿xho bejnlu biu'lu ree luxh xhet
xhablanijdilu najcwlu?” Dxtis sobga'
bejn_ga, xhet rniidini. ¹³Dxejc räjp
reii loj rexmosni: “Col_guliib ni'ni
näjza naani, colsäl_ni detzyu' cadre
nacäjy te ro'c gonduxhni chubejli
reläjyni.” ¹⁴Sa'csi xhidajl najc reni
bidon_ luxh guxii najc reni bibee.

La sajc quiixni impuest

(Mr. 12:13-17; Lc. 20:20-26)

¹⁵Dxejcti sii refarisee, bia'nreni
diid_x siguiilreni xho gunijt Jesús te
diid_x te guiga'ni. ¹⁶Ni'c baxha_lreni
gaii xpejnreni näjza gaii bejn ni
nadxaag Herodes te räjpreni loj
Jesús:

—Mastr, anajnnu rniilu ganax
did_xlii, ruluiizalu xtiid_xpac Dios,
luxh dilu jiu xhi rnii rebejn, sa'csi
dilu cue bejn ni sajcru lo stee bejn.
¹⁷Gunii loonu, pues: ¿La laaca najc
quiixnu impuest lo César ni rnibee
loonu o et laadi?

¹⁸Dxejc gucbee Jesús xhet laadi
xhigab cayujnreni nen_ lastooreni,
dxejc räjpni lojreni:

—iBenguijdx! ¿Xhicuent rlajztu
guquiiltu narä? ¹⁹Col_guluii te meel
löä.

Dxejc badeedreni te meel ni laa denario. ²⁰Che bahuii Jesús loj meelga, gunabdiidxni lojreni, räjpnì:

—¿Chuni'c caj lo meelre?

²¹Dxejc räjpreni:

—Loj César.

Dxejc räjpn Jesús lojreni:

—Colgudeed lo César ni riäjł xca' César, colgudeedza lo Dios ni riäjł xca' Dios.

²²Che biejn diajgreni rediidxre, bidxeloduxhreni. Dxejc basaanrenini, sä'tireni.

Canabdiidxreni xho gac che guibansac rebejn

(Mr. 12:18-27; Lc. 20:27-40)

²³Lagajc dxejga bidzujn gaii reni laa saducee, reni di chalilajz sibansac bejn loj rebengut. Gubigreni loj Jesús, gunabdiidxreni, ²⁴räjpreni:

—Mastr, si'c naj toMoisés, palga yu' te bejn ni abachnaa, luxh ruti xi'nni che guetni, riäjł guchnaa bejtzni biuudga te chu xi'nreni xcuent bejtzni. ²⁵Mbaj. Loonu yu' gajdz niguii ni najc bejtz sa'reni. Betzgoolga bachnaa, dxejc gujtni, luxh di xi'nni niu'. Basa'nni chääłni lo bejtzni. ²⁶Sigajcza gusajc ni ro'p bejtzni; sigajcza gusajc ni riojn bejtzni. Si'c huinuu gujc che basa'li guigajdz bejtzga. ²⁷Sas che gujt guiraareni, nájza gunaaga gujt. ²⁸Che guibansac rebejnğa lo rebengut, ¿chu tej lo rebajtza gac chääłpac gunaaga, ni guiraareni bachnaareni gunaaga?

²⁹Dxejcti badzu' Jesús diidxre lojreni, räjpnì:

—Et laadi rujntu xhigab sa'csi ditu gacbee xtidx Dios ni claza xcuent

xcälrnibee Dios. ³⁰Ni che guibajn rebengut, diru yäl'ruchnaa chu, diruza bejn gudeed rexindxa'preni guchnaa. Dxejc sajcreni si'c rexangl Dios ni yu' xhaguibaa. ³¹Dxejc xcuent yälrbansac loj rebengut, ¿la gajdtu goł reguijtz ni bacuaa toMoisés che räjpn Dios xcuent retoxtdagdoonu: ³²“Narä nacä Xtios Abram, Xtios Isaac, nájza Xtios Jacob”, ä? Dios di gac Xtios bengut, Xtioſtis rebejn ni nabajn najcni.

³³Che biejn diajg rebejn xtidx Jesús, bidxeloduxhreni diidx ni ruluini.

Diidx ni maazru saje

(Mr. 12:28-34)

³⁴Che gucbee refarisee basäu Jesús ro' resaducee, bidojpreni, bachaagreni diidx. ³⁵Dxejc tejreni nani najn leii, rłajzni guquiilni Jesús ni'c gunabdiidxni lojni räjpnì:

³⁶—Mastr, ¿xhi diidx ni gunibee Dios sajcru lojreni caj lo leii?

³⁷Räjpn Jesús lojreni:

—Nani rnii scree: “Huinälajz Dad Xtioslu guideb lastoolu, guideb xaimlu, nájza guidebgajc xcäriejnlu.” ³⁸Diidxre ni gunibee Dios najc ni sajcru, luxh ganidni siäädni loj rextidx Dios. ³⁹Ni ro'pğa sigajcza najcni: “Huinälajz resa'lu sigajc ni sanälajzlu lagajc luj.” ⁴⁰Guio'p remandamientre nanab te guzoob bejn guiraa rediidx ni bacuaa toMoisés nájza ni bacuaa redade' nani gunii xtidx Dios.

¿Chu xi'n najc Crist?

(Mr. 12:35-37; Lc. 20:41-44)

⁴¹Lałni tre' refarisee, gunabdiidx Jesús lojreni, räjpnì:

⁴²—¿Xhi rujntu xhigab xcuent Crist? ¿Chu xi'n najcni?

Räjpreni lojni:

—Laani najc xajg toDavid.

⁴³Räjp Jesús lojreni:

—¿Xhicuent räjp David “Xtadä” lojni che basanij Sprit Dxan xten Dios lastooni? Ni'c bacuaa toDavid rediidxre:

⁴⁴Dad Dios räjp lo Xtadä, gurej xladbeä laḷ ni gudzugä guiraa reni rdxe'ch lojlu ladzni'lu.

⁴⁵Palga lagajc David rnii: “Dad” lojni, ¿xho mood najcni xi'nni?

⁴⁶Dxejc rut gujcdi badzu' nicla te diidx lojni, luxh dxejluga rutru gojpd i xhi diidx niniabdiidxruren i lojni.

Rucuaquij Jesús refarisee näjza rebejn nani najn lei i

(Mr. 12:38-40; Lc. 11:37-54; 20:45-47)

23 Dxejc räjp Jesús loj reben xhidaalga näjza loj rexejnpacni:

²—Rebejn ni najn lei i näjza refarisee rajp yäl najn te gusule'reni xlei i Moisés. ³Ni'cni colguzoob guiraa rextiidxreni, na'c guntu sa' recos ni rujnreni, sa'csi laareni rniireni xhini'c guntu, dxejcti lagajc laareni direni gun ni rnibeereni guntu. ⁴Rnibeereni gun rebejn cos naganduxh ni najc si'c te cargw naduxh ni di gac guu bejn, per laareni nicla con te bicuenaareni direni gusniibni. ⁵Guiraa recos ni rujnreni, rujnrenini te fiitis rebejn. Rchaglajzreni rcaj lo cuajszreni näjza roxhajgwreni recaje' cadro yu' tla' guijtz ni caj xtidx Dios lojni. Rustioolzaren i xi' xhajbreni. ⁶Rlajzreni ganidreni tedreni lo mex che gal te lanij; rlajzreni cuereni

lo rebancw ni suga' delant nen reguidobäz. ⁷Sigajcza rlajzreni guchagro' bejn naareni nez lo guui, guiniiza rebejn “Mastr” lojreni.

⁸Na'c gusaantu guinii rebejn “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu. ⁹Na'c guiniitu “Xtadä” loj te bejn guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa. ¹⁰Na'cza gusaantu guiniireni lojtu “Mastr” sa'csi yu' tejtis Mastr, ni'c najc Crist. ¹¹Ni yu' si'c mos lojtu ni'c najc benroru loj resa'ni. ¹²Sa'csi chutis ni rchaloni najcni benro lo sa'ni, ni'c sustuiyä lojni, chutis ni najc nadolajz loj Dios, ni'c sunäni benro lo sa'ni.

¹³iProobzatu remastr xten lei i näjzatu refarisee, najctu benguijdx! Sa'csi rudxoju' jiu' rebejn loj xcäl rniibee Dios. Lagajc la'tu ditu jiu' luxh dizatu gusaan jiu' rebejn ni rlajz jiu'!

¹⁴iProobzatu remastr xten lei i näjzatu refarisee, najctu benguijdx! Sa'csi rudzucajtu rolijz renanbiuud laḷsi cabedx canabduxhtu lo Dios, naatu gusgueetu bejn si'c. Sa'csi rujntu scree, siabduxh fis xten Dios yejctu.

¹⁵iProobzatu remastr xten lei i näjzatu refarisee, najctu benguijdx! Zijt rijtu lo renezyuj näjza lo nisdoo te guntu gaan guchaa mase tejtis bejn xmoodni te gan ni Dios si'c rajntuni. Luxh che ahuililajz bejnga xtiidxtu, rujntuni tio'p huält maazru te xi'n gabijl loj ni najctu.

¹⁶iProobzatu, najctu si'c lotiä'p, rlajztu guluiitu nezyuj! La'tu ni rnii palga te bejn guiniliipac

xtiidxni guzä'tni guidoro, xhet sajcdi xtiidxni. Palga guiniliipacni guzä'tni oor ni yu' nen guidoo, dxejc sii rniliini dxejc nungäjł guzoobni xtiidxni. ¹⁷iBen nayääl, benlotiä'p! ¿Xhini'c sajcrú? ¿La oor la guidoro ni rundxan oorga? ¹⁸Rniizatu: “Palga te bejn guiniliipacni guzä'tni lo bacuug ni yu' nen guidoro, di xcuentdi xtiidxni. Luxh palga yu' chu guiniliipac guzä'tni gojn ni dzuub lo bacuug, dxejc sii rniliipacni dxejc nungäjł gusoobni xtiidxni.” ¹⁹iBen nayääl, ben lotiä'p! ¿Xhini'c sajcrú? ¿La gojn o la bacuug nani rundxan gojnga, ä? ²⁰Nani ruzä't lo bacuug che rniliipacni, et ganaxdi lo bacuug ruzä'tni, nájza guiraa ni tre' lo bacuug ruzä'tni. ²¹Ni ruzä't guidoro che rniliipacni, et ganaxdi guidoro ruzä'tni, nájza Dios ni rbájzza nen guidoro ruzä'tni. ²²Sigajcza ni ruzä't guibaa che rniliipacni caguzä'tzani yagxhillo xten Dios nájza lagajc Dios ni sobga' ro'c.

²³iProobzatu remastr xten leii nájzatu refarisee, najctu benguijdx! Bedzxtiil, anis nájza comin ni rajptu, rudeedtu lo Dios tej tantga yejc cade te tzuu, niluxh ditu jiu ni sajcrú lo xtidx Dios, cadro caj xcuent yäl'nabanya, yäl'rulazlajz, nájza yäl'rililajz. Deeza ni riäjłpac guntu lał ni cayujnzatu steega. ²⁴iLa'tu, lotiä'p ni rıajz guluii nezyuj! Riutu rediidx ni guxii saj, niluxh rediidx ni sacduxh ditu jiuni, najctu si'c bejn ni rbää te rex lo xpła'tni dxejcrú räjmnı te cameii.

²⁵iProobzatu remastr xten leii nájzatu refarisee, najctu benguijdx!

Rusiatu detz bas nájza pla't luxh nenni najc-dxuudx. Sigajcza la'tu riuduxhtu recostumbr, luxh lastootu guidxa yäl'gubaa nájza yäl'rdxe'chlajz. ²⁶Farisee ni najc lotiä'p: gudıbxgaa nen bas nájza nen pla't, dxejc náj dejtznı saj naya.

²⁷iProobzatu remastr xten leii nájzatu refarisee, najctu benguijdx!, sa'csi najctu si'c rebaa ni nacchesa'c; nolbäjrenı, saru rluuini, luxh nenrenı guidxa dzujt xte bengut nájza bäl'yudx. ²⁸Sigajcza najctu la'tu. Saru rujn lojtu, rchalo rebejn najctu bensa'c, niluxh lastootu guidxa yäl'rusguee nájza yäl'guyalajz.

²⁹iProobzatu remastr xten leii nájza refarisee, najctu benguijdx! Runcheetu xpaá redade' ni gunii xtidx Dios galoo, rusucheezatu ro' xpaá rebejn ni gujc bensa'c, ³⁰dxejc rniitu: “Paru nibajnnu nen redxej ni gubajñ retoxtdagoldoonu dinu niacnäj renı bagu't redade' ni gunii xtidx Dios.” ³¹Lagajc con rediidxre rcäjptu najctu rexajg renanı bagu't redade' nani gunii xtidx Dios.

³²iColguscuääz guntu sa' recos ni guläxtiej retoxtdagoldootu!

³³iLa'tu ni najc si'c bäl, la'tu ni najc si'c te bitiääz guidxa bäl'nialajz! ¿Xho guntu te na'c cháätu gabıjł par tejpas? ³⁴Nı'cni, guxhalä rexpenä ni guinii xtidxä, nájza bennajñ, nájza mastr. Luxh yu'reni sugu'ttu sucuaatureni lo crujz; yu'zarenı siguijntu nen reguidobáz, sirınajlturenı guejdx por guejdx. ³⁵Si'cza yejctu jıajb xtiejn guiraa rebenıadolajz ni bagu't bejn xchejlı toAbel ni gujc

nadolajz, xchejliza Zacarías, xi'n Berequías, ni bagu'ttu nen guidoro gajxh lo bacuug. ³⁶Rniliápac lojtu, dojl xten guiraa recosga sijb yejc rebejn ni tre' lo guedxliuj naj.

Jesús biin xcuent guedx Jerusalén

(Lc. 13:34-35)

³⁷Räjpza Jesús:

—iJerusalén, Jerusalén! Xpejnlu rugu't redade' ni rni xtidx Dios, rucuaazareni guij yejc rebejn ni ruxhał Dios te gusule'reni xtiidxni lojtu. iBalti huált rlazä nutie'ä la'tu si'cni rutie' guidco'c rexquidbäzni nen xhigani, per ditu nicäjb!

³⁸Colhuii xho jianxteb xquidootu cuälazrenini. ³⁹Rnixgaä lojtu, naj dirutu fii loä, dxejli che guiniitu: “Benle' Dios nani siääd xcuentni.”

Jesús räjp sibijł guidoro

(Mr. 13:1-2; Lc. 21:5-6)

24 Birii Jesús nen guidoro te asiini, dxejc gubig rexejnpacni lojni, gusloj caguluiireni reyuduxhga lojni.

²Dxejc räjp Jesús lojreni:

—¿La ruhuiitu guiraa reyu're? Rniliápac nicla tej guij di jia'n yejc sa'ni ree; guiragajc reyu're sibijł.

Cos ni guluiloj gac fis

(Mr. 13:3-23; Lc. 21:7-24; 17:22-24)

³Dxejcti huijreni yejc te dajn ni laa Oliib. Che gurej Jesús ro'c, biääd rexejnpacni lojni te xhiga'tz gunabdiidxreni lojni:

—Rlaaznu guiniilu loonu guc gac guiraa recosre. ¿Xhi seen guluiloj ameer jiäädlu näjza che ameer nitloj guedxliuj?

⁴Dxejc räjp Jesús lojreni:

—iColnatiro te rut gusgueedi la'tu! ⁵Sa'csi su' xhidajł reni jiääd, naareni: “Narä nacä Crist”, luxh susgueerene xhidajł bejn. ⁶Siejn diajgtu xcuent cadro cayajc guer, näjza xcuent cadro rlazj chu guer, na'c guidxejbtu sa'csi si'c nungäjł gac, niluxh gajd galđi nitloj guedxliuj. ⁷Sa'csi siäjs te naciön sidiłnäjni stee naciön; te yälrnibee sujn guer con stee yälrnibee, luxh su' gubijn, su' yälguijdx, su'za xuduxh xhidajł lajt. ⁸Luxh guiraa redee cuäxtiejtis retrabajwduxh ni churu chu.

⁹Dxejc gutedreni la'tu ladznaa rebendojl te gusacsireni la'tu, te gugu'tzareni la'tu, luxh guiraa rebejn sidxe'ch lojtu sa'csi sanälajztu narä. ¹⁰Nen redxejga, xhidajłreni sibälaz xcärlirilajzreni, sidxe'ch lo sa'reni, suto' sa'reni lo sa'reni. ¹¹Dxejc siricaj xhidajł bejn ni rusguee, gäbreni xcuent Dios rniireni, luxh susgueerene xhidajł bejn. ¹²Sa'csi lacti suduxh yällatsiaj lo guedxliuj, diru bejn chanälajz sa'ni. ¹³Dxejcti bejn ni chasanäj xnezyujtis Dios, ni'c sun gaan xca'ni yäl nabajł par tejpas. ¹⁴Luxh sisiule' xtidx Dios guideb lo guedxliuj te gacbee guiraa reben guedxliuj xtiidxni; dxejcru jiääd fis xten Dios.

¹⁵Cheni fiitu asobga' te benguidxduxh nen yu' ni najc dxan nen guidoro, si'cni gunixgaa toDaniel ni gunii xtidx Dios gacni, bejn ni goł dee sugacbeeni nani rolni, ¹⁶dxejc renani rbäjz lo guedx Judea, suguxunreni gucuatłzlojreni nen dajn. ¹⁷Bejn ni niä'p yejc xyu'ni dxejga di galđi jiajtni te chalääni xhixtenni nen xyu'ni; ¹⁸bejn

nani cayujn dzuun lo niaa, na'c guibi'ni niclaza chaxhiini xhajbni. ¹⁹iProobza regunaa ni nuxi'n, nájza reni cagusiä' báz neñ redxejga! ²⁰Colnabduxh loj Dios xhet neñdi redxej ni cayacnalduxhdi nanab guxunditu, niclaza dxej che rusilajz bejn. ²¹Sa'csi su' trabajwduxh neñ redxejga, sa' ni gajd bejn fii dxejli ni guzobloj guedxliuj, luxh che tedni, diru guibi' chuni. ²²Luxh palga di Dios gutiu' yejc redxejga, nicla tej bejn di laa. Luxh suti' Dios yejc redxejga sa'csi rinälajzni reni aguleni.

²³'Neñ redxejga palga yu' chu naa lojtu: "Colhuui, aree Crist", o "Colhuui ani arec", na'c chalilajztuni. ²⁴Siääd xhidajl niguii ni rusguee, gäbreni najcreni crist; sidzujnza rebejn ni rusguee ni gäb xtiidxpac Dios rusule'reni; luxh sujnreni remilagwr sujnzareni senro, parsi gusgueereni, susgueduxhreni rebejn, niluxh rlazreni gusguezareni rebejn ni agule Dios, ni rililajz xtiidxni. ²⁵Agunixgää lojtu xhini'c gac. ²⁶Ni'cni palga naareni lojtu: "Bahuii, a crist yu' nez lo reyubijdz", na'c chäätu; o palga naareni: "A crist suga' neñ yu're", na'c chalilajztureni. ²⁷Sa'csi si'cni guideb xhaguibaa rien che rdinya' ladjiaa nájza ladjiätli, si'cza suhuiitu loä, Xi'n Dios ni gujc Niguii, cheni jiälsacä lo guedxliuj. ²⁸Ni najntu cadro naga' te mangut, ro'c re' regolbetz.

Cheni jiädsac Xi'n Dios ni gujc Niguii
(Mr. 13:24-37; Lc. 21:25-33; 17:26-30, 34-36)

²⁹Räjpzani:

—Cuantsi ted guiraa retrabajwduxh, sicäjy lo gubijdx,

diruza bäii gusanij, sitejbza rebajl ni yu' xhaguibaa, sinibduxhza guideb xhaguibaa. ³⁰Dxejcti suhuiireni xhaguibaa seen xten Xi'n Dios ni gujc Niguii, luxh guiraa rebejn ni rbäjz neñ guiraa reguejdx lo guedxliujre, sonduxhreni suhuiireni siääd Xi'n Niguii lo reza xhaguibaali. Siäädni con yälrnibee nájza yälrdimbichaduxh. ³¹Dxejc suxhañni rexanglni con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiin guedxliuj, guideb lo guedxliuj nájza xhaguibaa.

³²'iColguisied ni ruluui yajg iigw! Che naren renaani che cabääni be'n, asiääd bäi curex, ³³sigajcza cheni fiitu cayajc guiraa recosre, sacbeetu asiädgajxh fis, rolä'li abidzujnni. ³⁴Rniliäpac lojtu, guiraa redee sajclal ni nabajñ gaii rebejn ni suga' ree naj. ³⁵Guibaa nájza guedxliuj sinitloj, niluxh xtidxä di nitloj.

³⁶'Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

³⁷'Sigajcni gujc neñ redxej che gubajñ toNoé, si'cza gac che jiälä Xi'n Dios ni gujc Niguii.

³⁸'Neñ redxe galoo, cheni gajd nisguiduxhga jiajb, rebejn ni nabajñ dxejc cayajwreni, cayä'reni, caguchñaareni, cagudeedza bejn xindxa'preni guchña, dxejli cheni biu' Noé neñ barcwro. ³⁹Direni niacbee xtiidxni; cheni biäädli nisguiduxh ni sanä guiraareni dxejcru gubeereni. Sigajcza gacni che jiälsacä narä Xi'n Dios ni gujc Niguii. ⁴⁰'Neñ redxejga palga cayujn tio'p bejn dzuun lo niaa tejni guibee, steeni sia'n. ⁴¹Palga cayo't

tio'p gunaa xobniil, tejni guibee, steeni sia'n.

⁴²Ni'cni col̄susiñ, sa'csi ditu gan xhi dxej jiaäd Dad xtentu.

⁴³Col̄ganchee, paru niacbee baxhuaan xten yu' cor̄ yääl niääd gubaan ni siädlan rolijzni, nisiusiñni dxejc, dini nusaan niu'ni rolijzni te cuanni. ⁴⁴Ni'cni col̄susiñza la'tu, sa'csi siääd Xi'n Dios ni gujc Niguui lagajc or̄ ni ditu gun xhigab jiaädni.

Xcuent te mossac näjza te mosguijdx

(Lc. 12:41-48)

⁴⁵¿Chuni'c najc mossac ni ruzoob diidx, ni basannäj xlam̄ni rebejn ni yu' rolijzni te gudeedni xhi gaureni ä? ⁴⁶Chicbaa mos ni saru cayujñ xtuunni che guidzujñ xlam̄ni. ⁴⁷Rniliápac lojtu, lam̄ga susa'nni sa' mosga te fiini guiraa xhixtenni. ⁴⁸Dxejc palga mosga di gusoob xtidx xlam̄ni, gunni xhigab: “Sacladuxh guibi' xlam̄ä”, ⁴⁹dxejc guisloj cagusacsíni resamosni, guislojni gaunäjni, yänäjni rebengu. ⁵⁰Dxejc sidzujñ xlam̄ni dxej che dini gun xhigab jiaädni, luxh or̄ ni dini gan guidzujñni. ⁵¹Dxejc siguinduxhni mosguijdxga, surilaagwnini te guidxagsa'ni sabenguijdxni, dxejc sonduxhni, chubejli reläjyni.

Xcuent tzuu gunaa

25 Räjpa Jesús:
—Pues xcälr̄nibee Dios najc si'c tzuu gunaxa'p nani cua' xcandilse'treni te huijreni te sa'.
²Gaii regunaaga nasin, sgaiireni nayääl. ³Reni nayäälga sanäreni xcandilreni, niluxh direni nica'

sijl se't. ⁴Niluxh reni nasinga sanäreni sijl se't te guze'creni neñ xcandilreni. ⁵Sa'csi bi'nga di nidzujñgaj, gunaaz bacal̄ regunadxa'pğa, gudiejstireni. ⁶Dxejc si'cti garol yääl, biejn te xse' ni räjp: “Bi'n asiääd, col̄chäj, col̄chachaglojni.” ⁷Guiraa regunaare huistieguxunreni, dxejc bensa'creni xcandilreni, te cuaguijreni. ⁸Dxejc guigaii regunayääl räjpreni loj reni nasin: “Col̄gunidxlaa te bo'c se't gusanijñu xcandilnu, sa'csi arlajzni jiuini.” ⁹Dxejcti regunanasin räjp lojreni: “Digacdini, dxejc dini gal̄ nicla par nuurnu nicla par la'tu. Col̄chäj cadre ruto'reni se't col̄chazii xse'ttu.” ¹⁰La'ni sasii guigaii regunaa-nayäälga se't, bidzujñ bi'n. Regunaa-sin̄ ni cabäjz bi'n biunäjrenini lo sa', biäuuti ro lä'. ¹¹Cheni bidzujñ regunanayäälga, räjpreni: “Dad, Dad, baxhal ro lä'.” ¹²Dxejc räjpni lojreni: “Rniliápac lojtu, dina gumbeäü.” ¹³Dxejc Jesús räjp lojreni: —Col̄susiñza, sa'csi ditu gan nicla xhi dxej nicla xhi or̄ siääd Xi'n Dios ni gujc Niguui.

Xcuent lam̄ ni badeed meel

¹⁴Xcälr̄nibee Dios xhaguibaa najc si'c te bejn ni agojl guiriñ chääni zijt te biał. Gurejdxni rexmosni, badeedni meel lojreni.

¹⁵Lo tejni badeedni si'cti gaii mił meel, lo steeni badeedni si'cti tio'p mił, dxejc steeni cua' te mił. Loj tejgani badeedni si'cti ni rujñni xhigab sajç gunnäjreni dzuun, dxejcti biriini xpiajni. ¹⁶Ni cua' gaii mił meel bejn te dzunro, bejnñi

gaan sgaii miḷ meel. ¹⁷Sigajcza ni cua' tio'p miḷ meel, bejnni gaan stio'p miḷ. ¹⁸Dxejcti ni cua' te miḷ meel, huicua'tzni xmeel xlamni nen te guede ni gudäänni lo yuj.

¹⁹Gudejdti balti bäii, dxejc gubi' xlam remosga, bejnni cuent loj guiraareni. ²⁰Che bidzujñ ni cua' gaii miḷ meel, bidzunnäjni sgaii miḷ meel ni bejnni gaan, räjpni loj xlamni: “Dad, baniidx guejblu gaii miḷ loä. Aree sgaii miḷ meel ni benä gaan.” ²¹Räjp xlamni lojni dxejc: “Hueenca, mos hueen najclu, rusoobzalu xtidxä. Sa'csi gujclu bensa'c con te cos bäz, naj sunidxä guinibeelu xhiroobru. Biu' loä, bibalaznäj narä.” ²²Che bidzujñni ni cua' tio'p miḷ meelga, räjpni loj xlamni: “Baniidx guejblu tio'p miḷ meel loä, aree stio'p miḷ meel ni benä gaan.” ²³Räjp xlamni lojni: “Mbaj. Mos hueen najclu rusoobzalu diidx. Sa'csi gujclu bensa'c con te cosbäz, naj sunidxä guinibeelu xhiroobru. Biu' loä, bibalaznäj narä.” ²⁴Che bidzujñ mos ni cua' te miḷ meel, räjpni lo xlamni: “Dad, ananä najclu te bejn ni di gulazlajz; rca'lu cose'ch cadre dilu nibe'c binij, rutojpszalu cadre dilu nutie'ch binij. ²⁵Ni'cni bidxebä, huicua'tzä xmeellu nen yuj. Niluxh axh aree xmeellu.” ²⁶Dxejc räjp xlamni lojni: “iMos guijdx, mos ploj! Najnlu rca'ä cose'ch cadre dina nibe'cä binij, rutopä cadre dina nutie'chä binij. ²⁷Riäjñ nisa'nlu xmelä nen te bancw te che nibi'ä nicasacä xmelä con xi'nni ni niujni gaan.” ²⁸Dxejc räjpni loj reni suga' ro'c: “Colgudzucaj te miḷ meel ni ca'ni colgudeedni loj ni rajp tzuu miḷ

meel. ²⁹Sa'csi loj ni rajp sudedäru, niluxh ni xhet rajpdi sudzucaä tudxe'n nani rajpni.” ³⁰Dxejc räjpni: “Colca' mosre ni xhet sajcdi, colguzälñi lo yälñacäjy, cadre chu yälñronduxh, näjza yälñrajw reläjy bejn.”

Yälñuxhtis xten reguejdx

³¹'Che jädsc Xi'n Dios ni gujc Niguii con yälñrdimbicha' xtenni, siädñäni rexangl Dios. Dxejc sibejni lo tron ni rdimbicha' xtenni te guinibeeni. ³²Dxejc sidoy nez lojni guiraa reben guedxliuj. Dxejc sibeni lojreni, silia'ni sa'reni si'c rujn te baxtoor cheni rbeni rexiil loj redxib, te rlia'reni loj sa'reni. ³³Suzujni rexiil xladbeeni dxejc redxib xladbäygwni. ³⁴Dxejc säjb rei loj reni suga' xladbeeni: “Coltaa, la'tu ni benle' Xtaä. Coljiu' lo yälñrñibee ni guc-chee cheni guzoblojli guedxliuj. ³⁵Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te benzijt, la'tu banidxlaatu cadre bia'nä. ³⁶Che xheti xhabä, la'tu baniidxni, che gucxhuä, la'tu biädhuiitu narä, che guyu'ä nen latzguiib, biädhuiitu narä.” ³⁷Dxejc sinii reni suga' xladbeeni, säjbreni: “Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojllu, baniidxnu xhi gu'lu? ³⁸¿Guc bahuiinu najclu si'c te benzijt, baniidxnu cadre bianlaalu, o biäädx xhajblu, baniidxnu xhi gojtu? ³⁹O ¿guc bahuiinu cayacxhuulu, o yu'lu nen latzguiib, biophuiinu lojlu?” ⁴⁰Dxejc reiiga säjb lojreni: “Rniliäpac lojtu, xhitis xhi bejntu loj te rexpenä ni rñii

xtidxä mase proobreni, lagajc loä bejntu recosga.”

⁴¹Dxejc säjpszani loj reni suga' ladbäjägwini: “Colguibicaj loä, benguijdx, colchäj lo balduxh ni cayejc par tejpas ni cayejc par bendxab ni rnibee näjza rexpēdxabni. ⁴²Sa'csi gulanä, luxh ditu nuniidx xhi niauä; biolä, per ditu nuniidx xhi niä'ä; ⁴³cuanzaä si'c te benzijt, luxh ditu nunidxlaa cadro nia'nä, biädxza xhabä, niluxh ditu nuniidx xhi niacwä; gucxhuä, guyu'äza nen latzguuib, niluxh ditu niädhuui loä.” ⁴⁴Dxejc laareni säjbreni: “Dad, çguc bihuiinu calaanlu, o cayojllu, o canzajlu si'c te benzijt, o cayäädx xhajblu, o cayacxhuulu, o yu'lu nen latzguuib, luxh dinu niacnäjlü?” ⁴⁵Dxejc säjb reiiga lojreni: “Rniliápac lojtu, loj xhitis ni ditu niacnäjä rebejn ni rililajz xtidxä, mase proobreni naräni ditu niacnäjä.” ⁴⁶Dxejcti sij rebejnre lo yälrusacsí par tejpas, per rebejn ni nadolajz, ni agule Dios, sijreni lo xcäl nabajñ Dios par tejpas.

Bejnreni xhigab xho guiniaazreni

Jesús

(Mr. 14:1-2; Lc. 22:1-2; Jn.11 :45-53)

26 Che gulujx gunii Jesús rediidxre, räjpni loj rexpējpacni:

²—Anajntu stio'p dxejtis cayäädx gac lanij ni laa pascw. Luxh suteedreni narä, Xi'n Niguui ladzñaa reni gucuaa narä lo cruzj.

³Dxejc bidojp rebejn ni rnibee rebixhojz, näjza remastr xten leii, näjza rebēgool lo rexpējn Israel. Lo xle' Caifás, ni rnibee

loj rebixhojz, bidojpreni. ⁴Ro'c bachaagreni diidx xho guiniaazreni Jesús con yälrusguee, te ju'trenini.

⁵Luxh räjpreni lo sa'reni:

—Na'c jiennuni nen redxe lanij, te di gun rebejn bieiduxh.

Te gunaa ni biädnä perfum

(Mr. 14:3-9; Jn.12 :1-8)

⁶Che yu' Jesús guedx Betania, rolizj Simón te bejn ni basiajnci che räjä tiejxhni, ⁷ro'c gubig te gunaa lojni, ca'ni te vasguij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús. ⁸Che bahuii rexpējpacni xhi cayujñni, bidxe'chreni, gusloj cayäjpreni:

—¿Xhicuent casälxliä'ni perfumga? ⁹Perfumre niajc nido'ni, nirii xhidajl meel lojni te niacnäjäni rebenproob.

¹⁰Biejñ diajg Jesús xhi caniireni, dxejc räjpni lojreni:

—¿Xhicuent cadxe'chnäjtu gunaare? Ni te coshueen najc dee nani bejnni loä. ¹¹Ni guirasi dxej su' rebejn ni xhet rajpdi lojtu, peta narä guxii dxej su'ä lojtu. ¹²Nani bejn gunaare che bachajni perfumre guideb lagaa tiexhä, najcni par guzucheeni narä te guiga'tzä. ¹³Rniliápac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäjä gunaare narä, te guinaj lajzreni gunaare.

Judas bato' Jesús

(Mr. 14:10-11; Lc. 22:3-6)

¹⁴Dxejc lo retzubitio'p rexpējpac Jesús birii tej ni laa Judas Iscariote, huininäjni rebejn ni rnibee loj rebixhojz, ¹⁵räjpni:

—¿Lac guniidxtu loä te gutedä Jesús ladznaatu?

Dxejc badeedreni galbitzoo melpla't lojni. ¹⁶Dxjecli caguuil Judas xho gutedni Jesús lojreni.

Lult xchej xten Jesús

(Mr. 14:12-25; Lc. 22:7-23; Jn.13 :21-30; 1Co. 11:23-26)

¹⁷Primer dxej lanij, dxej ni rajwreni yätxtiil ni di saguij, gubig rexpejn̄pacni loj Jesús, räjpreni lojni:

—¿Caro rlaizlu chozucheenu te gaulu xchej xten lanipascw?

¹⁸Dxejc räjpn̄ni lojreni:

—Colchäj lo guejdx rolizj te dade', colye'tz lojni: “Si'c naj Dad mastr: Asiäddzungajxh xorni, ni'cni rolizjlu gaunäjni rexpejn̄pacni xchej lanipascw.”

¹⁹Bejnti rexpejn̄pacni si'cni gunibee Jesús gac, bazucheereni xchej xten pascw.

²⁰Che biu' guxhijñ, sobga' Jesús lo mex con retzubitio'p xpejn̄pacni.

²¹Laḷ ni cayajwreni räjpn̄ni lojreni: —Rniliä lojtu, yu' tejt̄ni ni guto' narä.

²²Dxejc guc-huinduxh lajzreni, räjpreni lojni:

—Dad, ¿andi naräni?

²³Dxejcti räjpn̄ Jesús lojreni:

—Ni gaunäj narä nen̄ tejt̄is pla't, laa ni'cni guto' narä. ²⁴Xi'n Dios ni gujc Niguui sajc si'ctis ni caj loj guijt̄z xten Dios, per gunatiro bejn̄ ni guto'ni. Huenru na'c niajl bejn̄ga.

²⁵Dxejcti gunii Judas, ni caguto' Jesús, räjpn̄ni:

—Mastr, ¿andi naräni?

Jesús räjpn̄ lojni:

—O'n, lujni.

²⁶Laḷ ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejn̄pacni, räjpn̄ni: —Coltajw; dee najc si'c tiexhä.

²⁷Dxejc guläsni te vas, badeedni xquixtios lo Dios, dxejcti badeednini loj rexpejn̄pacni, räjpn̄ni: —Guiraatu colyä', ²⁸sa'csi dee najc si'c xtienä; ni'cni riannä' la'tu te didxcoob, luxh rejnre sixe'ni xcuent xhidajl bejn̄ te guḷaanireni nen̄ dojl. ²⁹Luxh rniä lojtu, diruna yä'ä nis nani rii yejc uub, dxejl̄ni yänäsacätu lo xcäl̄rnibee Dios, Xtaďä.

Räjpn̄ Jesús sibälaz Pedroni

(Mr. 14:26-31; Lc. 22:31-34; Jn.13 :36-38)

³⁰Che gulujx bil̄reni te dij, biriireni, sääreni lo dajn ni laa Oliib. ³¹Dxejc räjpn̄ Jesús lojreni: —Guiragajctu sactio'p lajztu xcuentä, susa'ntu narä naguxhijñ sa'csi lo reguijtz xten Dios caj scree: “Sugu'treni baxtoor dxejc sire'ch rexiil.” ³²Dxejc cheni guibansacä lo rebengut, ganidä cha'ä región Galilee, dxejcti jädnajl̄tu narä.

³³Dxejc räjpn̄ Pedr loj Jesús:

—Masque guiraareni cuälazlu, narä dina cuälazälu.

³⁴Dxejc räjpn̄ Jesús lojni:

—Rniliápac lojlu, lagajc guxhijñre, nicla gajd guidgäi cuedxa', luxh luj alagulälazlu narä choñ huält.

³⁵Räjpn̄ Pedr loj Jesús:

—Masque riäj̄l guetnääl̄u, dina cuälazälu.

Dxejc sigajcza gunii guiraa rexpejn̄pacni.

**Gurejdx-gunab Jesús loj Dios nen
Getsemaní**

(Mr. 14:32-42; Lc. 22:39-46)

³⁶Dxejcti bidzujñ Jesús nájza
rexpejn̄pacni te lajt ni laa
Getsemaní, rájpn̄i lojreni:
—Colcuésijc ree laj̄ ni cuedx-
guiniabä lo Dios.

³⁷Dxejc sanäni Pedr nájza
guir̄o'p xi'n Zebedeo, luxh gusloj
cayachuinduxh lajzni, cayu'zani
yärsiaduxh. ³⁸Dxejc rájpn̄i lojreni:
—Te yäl̄huinduxh yu' lastoä;
astooceanu agojl guetä. Coljia'n ree,
coltie'ch bacal̄ lojtu.

³⁹Dxejc guzaj Jesús stla',
guzxhijbni dxejc basajb lojni lo
yujli, gusloj cabedx-canabni lo Dios:
—Xtadä, palga sajcn̄i, basanlaa
tedcaj trabajwduxhre ni tedä, te
na'c tedäni. Xhet si'cdi ni rlazä
gacni; si'cpacni rlazzlu gac, si'c
gacni.

⁴⁰Dxejcti gubi'ni cadro suga'
guichon̄ rexpejn̄pacni, che
bidzujñni ro'c, nagayejsreni. Rájpn̄i
lo Pedr:

—¿La di niajcdi nutie'chtu bacal̄
lojtu nicla tebor, ä? ⁴¹Colguibajñ,
colnab lo Dios te na'c jiajbtu nen̄
dojl. Guliipacni, lastootu nadip,
niluxh tiejxhtu rdxajg.

⁴²Gubi' Jesús stehuält, gurejdx-
gunabni loj Dios, rájpn̄i:
—Xtadä, palga digacdi tedcaj tedä
trabajwre, sugacni si'ctis ni rlazzlu
gacni.

⁴³Dxejc gubisacni, bidxäl̄ni
rexpejn̄pacni, nagayejsreni
sa'csi yuduxh bacal̄ lojreni.

⁴⁴Basaannireni, dxejc säsacni,
gurejdx-gunabni lo Dios ni riojn̄

huält, gunisacni lagajc rediidx ni
guniini galoo. ⁴⁵Dxejc huijni cadro
suga' rexpejn̄pacni, rájpn̄i lojreni:
—iNaj sii, colguejs, colgusilajz!
Abidzujñ or̄ ni gutedreni Xi'n Dios
ni gujc Niguii ladznaa rebendojl̄.
⁴⁶iColchastie, colcho', colhuii!
Asiääd nani guted narä ladznaa
rebendojl̄.

Gunaazreni Jesús sanärenini pres

(Mr. 14:43-50; Lc. 22:47-53; Jn.18 :2-11)

⁴⁷Lañni canii Jesús bidzujñ Judas,
nani najc tej retzubitio'p xpejn̄pacni.
Bidzunnäjni xhidalduxh bejn̄ ni
ca' espaad, ni ca' garo't, najcreni
xpejn̄ reni rnibee rebixhojz, nájza
xpejn̄ rebengool xten rexpejn̄
Israel. ⁴⁸Judas, ni bato' Jesús,
abadedxgaani te seen lojreni rájpn̄i:
—Nani guchagro'ä, ni'c najc laani;
colguiniazagajcni.

⁴⁹Dxejc gubigni loj Jesús, rájpn̄i:
—Xchan, Dad Mastr.

Dxejc bachagro'ni lojni. ⁵⁰Jesús
räjp lojni:

—Xamigwä, ¿xhi siääd̄lu?

Dxejcti gubig rebejn̄ lojni,
gunaazrenini.

⁵¹Per tej reni suganäj Jesús
gulääni te spaad, batiu'ni diajg
te mos xten rebixhojz ni rnibee.

⁵²Dxejc rájp Jesús lojni:

—Guluchee xspaadlu loj
xse'ni. Guiraa reni rucuanäj con
spaad, lagajc con spaad guetreni.

⁵³¿La ditu gan sajca guiniabä
lo Xtadä, luxh laani suxhalgajcni
gayon̄bitzubitio'p miñ xanglni
gacnäj narä? ⁵⁴Dxejc xho gac soob
diidx ni caj lo reguijtz xten Dios
ni rnixgaa riäj̄l gac guiraa recosre
lagajc si'cni cayajcni.

⁵⁵Dxejc räjp Jesús loj rebejn xhidajlga:

—¿La siädnätu spaad näjza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiätu nen guidoro, luxh ditu niniaaz narä.

⁵⁶Niluxh guiraa recosre cayajc te soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexejnpacni basanxtebreni Jesús, baxunreni lojni.

Jesús nez loj rebixhojz

(Mr. 14:53-65; Lc. 22:54-55, 63-71; Jn.18 :12-14, 19-24)

⁵⁷Reni gunaaz Jesús huinänini nez loj Caifás, ni rnibee loj guiraa rebixhojz, bidzujnreni cadro abidojg guiraa rebejn nani ruluii leii näjza rebengool xten xpejn Israel. ⁵⁸Dxejcti zit-zijtz biädnajl Pedr rebejnnga, bidzujnlireni lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'nni te fiini xhini'c gac.

⁵⁹Reni rnibee rebixhojz, näjza rebengool con guiraa reni rajp yälrnibee gusloj caguiilreni xhitis te diidx, masque xhet guliidini, te gucuaquijreni Jesús te guinibeereni guetni. ⁶⁰Niluxh xhet bidxäldireni, luxh gubig xhidajl bejn, guniireni xhidajl didx-xhii xcuent Jesús. Dxejcti bidzujn tio'p dade' ni gunii didx-xhii, ⁶¹räjpreni:

—Niguiire gunii scree: “Narä sajc gutzulä guidoro xten Dios, sajca gunchesacäni nen chon dxej.”

⁶²Dxejc gusulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

⁶³Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajn. Gunii don, ¿la luj najc Crist, Xi'n Dios?

⁶⁴Jesús räjp lojni:

—Lagajc guejblu naj si'c. Niluxh empac rniä lojtu, desde najli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jialä lo reza ni tre' xhaguibaa.

⁶⁵Dxejc batiäjs dade' ni rnibee loj rebixhojz xhajbni, räjpni:

—iNiguiire aguniyajni Dios con xtiidxni! ¿Xhiru testiigw rquiinnu? Abiejn diajgtu didxyaj xtenni.

⁶⁶¿Xhi rchalotu?

Dxejc basejcreni diidx:

—iAbiga'ni! Riäj] guetni.

⁶⁷Dxejc batiobxhejnreni lojni, gudijnrenini. Yu'reni gudajp lojni, ⁶⁸räjpreni lojni:

—Palga najclu Crist, gunii chuni'c gudijnlu.

Di Pedr nicäjp numbeeni Jesús

(Mr. 14:66-72; Lc. 22:56-62; Jn.18 :15-18, 25-27)

⁶⁹La] ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanjlu Jesús, ni siääd nez Galilee.

⁷⁰Per di Pedr nicäjp nez loj guiraareni, räjpni:

—Dina ganä xhini'c caniilu löä.

⁷¹Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siääd Nazare't.

⁷²Dxejc basguee Pedr stehuält, räjpni:

—Rniliápac dina gumbeä dade'ga.

⁷³Che gojl sterate', gubig reni suga' ro'c loj Pedr, räjpni:

—Guliini; näjza luj najclu te xpejn; huenliisi riejn diidx ni rniilu.

⁷⁴Dxejcti guslojni cagueni, caguzä'tni Dios, räjpni:

—Dipacna gumbeä niguiiga.

Guniitisni si'c, chela guredxa' te guidgaii. ⁷⁵Dxejcrú banalajz Pedr rediidx ni gunii Jesús lojni che räjpni: “Che gajdli guidgaii cuedxa', chon huält alaguniilu dilu gumbee narä.” Dxejc birii Pedr ro'c, gusloj cayonduxhni.

Batedreni Jesús loj Pila't

(Mr. 15:1; Lc. 23:1-2; Jn.18 :28-32)

27 Che bianij lo guedxliuj, guiraa reni najc rebixhojz ni rnibee näjza rebengool xten rexpejn Israel bia'nreni diidx xho gunreni ju'treni Jesús. ²Baliibrenini, guläärenini ro'c, huisa'nrenini loj Poncio Pila't, ni najc gubernadoor.

Xho gujt Judas

³Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzuu meel pla't loj rebixhojz ni rnibee näjza loj rebengool. ⁴Räjpni:

—Banitduxhä lo Dios sa'csi bato'ä te bejn ni xhet bejndi.

Dxejc räjpreni lojni:

—Xhixh gunnu. Ni'c najc xcuentlu; lujti najn.

⁵Dxejc bacuaa Judas meelga lo yuj nen guidoro, biriitini ro'c. Sas huijni, baliibni te duu guejn, gojlni lo te yajg, ro'cti gujtni.

⁶Rebixhojz ni rnibee batojpreni meelga, räjpreni:

—Di gac di guizälnu meelre nen caj gojn sa'csi najcni xcuent xtiejn te bejn.

⁷Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzijt. ⁸Ni'cni najli rniireni yujga: “Yurejn”. ⁹Si'c gusojb diidx ni gunii Jeremías, dade' ni gunii xtidx Dios galoo che räjpni: “Cua'reni galbitzuu melpla'tga si'cti basoob rexi'n Israel sajc bejn. ¹⁰Con meelga guziireni yuj lo bejn ni runchee guejs, sigacni gunibee xtadnu Dios.”

Gusuj Jesús nez loj Pila't

(Mr. 15:2-5; Lc. 23:3-5; Jn.18 :33-38)

¹¹Bidzunnäjreni Jesús loj Pila't ni najc gubernadoor. Dxejc gunabdiidxni, räjpni lo Jesús: —¿La luj najc reii xten rexpejn Israel, ä?

Räjp Jesús lojni:

—Najcni si'cni najlu.

¹²Lalni cabe'c rebixhojz ni rnibee näjza rebengool rexquej Jesús xhetliidi guniidi Jesús. ¹³Dxejc räjp Pila't lojni:

—¿La di diajglu jiejn guiraa rediidx ni caniireni cagucuaquijreni luj, ä?

¹⁴Per xhetliidi diidxdi basejc Jesús, nicla xcuent tejsi diidx ni

bacuaquijrenini. Ni'cni bidxeloduxh gubernadoorga.

Gunibeereni guet Jesús

(Mr. 15:6-20; Lc. 23:13-25; Jn.18 :38-19:16)

¹⁵Neñ redxe lanij räjpreni costumbr ruslaa Pila't tej beñ ni cue rebeñ loj reni yu' neñ latzguuib.

¹⁶Neñ redxejga guyu' te beñ ni sääb xtiidxni ni laa Barrabás.

¹⁷Cheni tre' guiraareni ro'c, gunabdiidx Pila't lojreni:

—¿Chuni'c rlanjtu guslaá, la suslaá Barrabás o Jesús ni laa Crist?

¹⁸Sa'csi najn Pila't rdxe'chlajzreni lo Jesús, ni'c bateedrenini lojni.

¹⁹Lañ ni sobga' Pila't lo yajgxhiil cadro rujni yälguxhtis, baxhal cháälni diidx lojni, räjpni:

—Xhet gundilu dade'ga ni xhet beñdi, sa'csi nuchej nadxuudx gunixcalä xcentni.

²⁰Niluxh rebixhojz ni rnibee näjza rebengool baquuilreni rebeñ te gunabreni laa Barrabás, näjza te guet Jesús. ²¹Dxejcti gunii gubernadoor stehuält, räjpni lojreni:

—¿Chu tej loj guiro'preni rlanjtu guslaá?

Dxejc guredxa'reni, räjpreni:

—iBarrabás!

²²Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo cruzj.

²³Dxejc räjp Pila't lojreni:

—¿Xhi latsiaj bejnini?

Niluxh laareni guredxa'rureni, räjpreni:

—iBacuaani lo cruzj!

²⁴Che bahuui Pila't xlia'si caniini, alga gusloj rebeñ cayujn te

bieiduxh, cua'ni nis, gudiibni ñaani nez lojreni, räjpni:

—Dina xcaquiä xtiejn bejnre ni xhet beñdi. La'tu colhuii xho guntu. Xcuenttitu najcni.

²⁵Dxejc guiraa rebeñga badzu' diidxre, räjpreni:

—Suxcaquijnu xtiejnini, nuurnu näjza rexi'nnu.

²⁶Dxejc baslaa Pila't Barrabás, dxejc gunibeeni gudijnreni Jesús dxejc bateednini ladzñaa rebeñ te gucuaarenini lo cruzj.

²⁷Dxejc huinä resoldaad xten gubernadoor Jesús lo pretoor, yu' cadro rujnreni yälguxhtis, ro'c batojpreni guiraa resa'reni. ²⁸Dxejc gulääreni xhajnbi, bashuajcwrenini te lad xniaa. ²⁹Dxejc bencheereni te coron guejch, basälrenini yejcnini, basälreni te yabixijl ñaani, xladbeeni, sas bazuxhijbreni nez lojni guslogajc caguxhisnäjrenini, räjpreni:

—iCollä'p xpala'n reii xten rexpejn Israel!

³⁰Sas batiobxhejnreni lojni, cua'reni yabixijlga te ni'c batiäljreni yejcnini. ³¹Che gulujx baxhiznäjrenini, gulääreni lad xniaa ni najcwni. Dxejc bashuacwsacrenini lagajc xhajnbi, sanätirenini te xcajni lo cruzj.

Bacuaareni Jesús lo cruzj

(Mr. 15:21-32; Lc. 23:26-43; Jn.19 :17-27)

³²Cheni sariireni, bidxaagreni te beñ ni siääd guedx Cirene, laani Simón, basguureni dade'ga xcruzj Jesús.

³³Che bidzujnreni te lajt ni laa Gólgota, nani säloj: dan Calabeer, ³⁴ro'c badeedreni bin nu'ch cuanlaa

te gu' Jesús. Te bocbäztisni gu'ni, dxejc naaddiruni niä'nini.

³⁵Cheni abacuaareni Jesús lo crujz, gudzujt resoldaad yejc xhajbni, te si'c gudisreni xhajb Jesús cua'reni, te si'c guzobj diidx xten te dade' ni gunii xtidx Dios. ³⁶Gurejtireni ro'c, gusloj canäjreni Jesús. ³⁷Yejc crujzga bacuaareni te guijtz con letro. Lo guijtzga rcaj xhini'c najc xtojł nani cayejt. Lo guijtzga caj: “Dee najc Jesús reii xten rexpejn Israel.”

³⁸Näjza tio'p gubaan cuaj lo stio'p crujz con laani. Tejni cuaj lo te crujz xladbee Jesús, steeni cuaj xladbäjgwni. ³⁹Luxh renani sadejd nejzga guniyajreni Jesús, cagusniibreni yejcreni, ⁴⁰cayäjpreni lojni:

—iJa'ä! Luj ni nutiexhlu guidoo, luxh chontis dxej niunchesacluni; palga guli najclu Xi'n Dios, biäjł loj crujzga.

⁴¹Näjza rebixhojz ni rnibee, naj remastr xten leii, baxhiznäjrenini räjpreni loj sa'reni:

⁴²—Basłaani xhidajł bejn, xhoxh di gacdi gusłaani lagajc laani. Palga najcni reii xten rexpejn Israel, sujiäjłtni lo crujz nanaj te chalilajznu xtiidxni. ⁴³Huinälajzni Dios, naj sugusłaa Diosni palga sanälajz Diosni; ni najni: “Narä nacä Xi'n Dios.”

⁴⁴Regubaan ni caj lo recrujz sigajcza guniyajreni Jesús.

Che gujt Jesús

(Mr. 15:33-41; Lc. 23:44-49; Jn.19 :28-30)

⁴⁵Dxejcti bicäjy guideb guedxliuj läidxej hasta rcachon gudxej.

⁴⁶Si'cti rcachon gudxej guredxa' Jesús dipduxh, räjpnı:

—Elı, Elı, çlama sabacatani? —dee säloj: Xtiozä, Xtiozä, çxhicuent gulälazlu narä?

⁴⁷Yu' reni suga' ro'c, che biejn diajgreni räjpnı si'c, räjprenı:

—Cabejdx Dade're Elıas.

⁴⁸Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binagrğa ro' Jesús.

⁴⁹Dxejc reni tre' ro'c räjpnı:

—Basaan; guidon la siäd Elıas te gusłaanini.

⁵⁰Dxejc guredxaduxh Jesús stehuält, basłaatini xpırtıni. ⁵¹Lagajc orga biräsya' ladro ni zääb nen guidoro, gujcnı tio'p la' jiaali hasta lo yuj. Gujc te xuro, sas gusuj bej reguiro. ⁵²Dxejc gubicaj reguij ni niäuu ro' rebaa, luxh gubansac xhidajł xpejn Dios ni gujt aguc xchej. ⁵³Dxejcti, che huäjs Jesús lo rebengut, biriireni nen baa, baluilojreni lo xhidajł bejn ni rbäjz guedx Jerusalén.

⁵⁴Dxejc capitán xten resoldaad näjza resoldaad ni canäj Jesús, che bahuiireni xuduxh näjza guiraa recos ni gujc ro'c, bidxejbreni, räjprenı:

—Guliipacni najc dade're Xi'n Dios.

⁵⁵Zijtru tre' xhidajł regunaa ni biädnał Jesús che biriini nez Galilee te bahuiireneni. Cadxelojtisreni guiraa ni cayajc ro'c. ⁵⁶Tej regunaaga najc Marii Magdalen, steeni najc Marii xnan Jacob näjza José, steeni najc xnan rexi'n Zebedeo.

Huica'tzreni Jesús

(Mr. 15:42-47; Lc. 23:50-56; Jn.19 :38-42)

⁵⁷Che gojł gudxej, bidzujł te benrajpnı ni siäd guedx Arimatea; laani José. Näjza dade'ga najc tej reni birinał Jesús. ⁵⁸Huij dade'ga

loj Pila't, gunabni tiejxh Jesús. Dxejc gunibee Pila't gudeedrenini lojni. ⁵⁹Cua'ti José tiejxh Jesús, batejbnini nen̄ te bariadya, ⁶⁰huitixhnini nen̄ xpaapacni. Nacoob baaga, gojn̄ni bidäänni cuä' te guilaj. Dxejc basäuni ro' baaga con guiro, dxejcti siini. ⁶¹Sobga'za Marii Magdalen̄ nájza stee Marii nez loj baa, bahuiireni biga'tzni.

**Xhi räjp resoldaad ni
cuanäj xpaä Jesús**

⁶²Che gudejd dxej xten ni gulec-cheereni lanij, bara yääl bidojp rebixhojz ni rnibee nájza rebejn̄ ni laa refarisee, bidzujn̄reni loj Pila't, ⁶³räjpreni lojni:

—Dad, banaj laaznu xhi räjp bejn̄ ni rusgueere. Räjpreni: “Che ted chon̄ dxej sibansacni loj rebengut.”

⁶⁴Ni'c baxhaḷ chu chacanäj ro' baaga dxejli guisa' chon̄ dxej, te di chää rexpejn̄pacni chaläärenini tiejxhni, dxejc gäbreni loj rebejn̄: “Agubansacni loj rebengut.” Yälrusgueega sajc cuentroru loj ni gujc ganid.

⁶⁵Räjpreni Pila't lojreni:

—La'tu rajptu te cuaa soldaad; colchäj, basäutzut'z ro' baaga si'ctis ni sajc guntu.

⁶⁶Dxejcti sääreni, basäutzut'zreni ro' baaga; con resoldaad bacuaareni te seii lojni te rut faldini. Dxejc basa'nreni resoldaad canäj ro'c.

Sibansac Jesús loj rebengut

(Mr. 16:1-8; Lc. 24:1-12; Jn.20 :1-10)

28 Che gudejd sabd, dxej ni ruzilajz rexpejn̄ Israel, che gusloj cayänij lo guedxliuj te jiu' stee xmaan, bidzujn̄ Marii

Magdalen̄ nájza stee Mariiga, siädhuiireni lo baa. ²Luxh alagujc te xuro ni basniib lo yuj, sa'csi biääd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga. ³Rdimbichaduxhni si'c najc che rdinya', luxh xhajn̄ni najc nolbäj si'c najc yejc ni riajib. ⁴Che bahuii resoldaadni, bichebduxhreni, sädiidxreni, gujcreni si'c bengut. ⁵Dxejc räjp guixhajg xte Diosga loj regunaa:

—Na'c guidxejbtu. Ananä caguiiltu Jesús ni cuaj lo cruzj.

⁶Rutini ree sa'csi agubansacni sigajc ni najni. Coltahuii cadre gojt̄ni. ⁷Colguxun, colchaye'tz loj rexpejn̄pacni agubansacni loj rebengut. Luxh naj agunijdni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

⁸Dxejcti rusquenduxh regunaaga, biriireni ro' baaga. Cadxejbreni, cabalazduxhzareni sanäreni diidx loj rexpejn̄pac Jesús. ⁹Chela bidxaagreni Jesús lo nejz, räjpreni: “Xchan”, lojreni. Sas gubigreni loj Jesús, bazuxhijbreni, gudääzreni guenni'ni, gojn̄renini. ¹⁰Dxejc räjpreni lojreni:

—Na'c guidxejbtu. Colchanä diidx loj rexpenä, chääreni región Galilee, sa'csi ro'c suhuiireni löä.

Rediidx ni räjp resoldaad

¹¹Laḷni sää regunaaga, bidzujn̄ gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga. ¹²Dxejc rebixhojz ni rnibee bachagsa'zareni

con rebengool te bia'nreni diidx gudeedreni xhiroob meel lo resoldaad, ¹³räjpreni lojreni:

—Scree colye'tz lo rebejn: “Lał ni nagayesnu, canäjnu ro' baa, biääd rexpejn_{pac} Jesús guläxhiga'tzreni tiejxhni.” ¹⁴Palga jientiajg gubernadoor dee, siohuinuni te di yu' xhi gunni la'tu.

¹⁵Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpen Israel. Najli canisijreni si'c.

Baxhał Jesús rexpejn_{pac}ni

(Mr. 16:14-18; Lc. 24:36-49; Jn.20 :19-23)

¹⁶Dxejcti sää retzubiteeb xpejn_{pac} Jesús lo región Galilee,

lo dajn cadro bia'n Jesús diidx guidxaagnireni. ¹⁷Cheni bahuiireni loj Jesús, bazuxhijbreni, gojnrenini, per yu' reni ractio'p lajzreni. ¹⁸Dxejc gubig Jesús lojreni, guninäjnireni, räjpni:

—Arapä guiraa yälrnibee xhaguibaa näjza lo guedxliuj.

¹⁹Ni'cni, colchäj, guideb guedxliuj colchagajn bejn gac xpenä, colgutiobnisreni, con laj Gueb Dios, näj laj Xi'n Dios näjza laj Sprit Dxi'an xten Dios. ²⁰Colguluiireni gusoobreni guiraa rediidx ni guinibeä. Luxh lagajc narä suganáä la'tu guiraa redxej, dxejli che nitloj guedxliuj. Sugacni si'c.